

**EIGHTH LEGISLATIVE ASSEMBLY OF MIZORAM
(NINTH SESSION)**

LIST OF BUSINESS

FOR SECOND SITTING ON WEDNESDAY, THE 23rd FEBRUARY, 2022
(Time 10:30 A.M. to 1:00 P.M. and 2:00 P.M. to 4:00 P.M.)

OBITUARY

1. **PU ZORAMTHANGA**, Hon. Chief Minister to make obituary references on the demise of the following dignitaries :
 - (i) PU SAITLAWMA SAILO, Former Member of the Legislative Assembly of Mizoram.
 - (ii) PU C. RAMHLUNA, Former Member of the Legislative Assembly of Mizoram.
 - (iii) PU HRANGTHANGA COLNEY, former Minister, Mizoram Legislative Assembly.

QUESTIONS

2. *Questions* entered in separate list to be asked and oral answers given.

LAYING OF PAPERS

3. **PU ZORAMTHANGA**, Hon. Chief Minister to lay on the Table of the House Thirtieth Annual Report of the Mizoram Public Service Commission (MPSC) for the year 2020-2021.
4. **PU R. LALZIRLIANA**, Minister to lay on the Table of the House Audit Report of Joint Electricity Regulatory Commission for Manipur and Mizoram for the year 2013-14, 2014-15, 2015-16 and 2016-17.
5. **DR. K. BEICHHUA**, Minister to lay on the Table of the House Annual Report of the Office of Commissioner, Persons with Disabilities Mizoram for the year 2020-2021.

DISCUSSION ON MOTION OF THANKS

6. Discussion on Motion of Thanks on the Address of the Governor (to be concluded).

H. LALRINAWMA
Commissioner & Secretary

SPEAKER : “*Thil tha lo titute avangin intilungai duh suh la, Fel lo taka tite chu awt hek suh. Hlobet angin ah thlukin an awm thuai ang a, hnim hring angin an vuai dawn si a. Lalpa chu ring la, thil tha ti rawh: He ramah hian awm la, rinawmna um zel rawh*”

– Sam 37:1-3

Vawiinah hian kan member zahawm tak... (*interruption*)

PU LALDUHOMA : Hlim takin ro kan rel ho leh dawn emaw kan tih lain hei, tun hnai maiah Ngaizawl khaw kawng laihnaah cheng nuai 100 zet ilo ei ve a ni tih Chiang taka sawi thawmte kan han hre ta a, hei hian Ngaizawl khaw mipui leh Zoram mipui rilru a tina em em a, a pawikan ti takzet a. Chuvangin, he House zahawmna hi tih bawrhbana a awm loh nan leh nangma tan ngei pawh he House i kaihruai loh hi a mawi zawka kan hriat sak che avangin, nimirah kan House Leader hnenah kan thlen a, chu chu hnawlsak kan nih tak avangin, he House zahawmna hi humhim zel anih theih nan leh he kan ngenna min hnawlsak avanga kan lawm lohna lantir nan keini chu kan lo chhuak ang e.

PU LALRINTLUANGA SAILO: Pu Speaker, mi sawi thawm mai maiah khan he House hi a inghat dawn em ni? Thil Chiang tak awm bawksilo khatianga thil kalpui chiah kei ka ngai lo a ni. Tin, Speaker i thut reng laiin he House zahawmna hi a ti bawrhbang a, members kan nihna hi a zahawm loh hlein ka hria. Chuvang chuan, hei hi awmze neilo niin ka hria a, sawi tur an nei a nih chuan, “*Thil tha lo titute avangin intilungai duh suh la,*” ti kha kan chhiar zawh chiah kha maw.

SPEAKER : Tunah hian member zahawm tak Pu Lalsawivunga taksa harsatna vangin a lo kal thei lo a ni. Vawiin hian ramhruaitu kal tate sunna hun kan hmang ang a, kan sun turte hi - Pu Saitlawma Sailo, Pu C. Ramhluna leh Pu Hrangthanga Colney, former Members of Legislative Assembly te an ni. Kan House Leader zahawm tak Pu Zoramthanga'n sunna hun rawn hmang se, ka sawm e.

PU ZORAMTHANGA CHIEF MINISTER: Pu Speaker, vawiinah thil tih hrehawm tak mai kan member kal ta te sunna kan nei dawn a, pakhat mai ni lovin pathum lai mai kan nei leh nghal a, a pawikan ti tak tak a. Tichuan, a hmasa berin Pu Saitlawma Sailo chanchin hi ka han sawi ang a.

Mizoram Ex-MLA a ni a, November ni 5, 2021 (Zirtawpni) chawhnu dar 1:45 ah Aizawl Hospital-ah kum 81 mi niin a boral.

Pu Saitlawma Sailo hi Pu Zakhuma leh Pi Zachani-te fa niin, June ni 17, 1940-ah Bualte-ah a piang a. An unau hi mipa 3 leh hmeichhia 5 anni a, Pi Hrangtawni nen kum 1967-ah an innei a, fapa pathum leh fanu pahnih an nei a, Kohhran Upa atan 31.10.2010-ah nemngheh a ni.

Zirna lamah chuan, Primary School hi Bualte-ah a zova, Middle School Tawipuih a chhonzawm a, chhungkaw harsatna avangin pawl 6 chu kum 1961-ah Private-in a exam a, chhim bialah pakhatna niin a entawntlak hle. Kum 1971-ah BA distinction-ah a pass a, Lunglei College atanga distinction-a pass hmasa ber a ni. Kum 1984-ah MA Guwahati University atangin a zo bawh a ni.

Pu Saitlawma Sailo hi politic-ah a luh hmain kum 1969-1971 chhung khan Jawahar Lal Nehru Memorial Middle School Lunglei-ah Headmaster hna a thawk a, Kum 1972-ah Mizo Union ticket-in South Vanlaiphai Constituency atangin MLA atan thlantlin a ni a, a term kum 5 chhung hian ram leh hnam tan nasa takin hna a thawk a ni. Pu Saitlawma Sailo hian MLA a nih tawh loh hnuin Theiriat Private High School Headmaster ni tura khawtlang hruaitute sawmna chu zahin, March 1978 atanga June 2002 chhung Headmaster hna a thawk leh a. Govt. Higher Secondary School (GHSS) Hnahthial-ah ni 7.6.2002 - 4.9.2005 chhung Principal-in a awm leh a, chumi hnu ah GHSS Lunglei-ah a pension hun kum 2008 thlang Principal hna a thawk leh a ni.

Pu Saitlawma Sailo hi a upat hnuin taksa chak lohna hrang hrangin a tlakbuak ve a. October ni 12, 2021-ah Aizawl Hospital-ah admit a ni a, hetah hian Pneumonia natna hmuh chhuah a ni avangin ICU-ah dah luh a ni. November ni 5, 2021 (Zirtawpni) chawhnu dar 1:45 PM-ah Lalpa hnenah min kal san ta a ni.

A dawt leh ah ka sawi leh duh chu, Pu C. Ramhluna a ni a. A ni hi November ni 22, 2021 (Thawhtan) zan dar 8:45 ah Ebenezer Hospital-ah kum 74 mi niin a boral. Pu C. Ramhluna hi Pu Manglura Chinzah leh Pi Sungthlai-te fa niin, October ni 20, 1947-ah Chawnhu (Lawngtlai District)-ah a piang a, an unau hi mipa 4 leh hmeichhia 6 anni. A nupui Pi Lalrinawmi nen hian fa 5 neiin, mipa 2 leh hmeichhia 3 an nei a. Kum 1994 October-ah Mizoram Baptist Kohhran Central Church-ah Upa atan nemngheh a ni.

Zirna lamah chuan, Primary School hi Diltlang-ah a kal a, Middle School hi Lawngtlaih-ah a kal chhonzawm a, 1970-ah St Anthony's College, Shillong atangin BA (Economic Hons.) a zova, kum 1971 – 1973-ah India Forest College, Dehradun atangin M. Sc (Forestry) a zir zo leh a, 2002-ah Mizoram University atangin LLB a pass a, hemi tum hian Gold Medalist a ni nghe nghe a, a fakawm hle a ni.

Pu C. Ramhluna hi mi inzir mi tak a ni a, kum 1975-ah direct-in Indian Forest Service (IFS)-ah a inziak tling a, Mizo zinga direct-a inziak tling hmasa ber a ni. Sorkar hna a thawh chhungin Mizoram mai bakah Andaman & Nicobar Island, Arunachal Pradesh etc ah te awmin a kaisang chho zel a. Kum 2006 March, ni 20-ah Chief Conservator of Forest (PCCF) ah a kaisang a, he hna a thawh lai hian Special Secretary (Forest Department) to Govt. of Mizoram hna a chelh kawp bawk a ni. Kum 2008 October-ah Voluntary Pension-in Sorkar hna a chawlhsan a. Sorkar hna a chhuahsan hnuin MNF party a zawm a, Kum 2008, 6th Mizoram Legislative Assembly, General Election-ah MNF party ticket-in Lawngtlai West Assembly Constituency atangin MLA atan thlan tlin a ni. Tun Ministry-ah hian a boral ni thlengin Mizoram sorkar hnuaiiah SEDP, Commerce & Industry Development Board-ah Vice Chairman a ni.

Pu C. Ramhluna hian zunthlum leh thisen sang a nei ve a, harsatna em em a thlen ngai lova. Amaherawhchu, 2nd August, 2021-ah a lu a hai deuh avangin office lam atangin hruai haw a ni a, Doctor te an rawn a, in lam leh hospital-ah te enkawl a ni a. Ni 28.10.2021-ah a hma ang bawkin a rawn chauh leh tak avangin Ebenezar Hospital-ah dah luh leh a ni a. Doctor leh nurse ten theih tawpa an enkawl lai mekin, ni 22.11.21 (Thawhtan) zan dar 8:45-ah chatuan ram min pan san ta a ni.

A dawt lehah chuan, Pu Hrangthanga Colney hi ka han sawi leh ang a. Pu Hrangthanga Colney, Ex-Minister hi ni 22.12.21 (Nilaini) zing dar 8:30-ah Zoram Medical College-ah kum 81 mi niin a boral a ni.

Pu Hrangthanga Colney hi Pastor Fehtea leh Pi Kapchhungi-te fa niin, June ni 1, 1940-ah Biate-ah a piang a, an unau hi mipa 5 leh hmeichhia 6 an ni. Pi Lalthlamuani nen February ni 22, 1974-ah Dawrpui biakin-ah an innei a, fapa 5 leh 1 pakhat an nei a ni.

Zirna lamah chuan, Biate leh Sialhawk-ah ME School a zir a, 1960 ah GM High School, Champhai atangin Matric a pass a. Kum 1964-ah St. Anthony's College, Shillong atangin BA a pass leh a. B.A a zawh hnu hian Biate Eastern High School-ah zirtirtu hna a thawk a ni.

Pu Hrangthanga Colney hian kum 7 MNF zawma a rammut hnuin, 1972-ah a lo chhuak a. A lo chhuah hnu hian politics lam luhchilh chho zelin, kum 1973-ah Aizawl District Congress-ah Secretary a ni a, 1979-ah Mizoram Janata Party-ah President-a thlan a ni leh a, 1983-ah Mizo Convention (MC)-ah Vice President a ni leh bawk a. Kum 1993 Mizoram General Election-ah Independent ticket-in Khawbung Constituency atangin MLA atan thlan tlin a ni a. Congress sawrkar nen Coalition Ministry-ah Cabinet Minister niin, Industries, Excise and Taxation Department te hi

hneh takin a enkawl a. Minister a nih lai hian Central Sawrkar atangin chawimawina award, ‘Indira Gandhi Priyadarshini Award’ leh ‘ Millennium Achiever Award’ te hlan a ni.

Pu Hrangthanga Colney hi November ni 18, 2021-ah a nawmlh deuh avangin Ebenezer Hospital-ah admit a ni a. December ni 11-ah covid a lo kai ve tih hriat a ni a. Hemi ni vek hian in lama hawpui a ni a, a tuk December ni 12, 2021-ah ZMC lama inenkawl turin hruai phei a ni a, ni 21 ah Embolic Stroke a nei a, doctor leh nurse ten theihtawp chhuaha an enkawl lai mekin, ni 22.12.2021 (Nilaini) zing dar 8:30 ah chatuan ram min pansan ta a ni.

Pu Speaker, heng kan MLA lo ni tawh thin, a thente chu Minister pawh lo ni tawh thin, mi uihawm, mi chhuanawm, mi entawn tlak tak tak te kan han chan ta hi paw kan ti em em a, thinlung tak takin kan sun a ni tikhka ka sawi duh a ni e.

SPEAKER : Kan House Leader-in sunna a rawn sawi a, sawi duh dang kan awm em? Dr. R. Lalthangliana, hon. Minister i lo sawm ang.

DR. R. LALTHANGLIANA, MINISTER: Pu Speaker, a hmasa berin he House-ah pawh lo thu tawh, ram ang te, khawtlang ang te leh kohhran ang tea mi pawimawh, mi uihawm tak tak mi pathum kan han sun ta mai hi a hrehawm khawp mai a.

Pu C. Ramhluna hi Commerce and Industries changtu ka nihna angin, kan Chief Minister zahawm tak hian Vice Chairman-ah, nichin a kan ngaihthlak tak ang khan dah a ni a. A rintlak zia hi ka sawi duh a.

Thil tam tak ngaihtuah mi a ni a. Working Group te kan han din a, chutah pawh chuan a rintlak em em mai a, a thiltih hi a felfai tha a ni. Tin, kan ngaihthlak tak ang Mizo zinga IFS direct-a tling hmasa ber anih piah lamah tun term hmasa lam 2003-2008 inkara Forest PCCF lo ni tawh a ni. State sawrkar-ah phei chuan Forest Secretary a ni hmasa berin ka hria a, ka sawi sual mai thei a. a rintlak thlawt a ni tih hi ka tarlang duh a.

Tin, chu mai chu a ni lova. A hunlai khan theihtawpin tan kan la dun a, Forest Minister ka nih lai khan. Ka la hre reng a, State Matching Share sang tak mai thin, State sorkarin 25% an tum tawh ang a, Central in 75% tih angah pawh khan kan han bei dun a, North-east Minister hote kan han kokhawm a, agenda kan siam tir a, note hi a siamthiam em em mai a, hei hi a danglamna niin ka hria, saptawng a thiam baw a. Thil tam takah tiang khan kan lo chhawr thin a ni tih kha ka tarlang duh a. Tichuan, a hnu

lawkah pawh khan ‘matching share’ kan tih ang chiah pawh khan 90/10 in ti hian a kal chho ta zel a. A lawmawm ka ti khawp mai a, a sulhnu ve tak tak a ni.

Tin, ‘Forest Village’ kan ti mai a, kha kha engtin emaw kan sual chhuak a. Khaw tam tak kha Forest Village tih a ni a, a hmalakna in field te kan lai a, mual kan lai a, community hall te kan sa a, wildlife leh environment protect atan thil tam tak sulhnu, a hruaina hnuaiyah kan nei a, a lawmawm khawpin ka hria a. Vawiinah hian khang kha ka ngaihtuahnaah a awm a ni tih kha ka sawi duh a.

Tin, a rilru a tluang a, thil a chik bawk a, a hre rei bawk a, hei hi a quality pawimawh tak a ni tih kha ka sawi duh a. Mi te leh harsa ber pawh hi a ngaihsak em em mai a, chutiang mi chu Pu C. Ramhluna hi a ni.

Lawngtlai West-ah a thlan tlin anih khan vote a hmu tha khawp mai a, vote sang chuang ni tain ka hria, a tlinna kha. Khatih hunlai khan kei Lunglei lamah ka tling a, tin, Pu B. Lalthlengliana kha Khawbung lamah a tling bawk a. Kan pathumin he Houseah hian kan awm a, kan tlem si a. Thil tam tak tihtur awmah khan Pu Thlenga nen khan thil tihtur kan tuk nasa em em thin a ni.

Thil dang lehah chuan, a bial Lawngtlai West hi Mizoram-ah chuan khaw tam ber a ni mai awm mang e aw ka ti a, ka sawi sual mai thei a, khaw 68/69 a awm a, rin ai khan bial fan kha a khirh a, ‘fang chhuak tur chuan thla hnih a ngai’ a ti thin a. Vawi engzat nge a fan ka hre lova, mi tam takin kan tlin loh tur kha hneh takin a ti thin a ni, tih kha vawiinah hian ka tarlang chak hrim hrim a ni.

Tin, kohhranah Baptist kohhran Upa a ni a, nihna pawimawh leh mawhphurhna pawimawh tak tak, amahin a duh vang pawh ni lovin hnawn luih a ni thin a. Bialah te Chairman a ni a, tualchhungah te. Khatianga mi tangkai tak a ni hrim hrim a ni tikhka ka tarlang duh bawk a.

Tichuan, Pu Hrangthanga Colney vawiinah hian kan sun bawk a. A ni hi tawi tea ka sawi duh chu, term hnih ‘YMCA’ kan tih, Young Mens Christian Association-ah hian President-in tunhma khan a awm thin a. Hei tunah ka awm ve leh a, a ni hi mi rintlak a ni. Committee a ngaipawimawh khawp a, amah tak pawh hi YMCA, Aizawl-ah hian President-in term khat a awm a, term khat Vice President-in a awm bawk a. Mi rintlak em em a ni a, a upat hnu thleng pawhin committee-a tel loh a nei mang lo a ni. Chutiang khawpa mi rintlak, YMCA-a a nih thu hi ka tarlang duh bawk a.

Tin, kan hre deuh vekin ka ring a, amah hi inchei smart tak mai hi a ni a, an unau hian an ni deuh vek em tih ka hre lova, faina lamah hian smart tak mai, mi invawng fel

tak mai a ni. Chuvang chuan, YMCA min han hruai lai pawhin uluk tak maia thil ngaihtuah mi a ni tih vawiin a hun tawpah hian kan tarlang duh a ni.

Hei, Pu Saitlawma Sailo hi sawlam khaw khat deuh te kan ni a. Theiriat khua a ni a, chhim lamah chuan kan zirtirtu zingah amah hrelo hi kan awm ka ring lo. Nichina kan ngaihthlak ang khan, Headmaster a lo ni a, zirtirtu hlun, mi taima tak mai a ni. Chuvang chuan MLA a nih pawh khan a ngaih pawimawh em em mai nia ka hriat chu *Zirna* hi a ni. Chhim lam hi a bikin zirna lamah kan la hnufual a, khang hun lai khan sawlaiah Pa bera kan neih a ni. Tin, kan lehkhathiam hmasa khatih hunlai khan a ni a, tunah chuan thiamna sang tak tak neite pawh kan awm tawh a. Chutih lai erawh chuan kan mi hmasa, thiamna lamah pawh a lo ni a, chhim lam mipuite hian a bik takin kan ui ngawih ngawih a ni tih te pawh hi kan han tarlang duh a. Tin, a rintlak a, a rinawm bawk a. a belh tlak bawk a, chutiang ang mi chu a ni. MLA a nihna zawn mai nilovin kawng tamtak, NGO bakah khawtlang thil tamtak ngaihtuahna kawngah a sulsutu, kan thluak neih that berte zinga mi a ni.

Chuvang chuan, vawiina mi hlu tak tak pathum, Pu C. Ramhluna, Ex-MLA, Pu Hrangthanga Colney, kan Ex-Minister leh Pu Saitlawma Sailo, Ex-MLA te hi an uihawm hle mai a, he House-a anmahni uina thu, Pu Speaker, he House kaltlanga vawiina kan neih hi remchanga lain, an chanchin ka hriat ang angte a tlangpui kan sawi ve a ni. Anni pathum ina an kalsan tak an chungte Lalpa'n awmpuiin kaihruai zel sela tih hi kan tawngtaina a ni. Ka lawm e.

SPEAKER : Member zahawm tak Dr. K. Pachhunga ka sawm e.

DR. K. PACHHUNGA : Pu Speaker, ka lawm e. Hei, vawiinah Pu Saitlawma Sailo, Pu C. Ramhluna leh Pu Hrangthanga Colney te sunna hun kan nei a, a paw ka ti a. Pu Saitlawma Sailo hi Theiriat khua, Lunglei South bial ami a ni a. Ani hi, nichina kan ngaihthlak tawh ang khan education lama mi hming tha a ni a, zirna lamah a tui em em bawk a. A fate nen sikul te dinin mi chhumchhia kan tih, mi harsa fee pek tur neilote pawh an enkawl puitling a. Chutiingin politics-ah ka mimal tak pawha ka rawn luh dawnin min zirtirtu a ni a, ka lakah a tha em em a ni. Amah hi English leh Mathematics thiam tak a ni a. Tin, mi tha, mi ngil a ni a, kan ui takzet a, kan bial pawhin kan ui a, chhim lam pawhin kan ui a, mimal tak pawhin ka ui a ni. Tin, a chanchin ziahnaah chuan Demagiri (Tlabung) hming hi MLA anih laia a phuah a ni tih kha ka sawi tel duh a.

Tin, Pu Ramhluna, kan hria a, College kan kal laia kan rawngbawltu leh kan Upa a ni a, mithiam leh Officer lian te a niin kan ngaisang thin em em a. Tin, a neilawm a, a zaidam a, a tha em em a, ani hi Pathian leh kohhrana inngat tlat mi a ni. An tlangval

lai Shillong-a an awm lain, “A hmangaihna faktute” tiin male voice an din a, chutiingin Politics-ah MLA lo niin kan inkawm fova, a bula awm a nuam a, alakah zirtur tamtak a awm a, a uihawm takzet a ni.

Tin, Pu Hrangthanga Colney hi kan hriat angin a hun, a that lai hun ramhnuaiiah, Mizoram leh hnam tana inpein hun khirh leh harsate a lo paltlang tawh a. Tin, ram hruaina lamah Minister hial niin, kan lo chan ta hi pawl ka ti takzet a. An pathum hian ka ui takzet a ni tih hi ka sawi theih ni se. Pu Speaker, ka lawm e.

SPEAKER : Pu H. Biakzaua, Member zahawm tak ka sawm e. *Zawhna & Chhanna* hun kha a la ve zel tih kha kan hre dawn nia.

PU H. BIAKZAUA : Pu Speaker, ka lawm e. Mizoram rorelna khawla lo awm tawh mi pawimawh tak tak, Pu Saitlawma Sailo, Ex-MLA Pu C.Ramhluna, Ex-MLA leh Pu Hrangthanga Colney, Ex-Minister te vawiina sunna hun kan hmang ta mai hi pawl ka ti a. Heng kan sun takte hi mi ropui tak tak an niin ka hria a, an chanchin kan ngaihthla nual tawh a, Pu C. Ramhluna chanchin bik hi tawite a han tarlan ka duh a.

Pu Speaker, kan ngaihthlak tak ang khan Pu C. Ramhluna hi Chawnhu khaw chhuak a ni a, Chawnhu chu Lawngtlai bul, thingtlang khaw te reuh te a ni a. Diltlang, Lawngtlai leh Aizawl-ah te sikul a kal thu kan hria a, thingtlang hmun kilkhawr taka tang pawh hian miropui tak an lo chhuak thei a ni tih Pu Ramhluna zirna kawng zawh atang hian a lang thei niin ka hria.

Pu Ramhluna hi pa entawntlak tak, zirna kawngah a ni bik lehzualin ka hria a. Nichina kan ngaihthlakah pawh khan ‘ber’ nihna a zir laiin a nei thin a. Tin, IFS anih pawh khan Mizo zingah ‘ber’ nihna alo hauh leh a. Tin, PCCF alo kai chhoh pawh khan mizo zingah ‘ber’ nihna a hauh leh a ni. Chutiang chuan a zirna kawngah leh sorkar hna a thawh chhungin mi chhuanawm leh mithiam, mi tumruh, thil tihtawhnaa hlawhtlin ngei ngei tum mi niin ka hria a. Vawiina a chanchin kan ngaihthlak te kha hun a tawi avangin kimchang deuha ngaihthlak tur leh a chanchin sawi tur thui tak a awm niin ka hria.

Tichuan, Mizoram MLA Constituency kan neih zingah Lawngtlai west hi vote tamna leh khaw tamna ber a ni a, chuta tangin hneh taka MNF Party-a thlantlin a ni thei kha a chhuanawmin a fakawm hlein ka hria. MLA anih chhungin mirethei hmangaihna leh, hmeithai leh fahrahte hmangaihna lam hi ka hnenah pawh a sawi ve thin a ni a, MLA opposition a nih lai khan a bial chhunga MLA fund hman chungchangah pawh khatiang lam ngaih pawimawh duhna thinlung nei tlat mi a ni. Tin, pa kawm nuam leh pa titi thiam tak a ni baw. Tin, LLB lai a ni a, Dan leh sorkar kalphung a hre em em a,

a bula kan awm hian zir tur tam tak kan nei thin a ni. Party a nih tawhnaah rinawm leh chhel taka hma laa theihtawp chhuah mi a ni tih kha ka hriat ve chinah pawh a takin a nun atanga zir tur leh entawn tur tam tak a awm thin niin ka hria. Vawiina kan sun ta hi a lungchhiat thlakin a uihawm ka ti a.

Heng, mi pawimawh tak tak kan sunte, an chhungkua, an fanaute Pathian-in awmpui se, thlamuan se. Mi ropui tak tak, chhungkua atanga min han kalsan hian kan rilru leh kan ngaihtuahnate a baihvai thin a. Chuvangin, an chhungkuate pawh Pathian-in thlamuan hlawm zel se tiin duhsakna ka hlan a ni. Ka lawm e.

SPEAKER : Dr. Z R Thiamsanga, Member zahawm tak ilo sawm ang.

DR. ZR. THIAM SANGA : Pu Speaker, ka lawm e. Hei, vawiinah hian kan ram leh hnam, khawtlang leh kohhran-a kan rawngbawltu pawimawh tak tak pathum he House zahawm tak chhungah kan han sun ta mai hi a lungchhiatthlak hle a. Kan house Leader zahawm tak khan a chanchin tlangpui a rawn sawi tawh a, kha lampang kha chu ka rawn sawi tawh dawn lova.

Vawiinah hian, he rorelna chhung zahawm taka an hun leh tha tam tak lo seng tawhte Pu Saitlawma Sailo, Pu C. Ramhluna leh Pu Hrangthanga Colney te kan sun a, an uihawmin a khawhar thlak hle mai a.

Tichuan, Pu Saitlawma Sailo chanchin kha kan ngaithla a, a chanchin atang khan keini helaiah rawn thu ve ek ek tan chuan zir tur tam tak kan nei a. Tin, Pu C. Ramhluna chanchin kan la sawichhuah loh chu, Forest Departmen-a a thawh chhungin a thawhpui tena an sawi, vawiin thlenga ka rilrua cham reng chu, “Practical, Real Forester a ni” an ti a ni. Chumi awmzia chu, “field-a hnathawk chi, thil reng reng a hmuna enfiah duh mi a ni” an ti a. A pawimawh khawp mai a, hnathawhnaa ‘Real Forester’ tih chin hi chu an ngaihsanawm a. Tin, Plantation-ah pawh Spot verification ti thlap thlap thin mi a ni.

Pathumnaah chuan, kan la sawi lo a; Pu Ramhluna hi sum leh pai a hminghliauna nei lo a ni a, kha kha entawhtlak a nihnaa pawimawh tak a ni. A bak erawh chu ka sawi tawh lo mai ang a, kan ngaithla tawh a.

Hei, Pu Hrangthanga Colney hi kan hria a, pa hmeltha, pa zaidam, pa rilru tluang tak leh mi pawisawi ngai lo a ni tih kan hria a. Tin, a entawntlakna em em chu, naupang tet atanga zuk leh hmuama insum mi, ti ngai lo a nihna hi a entawntlak hlein ka hria. Tin, chhungkua ngaipawimawh mi a ni a, chhungkua a enkawlina kawngah pawh a fate

pawh tumah ngaihtuahawm lovin mahni tawkah intodelh vek niin, pa entawntlak a nihzia hi a tilang chiang hle a ni.

Tichuan, an pathum hian he ram leh hnam, he rorel khawla an inpeknaa an thawhna mai nilovin, khawtlang leh kohhran-ah te mi inpe tak tak an nih kha kan hria a. Vawiinah kan sun ta mai hi a lungchhiatthlak a, kan ramin a hlohna sa hle a ni. An kalsan tak an chhungte zawng zawng Pathian-in vengin kaihruai se tih hi kan tawngtaina a ni e. Ka lawm e.

SPEAKER : Deputy Chief Minister zahawm tak Pu Tawnluia ka sawm e.

PU TAWNLUIA, DEPUTY. CHIEF MINISTER: Pu Speaker, vawiinah he House-a member zahawm tak lo ni tawh thin mi pathumte sunna kan nei hi an phu hlein ka hria a. Pu Speaker, he hun i han buatsaih hi a lawmawm ka ti a.

A hmasain, Pu Saitlawma Sailo kha mi lehkha thiam thei, mi inngaitlawm, zirna ngaisang mi a ni tih kan hria a, a damchhung kum 38 zet sikul hrang hrangah thawkin Zoram mipui leh kan thalaite chhernaah mi tangkai a ni tih kan hria a ni. Chubakah, mipui rawngbawlinaah North Vanlaiphai bial atangin term khat MLA alo ni tawh a, amahah khan Zoram mipui ten chhuan tur tam tak kan hmu thei a ni tih kha ka sawi duh baw a ni.

Tin, a dawt lehah chuan Pu C. Ramhluna chanchin hi tawi tein ka sawi duh a. Amahah hian ka hmuh chu hei ‘personal integrity’ kan tih, midangte nena thawhhona leh inthurualna kawnga mi dik leh mi rinawm tak niin ka hria a. A lehkha zirna lam chu kan ngaithla tawh a, leh lamah chuan hetiang mi leh senior officer-a pension ni mahsela, a bial Lawngtlai West a an enkawl chhung khan, sawlaia ‘hnam te zawk’ kan tih kan unaute sawn an bawm nasa em em a ni tih kha ka hrechiang ve a, “Pu Ramhluna hi a lo va chhuanawm em, miretheite a lova ngaihsak tak em! tih hi ka rilruah hian a riak ve tlat a ni. A bial te khan an fak a, chutiang taka mi duhawm chu kan chan ta a. Sorkar tan pawh kum 33 zet awmin, Mizo IFS zingah chuan a thleng sang hmasa a lo nipha te hi a chhuanawm tak zet zet a ni.

Tin, Pu Speaker, Pu Hrangthanga Colney hi Champhai High School-a pawh 7 kan zirin pawl 10 a ni a. Chutiang chuan zirlai zingah pawh mi han huaihawt thiam leh nungchang tha a ni a. Tin zuk leh hmuam lamah a fihlim a, zai a thiam a, solfa a thiam baw a. Zirlai hote Biakina hlamawi saa zaipawlte pawh min kaihruaitu thintu a ni.

Chu mai bakah Champhai-ah High School-a a zir lai chuan thingtlang zirlai YMA kan ti a, hmundangah an tihve ka hre lo, chutah chuan President niin min uaplum thin tu a ni. Chumi hnu lamah chuan Shillong-ah lehkha zirin a graduate a, an khua Biate-ah High School zirtirtu niin kum 1966-ah Mizoram-in zalenna puangin ram leh hnam Zalenna sualin kum sarih zet a rammu a ni tih kan hmu a. Amah mai ni lovin a u Pu Malsawma Colney leh Pu Lawmthanga Colney te nen an pathumin an rammu a ni. Chutiang khawpa an chhungkuaa ram leh hnam hmangaihtu, ram leh hnam tana inpumpek mi an ni tih kha vawiinah hian ka tarlang duh a. Mizoram Sorkarah khan a ni hi MP a ni a, chutiang chuan kan sulsutute zinga mi a ni. Vawiinah hian chu chu sawi chhuah loh theihloh niin ka hria a. Tichuan, a lo hawn hnuah ka han hmu a, Minister niin bial enkawl neinin khatiang khan mipuite tan a thawk a ni.

Vawiin niah hian kan zinga a awm ta lo hi a uihawm ka ti a. Tichuan, an ni pathumte, an chhungte theuh pawh vawiinah hian kan tuarpuina thu, Pathian-in an nitin mamawh leh tulte pein a kaihhruai zel hi kan duhsakna kan hlan bawk a ni e. Ka lawm e.

SPEAKER : Awle, kan mi zahawm leh kan mi uiawm tak takte chhungte helai hmunah hian an awm a, an nupui fanau, tu leh fate leh thenrual thate, tin, TV atangin min lo thlir bawk a ni. Awle, he House a lo awm tawh thin kan member zahawm tak takte - Pu Saitlawma Sailo, Pu C. Ramhluna leh Pu Hrangthanga Colney te sun nan ngawi rengin i lo ding ang u. (*Memberte minute 1 ngawi rengin an ding a.*)

I lo thu ang ule. Tunah chuan *Zawhna leh Chhanna*, Starred Question No. 1 zawt turin Pu Lalduhoma a awm lova, hei hi inthlahrung tak chungin advantage lak ka duh a.

Ram tana tha tura an hnathawhna tunah memberte'n an chhuahsan a, an zahawm khawp mai. Ni e, ka bial hlui a ni a, ka hun lai khan ka vannei a, PWD te nen kan thawkho tha a, vantlang kawng laihna tur kawng sial te, pavement te, Riangtlei kawng laihtharna tur te, Tlangpui panna te, Tlangpui atanga Khawllailung panna tur te, Khawhai atanga Lungtan kawng tihthatna tur te, Khawzawl atanga Hmuncheng, Khawzawl atanga Tualpui, Khawzawl atanga Ngaizawl, Khawzawl atanga Neihdawn te kha ka nawr chhuak ve a, ka lawm khawp a, a vaiin vaibelchhe 82 chuang niin an chhut a. Tichuan, ka bialte khan, “pakhatmah kan thawh ve loh chuan, min pui the” an ti a, ka nawrpui ve ngei mai. Tin, member zahawm takte hnena ka sawi duh chu, “Pathian khawngaihna mi pawisa naia khat mah ka la lo” tih hi ka sawi duh a ni.

Tin, Lungtan leh Khawhai kha ka khua a ni a, khilai kawng Ngaizawl pawh khi a hmunah ngei opposition te hi han kal se ka duh khawp mai. Kawng thatna turin kan

thawk tlang ang a, kan CM zahawm tak pawh ka ngen a. Lungtan leh Khawhai inkar khi an thawh percentage (work done) tunah khian Ngaizawl leh Khawhai inkar aiin a chhe zawk a ni. Chungte chu ka pianna khuate a nih avangin thahnemngai takin opposition group thenkhatte kha kan support a nih chu.

Hei BJP te an chhuak ve lova, a lawmawm hle mai. Tichuan, Pu Duhoma hian zawttu tur midang a tih loh avangin kan kal zel ang a. Starred Question No. 2, Pu C. Ngunlianchunga a awm lo bawk a, midang zawt turin a pek loh avangin kan kal leh ang a. Tunah Starred Question No. 3 zawt turin, member zahawm tak pahnihin an zawt a, Dr. K. Pachhunga leh Pu Zothantluanga te an ni a, a ziah hmasak ang hian member zahawm tak Dr. K. Pachhunga zawt turin ka sawm e.

DR. K. PACHHUNGA : Pu Speaker, ka lawm e. Hei, nichina i sawi ang deuh khan kan zawt hmanlo turah ka ngai deuh a, mahse eng emaw video siam vel mai mai kha kan buaipui a, khati anih chuan video voice call emaw, audio siamchawp vel mai mai kha kan buaipui chuan House-ah hian thu tur kan awmlo ang tih a hlauhawm khawp mai tih kha kan sawi duh a.

Ka zawhna Starred Question No. 3, Hon. Minister for Land Resources, Soil & Water Conservation Department chhan atana ka zawhna te chu –

- a) Rubber plantation hi siam thar tumna a awm em?
- b) Rubber Board of India hi Zoram tan tangkaina a awm em?
- c) Tun aia tha/hlawk zawka a chingtu ten an hralh tawhna tur hian hmalakna Rubber Board of India hian a nei em?
- d) Rubber hi 1 Ha hmunah kung engzat nge chin theih a nih?
- e) A hnai hi Kg 1 cheng engzatin nge hralh a nih?
- f) Chin pun zel tumna a awm em?
- g) Tun dinhmunah Mizoram pumah rubber kung puitling hnai theih tawh engzat nge awm tawh?
- h) Rubber puitling tawh hnai mai turte tan sorkarin ruahmanna a nei em?

Ka lawm e.

SPEAKER : Chhang turin a changtu Minister zahawm tak Pu R. Lalzirliana i lo sawm ang.

PU R. LALZIRLIANA, MINISTER: Pu Speaker, ka lawm e. Member zahawm takte Dr. K. Pachhunga leh Pu Zothantluanga te zawhna chhanna, a tam deuha a chhanna ringawt hi chu a chianglo thei a, an zawhna nen ka han chhang kawp ang e.

- a) Awm e.

- b) Awm e, Rubber Board of India hian rubber chingtute tan a thlawnin a chi/tiak an pe thei a, subsidy thlengin an ngaihtuah pui thei a ni.
- c) Mizoram Rubber Board of India hnuaiah company pakhat Manimalyar Company awm tir tura hmalak mek a ni. He company hi a awm theih chuan man man zawkin
Rubber hi an lei thei dawn a ni.
- d) 1 Ha ah Rubber kung 500 a chin theih
- e) A hnai hi ₹145/Kg vela hralh thin a ani.
- f) Awm e.
- g) Tun dinhmunah Mizoram pumah Rubber kung puitling hnai theih 2,00,000 nos. vel a awm tawh a ni.
- h) Rubber Smoke House 50 sak tum a ni.

SPEAKER : Zawhna zawt turin a zawhna neitu zinga mi tho, member zahawm tak Pu Zothantluanga ka sawm e.

PU ZOTHANTLUANGA: Pu Speaker ka lawm e. Rubber hi keipawhin khawthlang lamah khuan ka ching ve a, Pu Speaker, hautak ve angreng deuh mai a ni a.

Hei, smoke house hi 50 siam tumna a awm a, a lawmawm hle a, rubber huan zau deuh neih khan smoke house pakhatah khan a tih theih lova, a hautak angreng viau mai a, rubber huan siam hi. Chuvang chuan labour stage a hnathawktute awmna tur in sak a ngai a. Tin, a rubber process-na In a hranpa a ngai a, machine kan dah a, plate-ah dah a ngai a, A In a zau chuan plate tam tak dah theih a ni. Chuvang chuan, a process-na building pawh kha lian ve deuh hlek a ngai a ni.

Tin, tui a neih avangin a tui luankawr tur kha siam a ngai a, a tui hi a rimchhe bawk a; chuvang chuan kan sorkar hian hei aia nasa zawk hian khang a In sakna turte emaw, a process-na building chhuat kha concrete te a ngai ve a ni. Khatiang tih belh theihna tur kha kan sorkar hian hma min lak sak thei ang em?

Tin, 2012-2013 vel khan kan ching tan a, a tha khawp mai a, rubber chin hi. Amaherawhchu, thing duap anih avangin a tliak duh deuh tih a ni mai a. Chutih thu loah chuan kan chin tirh khan kg ah ₹80.00 velin kan hralh a. Kar hmasa khan Kanhmun-ah ka zuk kal a, kan sawr zawh ang ang kg-ah ₹150.00 in kan hralh thei ta a ni. Kan chin tirh let deuhthaw kha anih tawh avangin a ching tur pawh an intihhmuh a, nasa zawka thingtlang lam hnathawktu ten an tih theihna tur atana ruahmanna siam belh emaw, a chi supply lam te emaw tihbelh theih dan hi a la awm zel em tih kha ka zawh belhna a ni e.

SPEAKER : *Zawhbelhna* zawt turin member zahawm tak mai Pu BD Chakma ka sawm e.

PU B.D. CHAKMA : Pu Speaker ka lawm e. Ka zawh belhna chu - Rubber sheet farmers te tharchhuah phai lamah hralh theih lo ta se, Mizoram-in an lei thei dawn em, An lei theih chuan, minimum support price engzat nge ni ang tih a ni e.

SPEAKER : A theih ang anga chhang turin a changtu Minister Pu R. Lalzirliana ka sawm e.

PU R. LALZIRLIANA, MINISTER: Pu Speaker, zawh belh tute, member zahawm tak Pu Zothantluanga khan rubber hmun nei zau deuh te tan chuan smoke house hi a tawk lovang a ti a, a dik ka ring a. Amaherawhchu, sorkar a inngat kher lovin smoke house pakhat ring zo lo tan chuan mahnia tih mai kha a tha khawp mai a. A building kha a lian lem lova, a hnaina han tih len deuh kha a ni mai a, a khawl a lian lem lova, mei han chhema han tihna deuh mai kha a ni a, kei aiin a hre zawkin ka ring a. Chuvangin, sorkar tanpuina kan nghah hian kan hlawhtling lo zawk fo thin a, mahni kea ding thei turin hei hi sorkarin rubber pawh hi a chin tir zel dawn a ni tih ka sawi duh a.

Tin, sorkarin a theih ang tawkin NABARD loan atang te leh kan hotuten he thil hi a tha tih an hria a, SEDP lam atang pawh hian kan hmuh belh zel pawh kan inbeisei a ni. Chu chu ka chhanna a ni mai se.

Member zahawm tak Dr. B.D. Chakma zawhna kha, Rubber process hnuah a hnai hi central-in lei thei lo ta se Mizoram-in a lei thei ang em tih te leh, support price engzat nge a pek dawn tih kha a ni a. Hei central sorkar a awm chhung hi chuan a lei theih loh hi kan ring lem lova, tunah hian anmahniin nasa taka ching turin min duh zawk a, chutiang tur chuan sawihona pawh kan nei tawh nghe nghe a ni. Chuvangin, support price lampang kha kan la sawi lova, ngaihtuahna pawh a la awm lo; phai lamin an lei theih zel hi kan ring a. Tunhmain Tripura leh hmundangah te kan zuk hralh thin a, amaherawhchu, tunah chuan kan ramah ngei an rawn lei tawh a. Tin, helaiah Rubber Board of India office kan han siam sak a, Aizawl khawpuia lo chuang chhuak ve turin kan ti a, an lokal a an phur em em a ni tih kha ka chhanna a ni e.

SPEAKER : *Zawhna leh Chhanna-ah* kan kal zui ang a. Starred Question No. 4 zawt tu Pu Zodintluanga Ralte hi a awm lova, midang zawt turin a ti che u em? A tih loh chuan, a dawtah kan kal leh ang a. Pu Zothantluanga, Member zahawm tak Starred Question No. 5 zawt turin ka sawm e.

PU ZOTHANTLUANGA : Pu Speaker, ka lawm e. Ka zawhna, Fisheries Department Minister zahawm tak chhan atan –

Mizoram-ah hian Sangha chi thar chhuah a ni ve em?

SPEAKER : Chhang turin a changtu Minister zahawm tak Pu K. Lalrinliana ka sawm e.

PU K. LALRINLIANA, MINISTER: Pu Speaker, ka lawm e. Member zahawm tak Pu Zothantluanga zawhna chhanna chu –

Mizoramah hian Sangha chi tharchhuah ve a ni a, kum 2020-2021 chhung khan nuai 90 chuang thar chhuak ve anga chhut a ni e.

SPEAKER : *Zawhbelhna*, Dr. BD Chakma ka sawm e.

PU B.D. CHAKMA : Pu Speaker, ka lawm e. Ka zawhbelhna chu - Kolasib District hnuaiah Chakai farm kha engnge a hlawhtlinna? Chakai hi an la zuar em?

SPEAKER : Member zahawm tak Pu Lalrinsanga Ralte zawt turin ka sawm e.

PU LALRINSANGA RALTE: Pu Speaker, ka lawm e. Kan member zahawm tak Pu BD Chakma zawhna kha ka zawh tum tho a ni a. Pu Speaker, tunlai hian social media-ah hian thil hrang hrang hi a lar khawp mai a. Chakai farm chungchang pawh hmuh tur a tam khawp mai a. Tunah hian Zoram mipuite hian thudik tak hriat hi an phuina ka hria a. Chakai farm chungchang an han sawi a, Chakai pakhat man ₹9000/- dawn dawn tein chhut a ni a, helaiah hian kan Minister hian kan Chakai farm dinhmun chiah hi min sawifiah sak se tih kha ka zawhna a ni e.

SPEAKER : Member zahawm tak Pu Zothantluanga kn sawm e.

PU ZOTHANTLUANGA : Pu Speaker, ka lawm e. (**Speaker:** Ngawi rawh aw. Zawhna leh chhanna hun a tawp chiah a, kan zawh tir anga kan chhan zawh tir law law mai dawn em? Awle, zawt rawh le)

Pu Speaker, ka zawh belhna chu – Mizoramah hian Sanghaa eizawng kan tam ta viau a. Sangha khawi hlawhtlin leh hlawhtlin lohna ni bera ka hriat chu, Sangha chi dik khawi leh khawi loh hi a ni a. Kan Sangha chi hi a inang lo em em a. Hei, khawthlangah khuan kum khat lek Sangha chinga hlawhtling tak tak an awm laiin, thenkhat chu kum 2, kum 3 an dah hnuaiah pawh lian thei reng reng lo sangha chi hmuh tur tam tak a awm

a. Chuvang chuan, sangha chi-ah hian a aia fimkhur zawkin, a tam zawk tharchhuah theih nan Minister-in a chi an siam ve tih min hrilh a, a lawmawm a. Tuikhuah neitu, sangha khawitu ten a an mamawh ber chu, a tuikhuah nei mah sela, sangha chi an neih loh avangin kum tin an dah thei lova, miin an dah hawh thin a ni. Chuvang chuan, tlawm zawka, a subsidy emaw, a thlawn emawa Fisheries Deptt. hian kan hnathawktute hnenah hian a thlawnin emaw, a subsidy in min pe zel thei ang em tih hi ka zawhbelhna a ni e.

SPEAKER : Awle, theih ang anga chhang turin kan Minister zahawm tak Pu K. Lalrinliana kan sawm e.

PU K. LALRINLIANA, MINISTER: Pu Speaker, ka lawm e. Member zahawm tak Pu B.D. Chakma zawhna, Chakai farm chungchang ti tawp ila, Pu B.D. Chakma khan “Chakai in la zuar em” a tih kha, “Kan la zuar lo” tih kha ka chhanna ni se. Tunah hian a farm hi kan la buaipui mek a, kan la zo lova, a tuikhuah han siam te leh thil dang dang han siam hi kan la zo lova, Construction kal lai mek a ni a.

Tin, Pu Lalrinsanga Ralte nena an zawhna kha a inang tho bawk a. Tunlai social media-ah hian Pu Speaker, i rem tihnain, social media-ah hian ‘David Sailo’ tih te a awm a, leh mi dang dang, hei, a copy pawh ka screen shot a kan print out a. Anmahni pawh zawn chhuah hleih theih loh, tunge annih tih pawh hriat loh hian social media-ah pawh dawtin “Chakai farm hi nuaih 547 estimate cost a ni a, chakai man pawh han chhut ila, pakhat man cheng 9000”, tih ten a rawn tichhuak a, mi dang dang pawhin an rawn ti a ni. “Chakai man to”, te an han ti a, a hralh pawh kan la hralh chhuak lo hrim hrim a. Chu chu wawinah Pu Speaker, sawi kha i phal lo nain i chungchang thu an han tih te nen khan ka han ngaihtuah thin a, hetiang titute hi deptt. a kan Secretary te, kan Director te nen kan han sawi hova, “FIR thehlut ila i man chhuak teh ang u”, kan han ti a, amah hi kan hrechhuak thei si lova, tuna kan ngaihtuah lai mek a ni.

Chakai Farm hi nikum hmasa lam atang tawhin, Mizo hian eitur kan neih ang ang kan ramchhunga mite ei ila, chumi atan chuan kan ei than, in tin deuh thawina kan duh Chakai te hi khawi lian ila, a thianghlim zawkin, lui dung sa a duh duh, a tawp hnawk ei lova thianghlim zawka khawi chhuah a, thar chhuah theih dan a awm lawm ni tih hi kan Chief Minister ngaihdan pawh a ni. Enchhin turin farm pakhatin DPR a siam a, kan han en a, “Deptt. in zir Chiang teh u, kan zir Chian theih chuan pawisa pawh hi dil teh ang”, kan han ti a, kan dil a, tiang hian cheng nuai 57 min pe a ni.

Pawisa SEDP atanga min pek pawh cheng nuai 57 a nih laia, nuai 500 chuang anga mipuia social media hmanga dawt an theh darh vak mai hi a tha lo a, a *like* tu pawh mi 200 an chuang a, pawisa tak a ni. Khatiang anih avangin wawinah hian Zoram mipuite pawhin kan hriat nawn leh pawh a tulin ka hria a. Tin, Departmental work-a

thawh min phalsak a, Finance lamin. Chutah chuan, contractor profit min han cut sak leh a cheng nuai 52,97,000-in a project kha thawk turin min ti a. Tichuan, a chakai khawina tur pond 3 kan siam a, chakai ina a hreuh tlang theihloh turin RCC slab, brick wall-in. Tin, kan ramah chakai khawi kan tum a, aifiar te, aikam te kha khawi tur a ni a, a DPR-ah pawh. Chakai chu aiawtah a tla a, a chaw kan dah chuan an ei tha a, an thau em em thin a, inah pawh kan hawn a, kan khawi a, thau tak takin kan khawi nung thei a, kar khat, kar hnih pawh kan khawi nung thei a ni. Chuvang chuan, a pond kan han siam chhungah khan han khawi chhin ta ila, a inthlah pung thei em, no a nei thei em, tih ang zawng hian vawiinah hian kalpui kan tum a.

Tunah hian cheng nuai 52,97,000 pawisa kan neih atangin cheng nuai 36,97,000 kan hman tawh a, a bak cheng nuai 20 lai hi hman lohin a project kan la zawh loh avangin kan la dah a ni a. Chutih laia, “Chakai pakhat man cheng 9000” tia, mipuia dawtin social media-a thehdarh vak hi chu ka hriat zan chuan ka mu har khawp a ni, ka rilru a na lutuk a. Kan ramah kan eitur chakai te, sangha te, ulawng thleng pawhin ei mi kan ni. Kan ram lui dunga nungcha ei chite pawh tihpuna, eitur kan neiha kan ngah theihna tur atana ruahmanna kan kalpui mekah hian, a ni lo zawnga mi te, a thawktute pawisawi zawng emaw, ngaihtuahna hmangtute ti beidawng zawnga thil kal thin hi a paw ka ti a ni.

Kha kha kan Member zahawm tak tak ten an lo zawt hlauh mai hi a lawmawm ka ti a. Chakai farm hi ka sawi ang khan India ramah pawh hian tuna kan khawi ang chia khawi hi an la awm ngai lo a, chuvang chuan, kan uluk a, enchhin a nihna angin, ICR lama mi thiamte pawh khulai Kolasib bul hnaiah kan han tihna chhan pawh khu ICR te an lo awm a, mi thiamte nen tang hoin an inthlah pun theih dan turte, Chakai tana environment tha turte leh tul dangte zirchian a buaipui a ni a.

Tin, Kolasib ICR Scientist te pawhin a hmunah vawi 3 lai deptt.-a kan mithiamte nen an enho tawh a, keipawh vawi 3 a hmunah ka kal tawh a ni. Tin, he chakai farm enchhinna hi a hlawhtlin ngei theihna turin theih tawp chhuaha, pond pathum kan siam pakhatatah kan dah chhin a, daihlim zar ngai a ni a. Pu Speaker, ka sawi rei deuh hlek em ka hre lo a, kan zar hmaa an lo dah chhin a chu a thi kan nei nual a. Mahse tunah chuan a daih hlimte kan han zar sak ta a, kan la neih hote chu an dam tha viau tawh a, note pawh nei thei turah kan ngai a. Tunah hian a nau pai ang chite pawh engemaw zat kan nei niin kan hria a, kan khawi pung theih kan inring a, hlawhtlinna kan neih theih chuan hei aia man tlawm zawk pawhin chhungkaw khat chawm thei tura ruahmanna pawh siam theih niin kan ring a, chutiang chuan kan kalpui a ni.

Pu Speaker, zawhna 3-na Pu Zothantluanga zawhna baw, “Sangha chi tamtak hi a thang lian thei lo thin a, Sangha chi tha kan mamawh a ni”, a tihna ni berin ka lo

ngai a. Tin, a chi hi tlawm zawkin a pek theih em tih te a ni a. Hei hi kan Chief Minister, kan Finance Minister-in a ngaipawimawhin ka hria a. Nikumah te, nikum hmasaah te pawh SEDP atangin Sangha chi leina min pe a, chu chu subsidy, 70% laia tlawm 30% in farmers-ah kan pe chhuak a, nikumah te pawh. Tin, a hmunah kan farm neih hote sangha chi *chinese hatchery* helaiah chuan kan ngah deuh ber a ni a. Hmun hrang hrangah kan nei hlawm a, private farm neite pawh an tam a, depts. pawh hian kan nei a. Lunglei, Lengpui leh Saitual-ah te pawh, a hmunah pawh a chi hi eng emaw chen kan farm-ah kan han thar chho ve a, sorkar ang pawhin. Tin, mimal pawh hian an thar chhuak nasa tawh mai a, covid avangin harsatna a awm a, nikum chhung pawh khan kan thar hnem kan inrin tehreng nen kan thawktu hnam dangte hrileng avangin hna thawk thei lovin an awm a, an hawng a, chuti chung pawh chuan nuai 50 chuang lai mai helaiah pawh hian kan thar chhuak niin kan hria a. Tun kum lo awm turah pawh a aia tam thar chhuah theih kan inbeisei a, hma pawh nasa takin kan la a ni.

A chi tha kan neih theihna tura pawimawh bera chu, a pui lian tha neih hi a ni a, sanghapui khawina tur atan hian tunah pawh sum leh pai central-a kan dil te kan nei a ni. Tunah Thenzawl-ah hian hmalak kan tum a, a pui tur bik khawi tumna kan nei a. Farm-ah hian a pui vulha an tui tir chuan a thang chak dawn a ni. Sangha kutphah tiat lek lek an tui tir hian a note hi a thang thei lova, chuvang chuan a chi tha lo a hring chhuak thin a ni. Farmers ten a chi tha an neih theih nan hian hma kan la mek a ni. Ka lawm e.

SPEAKER : Tunah chuan *Laying of Papers*-ah kan kal ang a, Pu Zoramthanga, kan Chief Minister zahawm tak “Thirtieth Annual Report of the Mizoram Public Service Commission (MPSC) for the year 2020-2021” hi House-ah lay turin i lo sawm ang.

PU ZORAMTHANGA, CHIEF MINISTER: Pu Speaker, “Thirtieth Annual Report of the Mizoram Public Service Commission (MPSC) for the year 2020-2021” chu he House dawhkanah hian ka rawn *lay* e.

SPEAKER : A copy kha rawn sem ula (*A copy sem a ni a ..*)

A copy kan chang kim maw? Tunah chuan, Pu R. Lalzirliana, Minister zahawm takin “Audit Report of Joint Electricity Regulatory Commission for Manipur and Mizoram for the year 2013-14, 2014-15, 2015-16 and 2016-17” House dawhkanah lay turin i lo sawm ang.

PU R. LALZIRLIANA, MINISTER: Mr. Speaker, Sir, I lay on Table of the House Audit Report of Joint Electricity Regulatory Commission for Manipur and Mizoram for the year 2013-14, 2014-15, 2015-16 and 2016-17. Thank you.

SPEAKER : Awle, a copy kha sem ula... (*A copy sema ni a*)

A dawt leh ah kan kal ang a, Dr. K. Beichhua, Minister zahawm takin “Annual Report of the Office of Commission, Persons with Disabilities Mizoram for the year 2020-2021” hi House ah rawn lay se.

DR. K. BEICHHUA, MINISTER: Pu Speaker, ka lawm e. The Annual Report of the Office of Commissioner, Persons with Disabilities Mizoram for the year 2020-2021 chu he House dawhkanah hian ka rawn lay e.

SPEAKER : A copy kha han sem leh ula. (*A copy sem a ni a...*) Awle, kan chan kim chuan, kan tih turah kan kal leh ang a. *Discussion on Motion of Thanks* hmang turin kan inpuahchah leh tawh ang a. Nimina Governor thusawi chungchang *Motion of Thanks*, Member zahawm tak Pu K. Laldawngliana’n a rawn *moved* tak kha kan sawiho dawn a ni.

Awle, minute 10 inpe ang aw? Tin, House leader leh Group leader-te kha chu minute kan pe tam deuh dawn anih kha. Awle, tunah sawi hawng turin Pu K. Laldawngliana i lo sawm ang.

PU K. LALDAWNGLIANA: Pu Speaker, ka lawm e. Mizoram rorelna sang ber Mizoram Legislative Assembly a ding theia min siamtu Pathian engkim ti thei hnenah a hmasa berin lawmthu ka sawi a ni. Min thlang chhuaktu Bible chang keimaha lang han tarlan ka duh a.

II Timothea 4:5 hmang khan min ko chhuak a, “*Nang erawh chu engkimah fimkhur la, hreawm tuar la, chanchintha hriltu lam thawk la, I rawngbawlina kha hlen rawh*” tih hmanga koh chhuah ka ni a. “Pathian leh kan ram tan” titu MNF President leh a kaihhruai zawng zawngte, min ko chhuaktu chungah thinlung takin lawmthu ka sawi a ni. He dinhmuna min di tirtu Tuirial bial constituency mipuite chungah lawmthu ka sawi bawka ni.

Tin, Mizoram Legislative Assembly kum 50-na taka in zinga ka lo tel thei hi vannei ka inti a, ka lawm hle a ni. Pu Speaker, tun tum Mizoram Legislative Assembly Budget session tan ni nimina kan Governor zahawm tak thusawiah khan, Mizoram sorkar hnuai department hrang hrangte hmalaknaah thil thar chhinchhiahtlak tak tak leh hmasawna pawimawh tak tak a rawn tarlang a. Khang atang khan lawmna tur a tam hlein ka hria a.

Ahmasa berah chuan, Covid hripui vanga India ram leh khawvel ram hrang hrangin harsatna namen lo kan tawh laiin, Mizoram leh Kerala chu case nei rei, ngah rei ber State kan ni a. Hripuiin mihring nunphung min tibuai a, hmasawna hna zawng zawng pawh a chawlh thup laiin Chief Minister zahawm tak Pu Zoramthanga kaihhruai Mizoram sorkarin, hripui leh a kaihhnawih harsatna namenlo a lo hma chhawn dan leh hun khirh tak hnuaia kawng hrang hranga hmasawna hna a kalpui chhunzawm dante thlirin a ropui a, fak leh chawimawi a phu hlein ka hria a ni.

Tin, he House hi mawhphurhna sang tak la a, zahawm tak leh tum thuk tak nei a ni a. Tun tum Budget Session, kum 2022 atanga 2023 pawh hi kalpui a nih leh ngei tur thu a sawi hi a lawmawm takzet a ni. He House zahawmna leh ropuina a pholang chiang hle a. A thusawi kaltlanga Legislators-te leh Mizoram mipui zawng zawngte duhsakna min hlan hi a ropui em em a ni. Covid-19 avangin hun khirh tak kan tawh karah Mizoram sorkar chu hmalam panin a kal ve chhet chhet zel a, he hri chimawm tak hian kan ei leh barte nasa taka a nghawng avangin ram hruaitute lakah mipuiten beiseina sang tak an nghat a ni tih Governor-in a sawi hian chona/challenge a siam nasa em em a ni. He sorkar policy te hi ram thanna tak tak, mipui leh miretheite ban phak nih a tul thu a sawi hi a ropui hle a ni. Nimin lama kan Governor zahawm takin sorkar kal lai mek hmalakna chungchangte leh kan ram hmasawna tam takte he House zahawm takah hian a sawi tawh a, kan Governor thusawi chungchangah khan lawmthu tam tak sawi tur awmin ka hria. Chuvang chuan, waviinah hian lawmthu han sawi belh ve ka duh a ni.

Pu Speaker, a hmasa bera ka sawi duh chu kan Governor zahawm tak khan sorkar flagship programme kha a sawi a. Sorkarin policy duhawm tak mai, mipuite tana hma thlir thui tak nei kalpui anih thu a sawi a, a lawmawm hlein ka hria. Kum 2021 - 2022 chhunga pawisa SEDP atana ruahman te pawh a sawi lang a. Chung sum ruahmanna atanga department hnathawhna atana sum crore 83.93 lakh lai mai department hrang hrang hman atan dah anih thu a sawite kha a lawmawm ka ti tak zet a ni. Covid-19 hri a leng chung pawha heti zat sorkarin sum hmasawna hnathawhna atan a ruahman te hi a lawmawm tak zet a ni.

Pu Speaker, Tuirial Bye-election kaltlangin ka rawn thu ve chauh a ni a, tlai fal takin he Legislative Assembly hi ka rawn zawm ve a. Hei hi hriain kan Governor zahawm tak hian a thusawi hmasa bera min lawmpuina thu a sawi hi ka lawm em em a ni. He election hlawhtling taka neih a nih theihna tura sorkar hnathawkte, kohhran leh NGO te, mipui leh media-te inpekna a sawi chhuahte hi a lawmawm ka ti tak zet a ni. Election chungchanga Election Department-ten *Special Summary Revision of Electoral Roll*, Mizoram chhunga constituency hrang hranga chak tak leh felfai taka Election Commission of India-ina ti tura a ruahman bawhzui leh a hlawhtlinna hun reilote

chhunga hmuh a nih thu a sawi te kha a lawmawm tak zet a ni. Aizawl Municipal Corporation inthlan pawh Covid-19 hrileng chung a hlawhtling taka buatsaih a nih thu he House a han hrilhfiah kha a lawmawm hle bawk a ni.

Pu Speaker, Governor-in central sorkarin Mizoram sorkar ruahmanna ngai pawimawha Union Budget passed hlim hlawlah Mizoram tan crore 500 lai mai Aizawl by-pass road siamna tura a ruahman thu te, bamboo link road siamna tur pilot project atan crore 100 lai mai Mizoram sorkar tan ruahmanna a neih thute kha a lawmawm tak zetin ka hria a. He sorkar hi Pathian pawhin mal a sawm tak zetin ka hria a ni.

Pu Speaker, Governor thusawia thil lawmawm em em pakhat leh chu, Assam nena kan ramria SEDP sum hmanga hmalakna tam tak siam a nih thu te, kawng laih a ni emaw, security force tana an duty-na tur hmun siamsak emaw a ni te hi a ropui hlein ka hria. Pu Speaker, Governor khan District thar 3 (pathum) Khawzawl, Saitual leh Hnahthial hmalakna tur tam tak a awm thu te a sawi a, a lawmawm hle bawk a ni.

Pu Speaker, Governor khan PWD hmalakna a sawi nual mai a, kan sawi vek seng lo ang a, khangte kha ropui ka ti hle a ni. Covid-19 hrileng karah PWD chuan hmasawn zelin, World Bank Fund atang leh Asian Development Bank hnuai atang tein sorkar kum kal meka building 25 sak zawh thu te, building 57 sak mek a nih thu te leh Lei pawimawh tak tak 7 kum 2021-2022 chhunga an zawh tawh thute a rawn sawi kha a lawmawm hle a ni.

Pu Speaker, PHE Department atanga Jal Jeevan Mission hnuai thingtlang khua 209-a chhungkua 61,850 ten tui connection an hmuh tawh thute, December 2021 thlenga chhinchhiah danin khawpui chhungah In 1,09,954 hnenah tui connection pek a nih tawh thu kan hriatte kha a lawmawm hle a ni. Pu Speaker, Health & Family Welfare Department hnuai CHC te, PHC te, Sub Centre building leh staff quarters eng emaw zat NABARD fund atanga sak thar leh chei that a nih thute, NABARD hnuai Primary School 3, Sub Center 3 leh staff quarters 6 crore 20.3 sum senga sak mek a nih thu te, ZMC leh District Hospital tinte thawm that zel a nih dan te, vawiin thlenga Mizoram-ah Dengue vanga thi an la awmlo te leh kum 2025-ah chuan TB vei awmlohna State ni tura hmalakna te a rawn sawi hi a lawmawm tak zet zet a ni. Home Department te, Power & Electricity Department-ah te hmalakna tam tak a sawi te pawh a chhuanawm tak zet zet a ni.

Pu Speaker, kum 2021-2022 chhunga Ministry of Rural Development, Government of India chuan cheng nuai 35,896 MGNREGS hnuai Central assistant-a a rawn tihchhuah hna 11,722 lai niin, chung zinga 15,159 zawh fel a ni te hi thil lawmawm tak a ni. Tin, kum kal laia NRM hnuai hna 3,919, mimal ramah hna 11,050

leh rural infrastructure hnuai hna 3,753 siam a ni te leh, job card chhungkua 2,80,652 pekchhuah te, an zavaia hna pek vek an ni te hi a lawmawm hle a ni. Kum 2021-2022 chhungin RULPUM hnuai hna hrang hrang thawkte, commercial wholesale market, mushroom processing centre, agriculture godown, market shed, solar street light siam dan leh a dang tam takte pawh a awm a. MZSRLM hnuai community fund nuai 426.22 hmuh te, Farm Livelihood Intervention hnuai khawthar 47, Mahila Kisan 3,601 awmna telh thar a ni leh, Nutritional Garden 4,144 siam thar a ni te hi a lawmawm hle a ni.

Pu Speaker, Forest lamah Mizoram pum hi 83.53% chu thing leh ngawin a la tuam a, chu chu India ram pum 21% ngaw hi Mizoram ngaw a ni a. Kum 2021-22 chhungin nuai 2,985.80 kan thing leh ngawte thuam that nana hmuh a ni hi a lawmawm hle a ni.

Pu Speaker, Agriculture Department hnuai pawh system hrang hrang kalpui mek niin, Soil Testing Laboratory pahnih sak a nite leh hmalakna hrang hrang hmachhawp tha tak tak awmte hmuh hi a lawmawm hle a. Horticulture Sector lamah pawh ₹597.50 lakh chuang zet tomato atanga hmuh a ni te, dragon fruit-ah 630 lakh bawr vel hralhna hmuh a ni te hi a lawmawm hle a ni.

Pu Speaker, Covid-19 avanga kan in lockdown lai khan *vegetable foods supply chain* chu Horticulture Commerce & Industrial Department leh MIZOFED tangho ten mumal taka kalpuiin, he mi kaltlang hian ₹3.53 crore lai hmuh a ni te hi a lawmawm hle a ni. Tin, Animal Husbandry & Veterinary Department pawh 2021 chhungin ₹943.24 lakh Govt. of India hnen atangin Scheme hrang hrang tihpuitlin nan dawn a ni a. African Swine Fever avangin vawk 29,821 thiin chhungkua 9,461 district 11 a nghawng a, chhiat tawkte zangnadawmna ₹11.69 crore lai Govt. of India atang kan dawngte hi thil lawmawm tak a ni.

Tin, Pu Speaker, Fisheries Department in Scheme thar PMMSY hnuai 2021 chhunga Govt. of India in ₹3381.14 lai 2020 - 2025 chhung tura min pawmsakte hi thil lawmawm tak a ni.

Pu Speaker, Food & Civil Supplies Consumer Affairs-a lawmawm em em mai chu, mipui mamawh buhfai (ration) khaihlak miah lova hnianghnar taka kan sem thei rengte hi a lawmawm hle mai a. Monsoon ration atana thla 5 daih khawp buhfai dah thei reng a ni te hi a lawmawm hle bawh a ni.

Pu Speaker, UD&PA Department hnuai thlurbing 5 awmnaah nasa taka hmalakna hmuh a ni hi thil lawmawm tak niin, National State ranking, AMRUT portal-ah 8-na nia 74% marks lai kan hmu thei te hi thil lawmawm tak a ni.

Tin, Land Revenue Settlement Department pawhin Covid pandemic avanga khawvel a buai laiin registration fees leh stamp duties atangin December 2021 thlenga 1178.48 lakh lai a hmute hi thil lawmawm tak a ni.

Pu Speaker, School Education Department pawh Covid avangin kan zirna Intekhar a ni chung a chhumlo chat lova online kaltlanga a theih dan kawng awm ang ang dapa naupangte zirtir hna kalpui a ni theite hi a lawmawm hle a ni. School-te hawn theih a nih loh lai pawha 3C, 4C atan tea tangkai taka hman nachang kan hria hi thil lawmawm tak a ni.

Pu Speaker, Sports & Youth Department hnuai infiamna lamah nasa takin hma kan sawn hi a lawmawm ka ti a. Hei hi infiamna hmunhma kan lo neih that tak vang a ni tih loh theih loh a ni a. Infiamna hmunhma tha zawk nei turin project thahnem tawk tak tihpuitlin a nih thu te, kum 2021 – 2022 ah Ministry of Minority Affairs chuan PMJVK atangin Community Service Centre pathum sakna turte, Astro-football turf pahnih, District Sports Complex pahnih, Girls Hostel pali, Volleyball leh Basketball 28 ve ve siamnate, Futsal ground pahnih leh Hockey ground pakhat, phul lem phah nan sum 8,410 lakh lai first installment atana rawn sanction tawh te, Ministry of Youth Affairs & Sports pawhin Kolasib leh Kawnpui-ah Hockey leh Football infiamna atan *Khelo India* centre pahnih hawna tur min rawn phal sakte hi, infiamna lama nasa taka Mizoram-in hma a sawna tur a ni a, a lawmawm hle a ni.

Pu Speaker, Industries hmasawna turin Ministry of Micro-Small & Medium Enterprise hnuai ah Commerce & Industries Department chuan Luangmual Industrial Estate, Industrial Growth Centre buatsaih nan 9.84 crore leh, Lengte-a EPIP tan 9.72 crore hmangin hma a la mek a. Handloom Unit buatsaih nan ACDP sum ₹260 lakh pek chhuah a ni tawhte hi hmasawna ropui tak a ni a, heng kan han hmuhte hi a lawmawm hle a ni.

Kan Governor zahawm tak thusawiah khan Mizoram sorkar hnuai ah department zawng zawngte hmalakna chipchiar taka tarlan vek sen a ni lo tih kan hria. Heng Department te zawk Legal Metrology, Printing & Stationary leh Institutional Finance & State Lottery te pawhin 2021 - 2022 chhungin an hma zawn theuhah an hna chanpual leh mawhphurhnate tha taka hlenin Mizoram Sorkarah revenue chhun luh tur an nei thei te hi a lawmawm hle a ni.

Cooperation Department hnuai ah 'Mizo Bank' kan tih, Mizoram Cooperative Bank leh MUCO Bank te hmanga banking service a pek hi kut hnathawktute tan a hluin, tihchangtlun zel pawh a duhawm hle a ni. Chutih rualin Department lian leh thawktu ngah zawk Taxation Department chuan VAT PTS, GST leh IGST atanga chhiah a lak

luh hi nikum December thla thleng khan 61,178.55 lakh a tling a, sorkar sum hnar pawimawh takah hetiang zat chhiah lak luh a ni hi a lawmawm khawp mai. Kum 2020, February 28 a din Mizoram Subordinate Section Board hnuaia nikum 2021, January leh kumin 2022, January inkarah direct recruitment leh departmental exam-te kalpui a lo ni ta hi hmasawna lawmawm tak a ni.

Pu Speaker, Governor thusawi han enchian hian, sorkar kal lai hian mipui tan thil tam tak a ti a, a la ti mek zel dawn ni te pawhin a hriat a, a lawmawm tak zet a. Sorkar hi amah ringawt hian a kal thei lo va, hetiang Governor thusawia sorkar hmalaknate hi mipuite avang liau liau niin ka hria a, kohhran leh pawl hrang hrang ten sorkar an tawiawm that avangin hetiang dinhmun tha tarlan tlak a lo awm hi a lawmawm tak zet zet a ni.

Pu Speaker, thil dang tam tak sawi tur awm mahse, kan Governor in a sawi point tam takte zingah hian sawibelh tur a tam khawp mai a, sawi loh a tam bawk a. Engpawh nise, kan Governor zahawm takin kan sorkar hmalakna leh hmachhawp tlangpui a sawite kha a lawmawm tak zet zet a, Zoram mipuite tan beiseina thar min pe a ni. A thu rawn sawiah khan he House zahawm tak hian ‘lawmthu i sawi ang u’ tiin ka rawn move a. Member zahawm tak tak ten thahnemngai taka min sawipui turin ka ngen a che u. Ka lawm e.

SPEAKER : Aw le, tunge han sawi ve leh ang? Pu F. Lalnunmawia ka sawm e.

DR. F. LALNUNMAWIA: Pu Speaker, ka lawm e. Kan member zahawmtak Pu K. Laldawngliana, Tuirial bialtu zahawm takina Governor thusawia ‘*Motion of Thanks*’ a rawn move hi thlawp pahin ka lawmna te rawn sawi ve ka duh a ni.

Pu Speaker, kan Governor thusawiah khan, Covid-19 hrileng karah India ram chhung leh khawvel hmun hrang hrangah mipui ten harsatna tam tak, nasa taka kan tawh karah Mizoram sawrkar chu kan Chief Minister zahawmtak kaihhruainain hmalam panin a kal zel a ni tih a han tarlang kha lawmawm hlein ka hria a. Chutih ruala pawimawh ka tih em em chu, Pu Speaker, kan Governor zahawmtak ina “mipuiin an aiawha an thlante, sawrkar leh a hnathawkte lakah beiseina sang tak an nei a ni,” a tih lai kha a pawimawh hlein ka hria a.

Chumi kara ka han tarlan duh chu, Covid-19 hrileng vangin mipuite kan tawmim a, mahni awm hmunah phone leh social media hmang tein kan inkawm nasa a. Mithenkhat rem leh rem lo pawh sawi lova sawrkar beih leh sawiselna zawng reng reng pawl te an awm a, chungte chuan rinthu leh thu belhchian dawl lo tak takte hmangin,

fake account lemte siamin sawrkar an sawisel thin a. Hetiang anga mipui rilru, a tha lo zawnga hruai kawi tum an awm thin hi tha lo hlein ka hria a. Pu Speaker, tuna kan Fisheries Minister sawi ang khan, hming dik tak pawh tarlang ngam loten a thu phuahchawp hmanga sawrkar an bei thin han hriat te hian rilru a lo na thin a ni.

Engpawh nise, kan Governor thusawiah hian he sawrkar hian theihtawpin a thlang tlingtu mipuite hamthat nan theihtawp a chhuah zel dawn a ni tih a rawn tarlang kha a ropui hlein ka hria a, lawmthu ka han sawi duh a ni.

Pu Speaker, kan Governor thusawi kan ngaihthlakah khan Tuirial bial Assembly Constituency bye-election neih a ni a, nikum October Ni 30-ah. Party hrang hrangte kan tang a, theihtawp kan chhuah tlang a, thenkhat phei chuan 'he election hi 2023 darthlang a ni' ti tein an sawi a. Chutah chuanin, result a lo chhuak a, candidate zingah Pu K. Laldawngliana thlan tlin a ni ta hi lawmawm hlein ka hria a, vawiinah hian lawmpuina thu pawh ka sawi ve duh hrim hrim a ni.

Pu Speaker, kan Governor zahawmtak thusawiah hian Lunglei Municipal Council din a nih tur thu leh notification hi ni 22.11.202-ah chhuah a ni tih kan lo hmu a, kan lo hria a, a lawmawmin a ropui ka ti a. Lunglei mipuite tan thil chhinchhiah tlak, hmasawna rahbi pawimawh tak a ni tur hi lawmthu ka han sawi a ni.

Pu Speaker, Union Budget pharh takah khan, Mizoram chu kan Chief Minister zahawmtak hmalaknain Aizawl by-pass atan cheng vaibelchhe 500 lai mai sanction a nih thu leh bamboo link road pilot project atan cheng vaibelchhe 100 sanction a ni tih hriat hi a lawmawmin a ropui hlein ka hria a. Heng zawng zawnga theihtawp chhuatu leh hmalatu, kan House Leader, kan CM zahawmtak hi fak a phu hlein ka hria a ni. He Aizawl by-pass khawthlang lama kal tur hian ka bial hmun eng emaw zah saw a paltlang phei dawn a, Sihmui atangin chhuak pheiin Aizawl thlang Muallungthu lam, chhim phei lama chhuak phei tura ruahman a ni a. Hei hian khawpui pawh a zauh pah hlein ka ring a. Highway te a lo kal chuan, a chhehvelah a lo hlu zualin, mi tam takin an chen belh phahin ka ring a. Chuvangin, hei hi kan khawpui tan hmasawna lawmawm tak niin ka hria a, lawmthu ka han sawi a ni.

Chutiang bawkin, Mizoram PWD hmalakna hrang hrang, Champhai - Zokhawthar kawng te, chhim lampang kawt chhuah te, kawngpui kaltlang tura theihtawpa hma an han la hi a ropui hlein ka hria a. Hei hian kan ei leh bar zawna leh transportation-ah nasa takin awlsamna min siamsak ang tih ka beisei a ni.

Pu Speaker, ka tarlan leh duh chu, kan Governor zahawmtak thusawiah hian, PHE Department-in nasa takin hma a la a, kan Deputy CM zahawmtakin chak taka hma

a lakna rah, a hlawhtlinna tam tak kan hmu a. Lawmawm em em chu, thingtlang mipui tui harsa tak takte tui pek an ni ta a, thingtlang khua 209-a chhungkaw 61,850 lai maiah, an in thlenga tui connection, 'functional house-tap connection' pek an ni ta hi lawmawm hlein ka hria a, hei hi thingtlang mipuite tan thil lawmawm tak leh chhiehchhiah tlak niin ka hria a. Ka bialah pawh thingtlang khaw eng emaw zat pawt an awm a, chung khaw hrang hrangahte chuan an in thlenga tui min han fit sak ta hi kan lawm em em a, kan Deputy CM zahawmtak leh a department chungah pawh lawmthu kan sawi a ni.

Pu Speaker, kan Governor hian ZMC chungchang a rawn tarlanah hian, Covid damlo te ina an mamawh em em oxygen plant lian chi 1000 LPM dah a ni ta hi a lawmawm hlein ka hria a. Hripui a len lai khan kei pawh ka va kal thin a, ka bial chhunga awm a nih avangin, oxygen cylinder hi an hnuk kual nasa em em a, chhun zanin, zan reh pawh sawi lovin oxygen bur an hnuk a, an pu kual char char mai a, an hah em em a ni. Amaherawhchu, DRDO Ministry of Defense atangin oxygen plant lian chi kha install a ni a, chu chuan nasa takin a chhawk zangkhai ta a, a lawmawm hle a, hmasawna lawmawm tak a ni. Chutihruah chuan, ICU khum pawh kha an indaih lo em em a, mi tam tak an buai phah a ni. A tira khum 150 awm kha 280-ah tih belh a ni a, ICU 13 lek awm kha 48-ah tihpun a ni ta bawh a. Chu chuan mi tam tak nunna a chhan phah a kan lawm em em a ni. Sawrkar hmalaknaah hian lawmthu kan sawi a ni.

Pu Speaker, a dawt lehah chuan, RD hnuaiyah kan Minister zahawmtak leh chak takin hma a han la, *Ni 100 Inhlawhna*-ah pawh sum eng emaw zah kan hmuin, mipui ten inhlawhna tha tak mai an hmu hi kan lawm em em a. A bik takin, Rurban hnuai Aibawk Cluster, ka bialah hmasawna hna tam tak thawh a ni a. Kan Minister leh kan sawrkar chungah pawh lawmthu kan sawi a ni.

Pu Speaker, Horticulture chungchanga han tarlan leh ka duh chu, off-season tomato-ah ringawt hian ₹597.5 lakh lai mai tharchhuah a ni hi a lawmawm hlein ka hria a. Chutiang bawkin zikhlum leh dragon fruit-ah pawh sum thahnem tak farmer ten an thawk chhuak bawh a. Hei hi sawrkar hmasawna leh hlawhtlinna pawimawh tak niin ka hria a ni.

Pu Speaker, Vety lamah hian, Rural Animal Health Centre engemaw zah hi dispensary-ah upgrade a ni a. Ka bialah pawh Hlimen Animal Health Centre hi Dispensary-ah upgrade a ni a, chu chu kan lawm hle a ni.

Tawite ka han sawi leh duh chu, Food, Civil Supplies & Consumer Affairs hnuaiyah hian, kan hriat angin hripui len chhungin harsatna hrang hrang karah chhuan chham loa kan awm hi kan lawm em em a ni.

Pu Speaker, sawi tur a tam khawp mai a, Education-a kan lawmthute, Education Minister leh a department hmalakna a kan lawmthute, Sport & Youth Services hmalakna a kan lawmthute thil tam tak sawi tur a awm a. Kan sawi vek seng lo ang a. A khaikhawmna atan chuan, kan motion rawn puluttu member zahawm tak Pu K. Laldawngliana'n Governor thusawi chungchanga lawmthu a rawn sawi kha ka rawn thlawp a, "lawmthu i sawi theuh ang u" tiin ka rawn support ani e. Ka lawm e.

SPEAKER : Member zahawm tak Pu L. Thangmawia ilo sawm leh ang.

PU L. THANGMAWIA : Pu Speaker, ka lawm e. Tun tuma kan Governor zahawm tak thusawi kha ka lo ngaithla uluk hle a, Aizawl leh Mizoram a lam dan te kha a lawmawm hlein ka hria a ni. Mizo hming a lam dan te kha member zahawm tak tak tepawhin in lo chik vein ka ring a.

Pu Speaker, sawi tur tam tak zingah lawmawm ka tih zual laite ka han sawi ang a. A hmasa berah chuan, Mizoram khawpui ber dawttu Lunglei-in Municipal Council a nei ve tur hi a lawmawm a. November ni 16, 2021-a Council of Minister thukhawmin an approved sak hi lawmawm khawpin ka hria a ni.

Kan Sorkar tirh atanga kan Chief Minister thusawi leiverh te pawh nuihza siam nan te an hmang a, tunah Governor thusawiah hian chiang takin a rawn lang a, central sorkarin 500 crore a allocate ta hmiah mai a. Tin, Sihhmui - Muallungthu Aizawl by-pass atan 100 crore a ni bawk a. Hengte hi thawh theih hun a nghahhlelhwam khawp mai a, Aizawl tlak lama aw te tan pheih chuan a nghahhlelhwam leh zual hle a ni. Tin, Bamboo link road tur district hrang hrangin kan hmute kha a lawmawm viau a ni Tin, Assam nena kan ramri a buai a, chumiah chuan SEDP atangin hna tam tak thawh a ni a, a taka hmu tute kan ni a, Governor thusawia alo lang hi lawmawm ka ti hle a ni. Tin, North East Khawdungsei leh Teikhang pawh a thusawi point 7-na ah khan alo lang a. Hengahte hian Police Outpost leh Border Police Check Post, Foreigner facilitation centre turin ram an tih fel thute a rawn lang a, a lawmawm ka ti hle a ni.

Tin, hripui leng karah PWD kaltlangin Mizoram sorkarin hna nasa takin a thawk tih thu a sawi bawk a. Mipuiin MNF sorkar min hriat dan nia ka hriat chu, 'kawng ngaipawimawh sorkar' tih niin ka hria a. Sorkar kalta te demna lam nilovin, kan kawng dinhmun hrechiangtu chu mipuite an ni a, sum leh pai harsa chung chung a kan sorkar hmalakna kawngpui tha kan neih theihna tur Governor thusawia a lo lang hi lawmawm ka ti em em a, kan sawi lang tel duh a ni.

Tin, PHE Department hnuaiia Mizoram khua zawng zawng deuh thawa hnianghnar taka tui pekna tur hmalakna thenkhat a rawn tarlangte hi a lawmawm ka ti a. Tin, Rural Development Department hnuaiia *Ni 100 Inhlawhna*, ni 100 inhlawhna ni si, a changa ni 80 chauh inhlawhna ni thinte kha, tunah chuan ni 100 inhlawh tak takte kan hmu ta a. Hemi chungchang hi point 13-na ah khan kan Governor khan a rawn tarlang a, a lawmawm khawp mai.

Tin, *Green India Mission* hnuaiia plantation atan hma nasa taka lak anih thu pawh a rawn tarlang a. Hei hi a pawimawh khawp mai a, tuihna humhalh te pawh kan han ti a, plantation hi a ti thei apiang leh tlawmngai pawlte pawhin kan ngaih pawimawh em em a ni a, hetah hian cheng 2989.08 lakh lai mai Creation and Maintenance of Plantation under Green India Mission hnuaiia a rawn tarlang a, a lawmawm khawp mai.

Pu Speaker, a tawpna atan chuan, sawi tur tam tak la awm mahsela, ka thusawi tih tawpnan point 16-naa a rawn sawi, Horticulture sector-ah hian. Hei, hi kan Chief Minister zahawm tak chan a ni nghe nghe a. Ka bial chhung khaw pathum - Ngopa, Lamzawl leh Pawlrang te kha a rawn lang ve nawlh mai a, a lawmawm ka ti leh zual hle a. Mizoram pumah Horticulture Department hmalakna hnuaiia hian hripui len nasat em em lai pawhin tharchhuah leh hralhchhuah tam tak kan nei a ni. Ka hmuh dan takah chuan 'Dah' tih ai hian 'Thawh' tih hi alo fuh zawk dawn anih hi ka ti a. Ka bial chhungah pawh a hranpain sorkarin sum kan dah miah lo, a thawk duhten bul an tan a, sorkarin a pui nasa a ni. Hmanni lawkah pawh an thlai chinte natna in a tibuai a, KVK lama kan mithiam, doctorate degree nei rual ho min tirh chhoh sak leh a, tikhan sorkar atanga dawn hmasak tum lovin 'Thawh' kha Mizoram puma kuthnathawktu tam takin an tan mek a ni tih kha Governor thusawi atang hian a lang a, a lawmawm hlein ka hria a. SEDP nen kumin chhovah chuan kan chumchilh chho ang a, awmze nei zawkin, kumthar lama Governor thusawi leh tur phei chu kan nghakhlel leh zual hlein ka ring a ni.

Chuvangin, he *Motion*, kan member zahawmtak Pu K. Laldawngliana rawn putluh hi ka thlawp a, ka member-pui zahawm tak takte pawh min pass pui vek turin ka sawm a ni.

SPEAKER : Member zahawm tak Pu Lalrinsanga Ralte ilo sawm ang.

PU LALRINSANGA RALTE: Pu Speaker, ka lawm e. Hei, kan Governor thusawiah hian lawmna tur a tam hlein ka hria a, chutih rualin an ziak kim lo hlein ka hre bawka. A vaia rawn react hi a rem dawn lova, chuvangin ka ngaih pawimawh zualte rawn sawichhuah ve ka duh a ni.\

A hmasa berah chuan Lunglei Municipal Council din remtih a ni hi lawmawm ka ti hle a, Lunglei khawpui tan hmasawmna pawimawh tak anih ngei ka beisei pui takzet a ni. Tin, Pu Speaker, Aizawl by-pass road te, bamboo link road te, India ram sorkar hnuai budget speech-ah bamboo link road atana 100 crore lai mai a lang te hi a ropui ka ti hle a ni. Kan Chief Minister zahawm tak hmalakna Pathianin mal a sawm a, hetiang kan dawng thei te hi a ropui takzet a. State dangte tan pawha thik tham khawp hetiang kan dawngte hi a ropui ka ti hle a ni.

Tin, SEDP hnuai, ka bial chhung Vairengte hmuna company headquarter sakna turte, kan Police ho awmna barrack lo langte hi lawmawm ka ti a. Kan hriat theuh angin Mizoram leh Assam ramriah kan buai a, sorkar kal tawh zawng zawngin an sorkar chhungin state thenawm nena harsatna an tawh thin a. Sorkar kal tawh hrim hrimah khan harsatna a awm pawha ngawih bopui maia, mipuite hriat vak loha boruak tih reh an duh thin avang khan kan ram tam tak hi kan lo chan hman a ni. Tunah hian Pu Zoramthanga kaihhruai, MNF sorkar alo ding a, ramri-ah harsatna kan tawh a, tunah hian an tih aia leta nasain kan nawr a, ram pawh tam tak kan hum thei a. Kan ramria la awm ngai miah lo police duty post hrang hrang kan han siam a, chutiang atana cheng 82 lakh chuang hmanga duty post hrang hrang kan siam hi a lawmawm hle a ni. Tin, hemi denchhen hian Vairengte hmunah ramri pawimawhna hriain IR Company Headquarter min dahsak dawn a, engkim ruahmanna peihfel vel tawh niin sum leh pai pawh a awm vek tawh hi ropui ka ti takzet a ni. Helaiiah hian IR Company Hqrs. tunlai kan boruak covid leng karah, sum harsatna nasa tak sawrkarin a tawh chung pawha cheng nuai 223 vel senga IR Company Hqrs. han ruahman te, ramri hrang hrang Kolasib District-ah te, Mamit District-ah te kan ramri humhalhna tur leh ramria hma kan lakna tur kan Police hmun pawimawh tak tak siamna tura cheng nuai 200 chuang ruahmanna sawrkarin a siam hi lawmawm ka ti tak zet a bawh a ni.

Tin, Mizoram PWD hnathawh ropui tak tak kan hmu a, a bik takin SEDP-ah ka bial chhung hmun pawimawh tak Bilkhawthlir-ah riahna pakhat mah a awm lova. Khulai hmun khu hmun pawimawh a ni a, Agriculture, Horticulture leh Deptt. pawimawh tam tak khulai 'potential area' kan tih thinah PWD-in IB cheng nuai 400 chuangin min han sak sak a, kan lawm tak zet a, helaiiah hian ziahlan tham niin ka hria. Amaherawhchu, ziah vek sen a ni si lova, kan Governor thusawiah hian han lang tel se tih kha ka duhthusam a nih rualin a lang lova naa ka han sawichhuak ram duh a, a lawmawm tak zet in ka hria a ni.

Tin, PHE-ah a lawmawm khawp mai a, kan bial chhungah tui kan hnianghnar lo, tui harsatna avangin buaina kan tawh nasa hle a. Chutiang karah chuan JJM hnuaiiah tunah hian Serlui bial chhungah bial 9 min thun sak a. Amaherawhchu, kan Dy. CM zahawm tak hnenah leh Deptt. hnenah ngenna kan thlen a. Saipum bikah an tui lak

tumna a fuh vak loh avangin tender pawh siamthat leh a ni dawn a. Tunah hian an han en tha leh a, khaw 8 Serlui bial chhungah JJM hnuaiah hmalakna thar a awm turte hi ropui kan ti a ni. Mipui tan he sawrkar hi a ding tak zet a, kan harsatna tam tak min chhawk dawn a ni tih kha ka han sawi duh a, kan lawm tak zet a.

Tin, Health & Family Welfare-ah pawh PHC Bilkhawthlir sak that a ni te, x-ray khawl dahna kan han nei thar te, Health & Wellness hrang hrangah te min han hlangkai chho te hi lawmawm kan ti tak zet a. Pu Speaker, sawi vek dawn chuan sawi tur a tam si a, tawi te tein ka han sawi ang a.

Tin, Education Deptt-ah pawh hian sawi duh ka nei a. Tunah hian SEDP hnuaiah High School teacher 157, High School indaih lohnaah lak a ni te hi ropui ka ti tak zet a. Kan sawi fo thin angin, sawrkar kal tawhah khan school 13-ah zirtirtu nei miah lo school an awm a, keini bialah pawh school pakhat zirtirtu 2 lek neite, single teacher neite an awm teuh mai a. Khang kha kan sawrkarin zrina ngaipawimawhin kan Chief Minister zahawm takin remruatna a han siam a, Education Minister te nen. MR teacher kan han la a, kan han hnawhkhat zung zung a, chutah khami kan lak leh tun inkarah mithite, pension-te an lo awm a, khang hnawhkahna tur remhre tak maia kan sorkarin SEDP teacher hna a la hi lawmawm ka ti a. He sawrkarin mirethei leh harsa zawk te, school thaa an indah ve theihloh pawhin, ram mipuiten zirna tha an dawn theihna tura zirtirtu SEDP kaltlanga kan la thei te hi a lawmawm hlein ka hria a.

Tin, Pu Speaker, helaia sawi duh pakhat ka neih chu, ziahlan tel ngei ngei tura ka duh, mahse an ziahlan loh hi a awm leh a. Tun ramri buaiah bawh khan Buarchep leh Saihapui V-ah khuan Assam-in a enkawl school a awm a, chu school chu 2010 sawrkar hmasa hunlai khan rawn cheithat a ni a. A hunah khan sawrkar kal ta khan ngaihtuahna seng lovin khulai hmunah khuan Assam-in a enkawl, kan ram chhungah si khuan building an rawn chei tha a ni. Zirtirtu pawh Assam sawrkar hnuai atanga hlawh la anni a. Amaherawhchu, ramriah harsatna kan han neih khan, khu school pahniha khu bomb-a an tihchhiat takah khan, kan hotuten ruahmanna siamin kan Education Minister zahawm takin rang takin SEDP atangin ruahmanna a siam a. School, bomb-a tihchhiatte kha chei that nghal niin, tunah khuan Mizo medium school-ah leh nghal a. Assam-in a rawn enkawl reng thin a, tun ramri buai hnu atang khan Mizoram sawrkar kutah kan la nghal a, zirtirtu pawh SEDP atangin pek a ni a, kan lawm tak zet a. Hei hi ram leh hnam issue khawih tel a nih avangin ropui ka ti a, ka sawi duh a.

Tin, PWD-ah hian sawi tur a tam khawp mai a. A bik takin kan Governor thusawiah hian rawn ziah ve atana ka it a tam khawp a, ram leh hnam tana thil pawimawh lutuk hi a awm tamin ka hria a. PWD-in kan bial chhungah pawh khuan an khawih nasa hle a, kum 2018 khan Assam-in tuna Saihapui-V kawng khu a rawn siam

phei mup mup mai a, inthlan hma deuh khan block rawn phah phei a ni. Kan han sawrkar ve ta a, Assam-in kawng a rawn siam kan phal ta lova. Kan Chief Minister remruatnain kan ram chhunga kan kawngte chu keimahnin kan nei emaw, neilo emaw kan theih angin kan khawih tur a ni tiin ruamhmanna a siam a. SEDP atangin engtik lai pawha Saihapui-V, fur lai ruah vawikhat a sura kal theih ngailoh kha kawngtha, kal theihin min han siamsak a. Tin, tuna kan hriat lar Buarchep kawng engtik lai maha siam la ni ngailo kha siam a ni chho ta vek hi a ropui ka ti tak zet a.

He kan Governor Speech-ah hian lawmthu sawina tur, he kan sawrkar hmalakna tam tak a awm a, sawi vek sen a ni lova. Chuvang chuan, Pu Speaker, he kan Governor Speech Pu K. Laldawnglianaw lawmthu sawina a rawn move hi kei pawhin ka rawn thlawp a ni tih ka rawn sawi duh a ni e. Ka lawm e.

SPEAKER : Hun in hmang tha hle mai thin a na. Tunge sawi leh ang? Helamah member zahawm tak Dr. BD Chakma ka sawm e.

PU B.D. CHAKMA : Pu Speaker, ka lawm e. Governor zahawm tak speech chungchang kan sawiho tur hi thil lawmawm tak a ni a. Chumi chungchang sawi hmawm vawina thil thleng chungchangah tlem sawi ka duh deuh a.

Governor zahawm takin hetah 1st page-a ziaak angin, kan chhiar lawk ang e, i phalnain, ‘we are living in times of high expectations of the people from their elected representatives and from governmental machineries’ tih hi. Mizoram mipuiin he House zahawm tak atangin beiseina sang tak an nei a, chuti chung chungaw vawin a thil awm te kha kei chu support emaw, oppose emaw, nimir lam social media hrang hrangah tarlan tawh angin, a audio clip pawh ka ngaithla a. Direct contact a ni chiah lo a, hon. Speaker, thu pawh a ni lova, midang voice record a ni mai a. Tunge dik, tunge dik lo tih chu sawi chi a ni lova, a hma lutuk a. Dan pawhin, ‘nobody is a culprit until he is proven guilty’ tih a ni a. Chuvangin, hei chu House zahawm takah hian kum 9 vel ka awm tawh a, mipuite khawngaihna azarah, Mizoram Assembly-a kan sawiho leh kan boruak vawin thlengin tha takin a kal a, a lawmawm khawp mai a, hun lokal zel turah pawh rorelna dik hi a kal theih nan BJP lam atangin hei hi ka chah duh a ni.

Tin, BJP lam atanga ka sawi duh chu, rorelna dik tak he House kal tlangin mipui hnenah kal thei turin ka chah duh a. Engpawh ni se, vawina thil tih tur kha kei chu BJP member pakhat chauh, single MLA ka ni a, Ruling, Treasury Bench member pawh ka ni lova, Opposition bench-ah ka thu a. Chuvangin, ka duh dan chu BJP duh dan a ni a, Pu Modi a kaihhruai sawrkar hnuaiyah kan awm a. Engpawh nise, kei chu constructive opposition angin ka awm duh a ni. Chuvangin thil tam tak, tunge dik, tunge diklo chu ka sawi ve lo ang a.

Engpawh nise tuna kan Governor Speech sawihonaah lut ta ila. Hei, Parliamentary Affairs hnuaiah Ex-MDC leh Mizoram Regional Council member zawng zawngte hnenah pension grant pek zah chu sawi ngai lovin kan hre vek a, hei hi lawmawm ka ti takzet a ni. Tin, Lunglei Municipal Council din thar a ni a, gazette notification 22.11.21 a chhuak tawh a, a lawmawm ka ti a. Lunglei hi hman atangin Civil District-ah khawpui pahnihna a ni a, Aizawl hi pakhatna a ni a, tin, Chhimtuipui District headquarters chu Siaha a ni a, engpawhnise a leh pekah chuan Municipal Council hi Siaha-ah pawh din ve ni ta sela a thain ka hria, hun lo kal zel atan thil pawimawh tak tur a ni tih ka sawi duh a ni. Engpawh nise Lunglei Municipal Council a ding thar hi lawmawm ka ti a ni.

Tin, Aizawl by-pass leh bamboo link road chungchangah, Central sawrkar atangin sum engemaw Aizawl by-pass road atan vaibelchhe 500 leh bamboo link road atan vaibelchhe 100 vel kan hmu thei hi lawmawm ka ti a. Chutihrualin Central lam atangin thawhhona tha kan nei chungin, SEDP hi direct project anih angin theih dan hi a awm lo emaw ni aw, engmah ziah lan a ni lova, hei hi nakin zelah hriat atan a pawimawh niin a lang.

Tin, Socio-Economic Development Policy, SEDP hnuaiah pawh thil tha tam tak a nei a, chumi zingah chuan PPE (personal preventive equipment) thuitute chungah lawmthu ka sawi a. Amaherawh chu kar hmasa a chanchinbu-a inziak angin a thuina man bill pekloh ala awm niin a lang a, kha kha pek a ni tawh em aw ka ti a. Tin, SEDP hnuaiah mipui hnena benefit kal miah lovin, border him nan SEDP sum hetiang hman hi chu, Assam leh Mizoram border-ah hetiang border outpost, CRPF post emaw, MAP post emaw khatiang SEDP sum atanga sak a ni hi paw ka ti deuh a, central project atanga siam theih dan a awm lo em ni aw tih kha ka sawi duh a.

Tin, Mizoram Police-ah *illicit drug* leh *narcotic substances* dona atan cheng 51.80 crores vel lo kal tur hi a lawmawm ka ti a. Chutih laiin kuhva dan lova sumdawmna chungchang social media hrang hrangah sawi a awm a, mahse Governor Speech-ah hei hi ziah lan a ni lova, paw ka ti hle a. Tin, Supreme Court instruction angin CCTV camera hi Police Station tinah vuah tur tih kha a lawmawm a, mahse Police Station tin hi vuah a ni em zirchian a ngaiin ka hria. Kei pawh Chawngte ka tlawh hunah ka lo chian dawn a. Hei hi Police Station tinah vuah theih a nih chuan a lawmawm khawp ang ka ti a ni.

Tin, Mizoram Public Works Department-ah leh Chawngte hi laih zawh tawh ang khan a inziak a, mahse ka hmuh danah chuan tih tur tam tak ala awm niin ka hria a; retaining wall leh culvert nen, chu bakah patch repairing pawh tam tak ala ngai niin ka hria a, tin, engtika complete tur nge tih kha zirchian ve angai a ni.

Tin, Public Health Engineering Department hnuaiah Jal Jeevan Mission hnuaiah hmasawna tam tak Mizoram-ah a rawn thleng tawh a, a lawmawm ka ti a, kan Minister zahawm tak hmalakna hi fakawm ka ti a.

Tin, Power & Electricity Department leiba chungchang chanchinbu-ah a rawn lang a, “bill pek theihloh chuan electricity supply kan ti tawp ang” tih vauna hi kan dawng thin a ni a, mahse khami chungchang kha engmah hetah hian ziahlan a ni lova, engzah chiah nge leiba hi kan neih tih kha hriat ka duh a. Tin, chu bakah Zoram Medical College-ah Oxygen Plant, DRDO, Ministry of Defence leh PMKR atangin sum kan hmu kha lawmawm ka ti a, chuti rual rual chuan Genomic Sequencing Facility neih ve tha ka ti a. Genomic Sequencing Facility neih loh vangin Covid variant thar case hi Kolkata-ah thawn a ngai thin a ni. Genomic Sequencing hi kan neih chuan diagnosis hi tha takin kan kalpui thei tura beisei a ni a, hei pawh thil lawmawm tak a ni.

Tin, Rural Development hnuaiah hian BJP lam atangin Wage Component chungchangah engmah sawiho tur kan nei lova, mahse material component chungchangah hian kan kal dan a dik lo deuh em aw ka ti a, hei hi Dan angin a kal theih loh em ni? Hei nimirah pawh RD Secretary atangin documents kan la chhuak a, implementation chungchangah sawi tur kan nei a, mahse chuvangin hun a tlem si a, detail deuhin budget discussion-a sawi a tan dah mai ila, tunah chuan ka sawilo mai ang a.

Tin, chanchinbu-a kan hmuh angin Agriculture Department hnuaiah kumina kan rice production a tlem deuh a, Pu Speaker, hei hi thil pawl tak a ni. Covid karah pawh nise, production, agriculture activities kha chu tih tawp loh tur a ni a, rice production leh food production kha chu kan fimkhur taka kan chhunzawm hram hram a ngai a, Mizoram mipui zawng zawng inngahna a ni si a ka ti a ni.

Tin, African Swine Flu avangin kan vawk vulh tam tak an thi tawh a, compensation hi central-ah dil lovin SEDP Mizoram sum, local fund received atangin compensate dan hi a awm lo em ni, hei hi engmah ziah a ni lova. Central atangin compensation a tan sum min pe lo se vawk vulhtute hian zangnadawmna engmah an hmu thei dawn lo em ni tih kha farmers te lam atangin ka zawhna ni ta se.

Tin, chu bakah...(Speaker : Ngawirawh lawk rawh aw. Vawiin chauh chu opposition group leader angin hun ka pe mai ang che.) Pu Speaker, ka lawm e. Minute sawm vel a ni a, Pu Speaker.

Tin, “One nation, One ration” hi central sawrkarah duh dan anga thil lo thleng thei hi a lawmawm ka ti a, NFSA hnuaiah ration card zawng zawng kha hetiang system-ah hian kan dahlut thei hi lawmawm ka ti hle a.

Tin, High School chungchangah nikumah SEDP hnuai atangin fix pay teacher engemaw zat lak tawh niin ka hria a, a bik takin ka biala Borapansuri High School hi school senior tak a ni a, High School zingah chuan. Heng fix pay teacher-te hlawn thla khata cheng 10,000/- hi chu a tlem deuh lo maw, tunlai khawsawk hautak ngaituahin. Chuvangin ka MLA fund atangin kan zirtirtute kha cheng singkhat ka pekbelh a, tichuan cheng 20,000/- an la ve thei a ni. Hun lo kal zel tura kan budget-ah heng fix pay teacher-te hlawn hi SEDP atangin kan siam ve ngei thain ka hria a ni.

Tin, Higher & Technical Education-ah hian thil pakhat ka hriatthiam loh chu, “Department generated substantial amount of revenue to the tune of ₹209,19,524/-” tihah hian, Higher & Technical Education chu non-revenue generating department a ni si a, hetiang revenue hi khawi atanga lak nge tih kha khawngaih min sawifah sak theih chuan a lawmawm hle ang.

Tin, Mizoram University Southern Campus a tana Land Establishment hi a tul ka ti khawp mai a, hman atang tawhin. Sawrkar lam te, political party lam leh mipui lam atang pawhin Southern MZU Campus hi neih thei a tha kan ti vek a. Chutih rual chuan, tunah hian “he campus atan land acquired a ni” tih a la ni chauh a, a la rei dawn mang e aw ka ti deuh a, Pu Speaker. Hei hi chu a rang lama tihfel ni thei se, Lunglei Zone ah hian MZU campus hi a rang lamin ding thei se ka ti khawp mai.

Tin, PMJVK hnuaiah pawh central lam atangin sum tam tak kan dawng hi lawmawm kan ti a. A bik takin Chawngte-ah pawh artificial football turf hi siam mek a ni a. Chu mai bakah minority hostel pawh sak tumin hma an la mek a, a lawmawm ka ti khawp mai.

Tin, “Ministry of Shipping has approved ₹2,292.94 lakhs for Inland Water Transport Project” tih kan hmu a, Khawthlang Tuipui-ah hetiang hmalakna a awm hi lawmawm ka ti a. A bik takin luikama awm ho tan revenue generate nan te, livelihood generate nan te a tangkai dawn a, a lawmawm ka ti hle a ni. Hun lokal zelah pawh hetiang hmalakna hi awm thei zel se tih kha ka sawi duh a.

Tin, Pu Speaker, Tourism lamah hian kan state hi a la naupang a, State dang chu tourism lamah hian an lar tawh khawp mai a, Mizoram erawh hi chu duhthusamin kan la lar lova. Mahse, kan Minister chak tak kaihhruaina hnuaiah tourism lamah pawh hma kan sawn chho zel a, hun lo la kal zel turah pawh tourism lamah tan la ila. Kan boruak

pawh a tha a, Mizoram hi, pollution kan nei lo a, tourism sector lamah hian potential kan nei tha em em a. Tun aia chak zawka hmalak theih dan a awm chuan a lawmawm khawp ang. Tin, Chawngte lamah pawh tourism lama hmalakna hi kan beisei a, chance pawh kan nei tha em em a ni.

Tin, District Council & Minority Department hnuaiah hian minority concentrated areas pasarih hnenah 99 lakhs theuh skill development leh training centre sakna atan sum hmuh a ni hi a lawmawm ka ti a. Mahse hetah hian hming hi engmah a lang lova, nakin windup hunah min sawichian sak theih chuan. “Seven minority concentrated areas” tih a ni a, an hmingte erawh ziah lan a ni lova.

Tin, a tawp ber atan, Printing & Stationery Department hi tun thlengin “non-revenue earning department a ni” tia sawi a ni a. Keini pawhin outlet atangin kan dawr reng thin a, A4 paper te pawh bazar rate aia tlawmin kan lei thin a ni. Chuvangin, member zahawm takte hnenah pawh ka request duh chu, stationery tal chu sales outlet atangin kan dawr theih chuan Mizoram tan pawh revenue generate theihna chance a ni a, dealer dangte hnenah pawh hei hi publicize ila tih kha ka sawi duh a ni.

Pu Speaker, hun min pek avangin lawmthu ka sawi e. Ka lawm e.

SPEAKER : Minute nga kan la nei a, kan chawl mai dawn nge, kan la ti hram dawn? Anih leh le. Kan chawl rih ang a, dar 2-ah kan chhonzawm leh dawn nia.

2:00 PM

SPEAKER : Kan lo tan leh tawh ang a; tunge sawi leh ang le? Pu Lalrintluanga Sailo.

PU LALRINTLUANGA SAILO: Pu Speaker, sawi ang khan, tlangkam atanga an thu hriat avangin hei Opposition member-ten House zahawm tak mai an chhuahsan hi a pawl ka ti hle a. Mizo upa in, ‘khual thuthang leh ar pan chuk a pun duh e’ an tih ang deuh khan, khual thuthang mai mai Mizoram rorelna sang bera an rawn pulut kha a puitlin loh thlak ka ti a, he House zahawmna pawh hi a bo lek lek em aw a tih min ngaihtuah tir a.

Chutih rual chuan, he House-ina Budget Session kan neih dawn atangin programme engkim duan a lo ni a, chutah chuan kohhran hotena kum tawpa kan programme pawimawh tak thina chu, kohhran member-te khami kum chhunga vanduaiana tawka boral an awmin kum tawpah a sunna programme kan nei thin a.

Chhungkhat lainate, khual khaw hla tak tak atang tein an inchah khawm thin a. Chutiang chuan urhsun takin kohhran ho in sunna programme kan hmang thin a. Chutiang chiah chuan he House pawh hian kan House Members lo ni tawhte an lo boralin, an sunna programme pawimawh tak mai a buatsaih thin a, chung programme zawng zawng chu House-in session kan nei dawn a ni tih hriat anih atangin programme ah telh a ni a. Chung zawng zawng chu programme-ah tarlan a ni chung a i vei lama kan thawhpuiten kan rual ute ram tana thi leh thau pawlha lo thawk tawh thinte sunna programme nei tura inbuatsaihnaah chhungkhat laina hnaite leh unau te hmun hla zawka mite pawh inkokhawmin helai gallery-ah an thut lai a, i vei lama miten a khatiang ang lusun kan tawrhpuina leh kan vuina programme min hman pui duh lova khual thuthang mai mai avanga he House zahawm tak an chhuahsan kha paw ka ti takzet a, a mizo lovin ka hria a. Chuvang chuan, practice foah a thain ka hre lova ni tih, Pu Speaker, ka han sawi hmasa duh a.

Awle, tuna kan Governor ina kan House a address-naah khan point tamtak zingah eng emaw han tarlan duh Pu Speaker, ka nei a. Pakhatnaah chuan, point 3-na, Council of Minister-in ni 16.1.2021 a alo pass tawh angin, he sorkar hian mipui rorelna a ngaipawimawhin mahni power pawh hlip thla ngamin chhim lama kan khawpui, Lunglei-ah municipal council siam tura a thutlukna Governor speech-a lo lang hi ropui ka ti a, hei hi Mizoram Gazette-ah ni 22.11.2021 ah alo lang ta hial a ni. Hetianga mahni inphat a power decentralizations programme kan House Leader zahawm tak kaihhraina hnuai lo puitling chho ta, Governor speech-a lo lang hi ropui ka tiin lawmawm ka ti a ni. A bik takin Lunglei District-a mipui zawng zawngte ka congratulate a ni tih ka sawi duh a.

A dawt lehah chuan no.4 na a lo lang, kan sorkarin a lo tum tawh anga central government agency hrang hrangte a lo ngenna leh sorkar-ina proposal kan thehluhte dawngsawnga February ni 2.2022 Union Budget-a lo lang, a bikin Aizawl by-pass road Sihhmui atanga Muallungthu thleng buatsaihna atan Cheng nuaih 50,000/- ngawt mai (500 Crore) min han pek chungchang thu Governor speech-a lo lang kha lawmawm ka ti takzet a. Chutih rual chuan tuilet hnu-a la awm ngai reng reng lo, Bamboo link road kan House Leader zahawm takin a vei em em “economic road” kan tih tawngkam danga kan hman thin te ah pawh cheng 10,000 crore lai mai pek kan lo ni ta, Governor speech-a alo lang te hi a lawmawm ka ti a. Lawmna tur hlir a va han ni em, kan ti deuh a ni.

Tin, point 6-naah Mizoram mipuitena kan ngaihpaawimawh em em mai remna leh muanna, himna leh hmasawnaa hmalakna kawng hrang hrangah, a bikin kan himna atana NGO te, Kohhran ho leh media hote'n *law-enforcing agencies* te thawhnaah an puibawm tha hle a, chuvanga Assam border buaina chungchang thuahte kan sorkar ina

central forces BSF-te thlenga SEDP sum hmanga In (barrack) an sak sak chungchang speech-a lo lang te hi lawmawm kati takzet a ni tih ka sawi duh baw k a.

Tin, No. 9-ah khan, covid-19 pandemic hrileng karah kawng chhe lutuk awm hauh lova Mizoram mamawhte khaw tina sem zaina tur atan kan sorkar chak takina hma a lakna a lawmawm ka ti a. Sorkar hmasaah kan hria a, kawng chhiat zia te, keini district, Mamit lam atanga sumo hnunga lehkha inbel te ngaihtuahnaah alo lang a, an sumo permit leh an driving liscence thlenga sorkar hmasa ina an lo cancel dan te min ngaihtuah tir a, chutiang awm hauh lova he pandemic hri karah kan ramah kawng tha tak mai, kan duhthusam chu la ni chiah lo mahsela harsatna awm miah lova mipui tei vahna tur sorkarin hma a lak nasat avang te hian lawmthu kan sawi a.

Tin, No.10-naah hian, a bik takin kei ka bialah hian a lawmawm lehzualin ka hria a. Public Health Engineering Department hmalaknain Jal Jeevan Mission hnuaiyah khaw tin leh In tina tui connection kan neihna tur atana hmalakna kan Governor Speech-a lo lang hi a lawmawm ka ti a. Chutihrual chuan, Reiek, ka bial chhunga khaw lian ve pawl NABARD sum hmangin Reiek tlanga Tlawng tui ngei mai, Aizawl khawpuia kan in thinte min han pump thlen sak a, hei hi kan sorkar hmalakna ropui tak a ni tih ka han tarlang tel duh a ni.

Tin, no.13-na, Rural Development chungchangah hian sawi tur tamtak a awm ang a, chung zingah chuan point khat chauh ka sawi duh a. Sorkar hmasa atangin central scheme *Ni 100 Inhlawhna* kan tih mai hi kalpui reng alo ni tawh thin a. Amaherawhchu englai mahin kum 10 chhung khan ni 100 inhlawhna mipuiaah sorkarin a pe ngai lo a ni tih kan hria a. Vawiin niah *Ni 100 Inhlawhna* tak tak kan members zahawm tak tak ten an sawi tawh angin, a taka kuthnathawktute hnena lo thleng Governor-in a han tarlang te hi a lawmawm ka ti a.

Tin, No.19-na, Food, Civil Supplies & Consumer Affairs department hi a bik takin pandemic hrileng karah harsatna awm miah lova Mizoram khaw kilkhawr ber thlenga ei leh bara intodelhna nasa tak kan nei hi he sorkar chak tak hmalakna a ni tih Governor in a rawn tarlang hi a lawmawm ka ti a. A bikin normal boruak, pandemic awm lo, hetah kan state thenawm tena harsatna min siam, hmun 5 ngawta kan highway te min pin phui karah pawh Manipur state lam kan dawr ngailoh te, Tripura te leh foreign, Burma thlenga he sorkar ina mipuite nitin mamawh (essential commodities) chungchanga hma a lakna a taka lo lang chho hi a lawmawm ka ti a. Heng kan Governor ina helaiyah tawi tea a han tarlang hi a lawmawm ka ti takzet a ni tih kan sawi duh a.

Sorkar hmasa kan hria a, gas leh buhfai chungchangah namen lovin normal boruakah pawh mipui kham khawp min pe thei lo chungin tunah harsatna namenlo

hripui leng leh ramri buaina hmun 5-ah neiin leh, khawchhak lamah lir nasa takin a nging a, chumi zawhah refugee sang tamtak lokalna karah kan ration card a tello chawm thei khawpa he sorkarin hma a la a ni tih a han lang te hi lawmthu ka sawi duh a.

Tin, chubakah Education department-ah hian SEDP kaltlanga zirtirtu kan indaihlohna em em, keini bialah pheii chuan engtin nge nia ng ti a Tlumtea thlira kan lo thlir thin, SEDP high school teachers te he sorkar ina min han pe te Governor speech-a lo lang hi a lawmawm kati takzet a ni tih ka sawi duh a.

Tin, No.27-na, Sports & Youth Services chungchangah, a bikin tunah hian vawiina zawhnaah te pawh a lo lang a, he sorkar ina kum 3 lek chungah football grass turf phah puitlin tawh 5 lai a nei te leh, tuna puitlin tep, hna kal lai mek 10 lai lo awm te, tin, hna tanna tur a vaiin 24 lo lang te hi mizo thalaite tan hian a ropuiin a lawmawm a. Vawiinah football pet ngailo ka bialah chuan kan sorkar hmalaknain Phaileng-ah pawh sports school sain hma kan hma la hi lawmawm kan ti a. Phul lem phah tur niin leh basketball leh volleyball court, gallery lam thlenga hma min lak sak hi ropui ka ti a. He scheme hi tun hma sorkar kal taah khan a awmlo a ni lova, a awm vek a, a ngaihna hria a sorkar chuan a takin kan hmu zel a, heng Governor speech-a lo lang hi a lawmawm hlein ka hria a ni.

Tin, a bikin No. 30, Inland Water Transport chungchang, tun hmaa la awm ngailo niin ka hria a, vawiinah kan bial bul Khawthlangtuipui, Bangladesh nena kan inrinaa a taka kalpui tura Governor speech-a a lo lang hi ka lawm takzet a ni tih ka tarlang duh a.

Chu mai piah lam No. 34, Disaster Management & Rehabilitation Deptt hmalaknaah hian, central YMA, NGOs leh Kohhran hrang hrangte leh sorkar thawhhona avanga kan mizo unaute ral tlan mek harsatna tawkte kan tuam hlawnna chungchang lo lang te hi lawmawm ka ti a.

A tawp berah chuan, Pu Dy. Speaker, (*Dy. Speaker-in Chair a la*) No. 46-a lo lang, Mizoram Subordinate Services Selection Board chungchang lo lang hi lawmawm ka ti a, He House ka thut tir pawha zawhna ka pek kha a ni a, MPSE indaihloh vang te pawh a ni ang a, sorkar hna lak chungchangah sorkar ina mamawh a thlente pawh a kum tela delay a ni thin a, chung delay chu awm tawh lo tura dan ang thlapa hmalakna tur he sorkar ina he Board a buatsaih hi a lawmawm ka ti takzet a ni tih ka tar lang duh a.

Chuvang chuan, vawiinah Pu Laldawngliana *Motion of Thanks* a rawn put luh hi tih takzetin ka thlawp a ni tih ka han tarlang a ni e. Ka lawm e.

DEPUTY SPEAKER : Tunah chuan Pu H. Biakzaua ilo sawm ang u.

PU H. BIAKZAUA : Pu Dy. Speaker, Governor thusawiah hian lawmthu sawi tur tam hlein ka hria a, a tlangpui leh ngaih pawimawh deuh te chauh sawi ila.

Pu K. Laldawngliana, MLA zahawm takin he Motion hi a rawn pulut a. Ani hi kan hriat angin Tuirial Bial bye-election a tling kha a ni a, House-a a vawikhat rawn awmnaa Governor thusawia lawmthu sawina motion a rawn pulut hi a lawmawmin ka hria a. Tin, a rawn sawi tlang tha viau mai a, keini hian sawi tawh lo mah ila fiah thawkhat viauin ka hria a, mahse ngaih pawimawh zual tlema zawng rawn tarlan ve ka duh a.

Pu Dy. Speaker, he sorkar kan Cm zahawm tak Pu Zoramthanga kaihhruai hian kan mi hmasate, MDC leh MPRC lo ni tawh pension sum indaihlona tam tak kara cheng nuai 7138101 lai mai pension atana a pechhuak thei mai hi a lawmawm ka ti a. Pension hmasa te, ram hruaitu hmasa te tam tak ngaih pawimawhna leh ngaihhlutna kan sorkar zahawm tak hian a nei a ni tih a lo lang hi a lawmawm ka ti takzet a ni.

Tin, Election laia manifesto kan neih zinga mi power decentralization chungchang kha a takin a lo lang leh niin ka hria a. Lunglei Municipal Council sorkarin din turin order a siam vek tawh a. Hei hi mahni thuneihna leh kan power inhlip thlaa mipui rorelna mipui thleng phak rorelna a grass-root level thleng pha tur nia ka ngaih ve a ni a. Chu chu Governor Speech-ah rawn langin he thil hi Lunglei mipui tan a bik takin a lawmawm rualin kan sorkar manifesto MNF sorkar kan dawn, inthlan laia kan manifesto te zinga mi kha a ni tih kha a lang chiang hlein ka hria a, a lawmawm takzet a ni.

Tin, Union Budget crore 600 rawn lang va maia kha a lawmawm a, North East state te zingah khatiang ang kha an awm lova, Aizawl by-pass road atan crore 500 leh bamboo link road atan crore 100 kan han nei thei tur te kha thil la awm zen zen lo, la awm ngai lo, kan la hriat loh leh kan la neih ngai loh thil kan Chief Minister zahawm tak hmalakna hlawhtlinna a taka rawn lang hi a lawmawm ka ti a. He pilot project-ah leh a dangah pawh lawmthu kan sawi duh a, Governor speech a rawn lang kha a lawmawm hlein ka hria a. Lawmthu sawina awm hlih hlih niin ka hria a.

Tin, kan ram himna tur leh kan ram remna, muanna a awm theihna tura NGO te, kohhran hrang hrangte leh mipuiin ralmuanna kawnga thawh, he sorkarah hian nuam leh chak takin a kal chho mek niin ka hria. Assam border-ah pawh hmasawna chak takin kalpui zel a ni hi he sorkar hmalakna zingah thil lawmawm leh ropui tak Governor hian a rawn tarlang niin ka hria a, lawmawm hlein ka hre bawka a ni.

Tin, District thar Khawzawl leh Saitual ah te pawh Police hmun tur te rawn tarlan a ni a. Police hi a pawimawh khawp mai a, an hmalakna, hei, ruihhlo man chhuahna chungchangah te anti-human trafficking lampanga an hmalakna chungchangah Police te hi an pawimawh em em a. Chutiang thum thatna tur leh chutiang lam hawia District thara hmalakna rawn lang te hi a lawmawm hlein ka hria a.

Tin, Lok Adalat lampanghi an chak khawp mai a, case 1389 lai nikum chhung khan chinfel a ni a, hengte hi sorkar hmalakna chhuanawm tak niin kei pawhin ka hre nghe nghe a ni.

Tin, PWD, PMGSY hnuaiiah thingtlang kalna kawng km 210 lai mai nikum chhungin laih tlang a han ni hi a lawmawm hlein ka hre baw a, fund source hrang hrang atangin rural connectivity lampangah sorkarin hma a han la hi lawmthu sawina awm tak niin ka hria.

Tin, PHE hnuaiiah hian JJM, chhungkaw 61,850 lai khaw 209 functional house-step connection neih a lo ni ta a, nikum 2021 hmaah khan khatiang hna kha rural bikah thawh zawh a ni.

Tin, Urban-ah hian 19,954 lai mai nikum chhung khan buaipui a lo ni chho ta hi hmalakna nasa tak, tui hniang hnar kan neih theihna turin tan lak a ni a. Hemi chungchangah hian a changtu kan Deputy Chief Minister pawh tan a la nasa hlein ka hria a, lawmawm pawh ka ti a.

Tin, Power & Electricity Department-ah hian Khawzawl leh East Lungdar Sub-Station te, thawh zawh a lo ni tawh a, SEDP hnuai atangin. Tin, project dangte pawh kalpui mek zel a ni a. Tin, 132 kV sub-station kalpuina tur tihphuisuina tur kawng hrang hrangte hma chak takin lak chhoh a han ni te hi lawmawm hlein ka hria a ni.

Tin, health infrastructure lamah hma nasa takin kalpui reng a ni baw a. ZMC leh Civil Hospital Aizawl-ah pawh nasa takin hmalakna a lang thei a, thum chakna leh tihphuisuina tam tak sawi tur sorkarin a nei hi lawmawm hlein ka hre baw a ni.

Tin, RD Department-ah NREGA hnuaiiah hna tam tak thawh a ni a. Tin, chhungkua 2,08,652 te hnenah job card pek niin chungte tan chuan nikumah khan hna tha takin pek vek anni te hi a lawmawm takzet a. A changtuten an enkawl hneh baw a, Self-help Group kan neihte pawh fel takin block zawng zawngah kalpui a ni mek zel a ni.

Tin, Environment, Forest & Climate Change Deptt. ah pawh Green India Mission hnuaiah National Afforestation Programme tha taka kalpui a ni a. Tin, khua a thal a, kang meite a hlauhawm thin a, Fire Prevention & Management Scheme pawh tha takin kalpui a ni zel hi a lawmawm hlein ka hria a ni.

Tin, Agriculture Deptt. hnuaiah scheme hrang hrang atangin hma lak chhoh mek zel a ni a, district pasarih laiah oil palm te pawh hlawhtling taka chin leh kalpui a ni te pawh hi a lawmawm hle a. Horticulture Deptt-ah zikhlum te, tomato te, dawnfawh te, dragon fruit te nasa takin nikum chhung khan thar chhuah a ni a, huan siamtuten an hlawkpui em em a. Tin Covid hri len laiin Vegetable & Fruits Supply Chain kalpui a ni a, huan siamtuten hei hi an hlawk phah hle a ni.

Tin, Veterinary Deptt-ah hian hospital pali lai, district pali-ah sak zawh a ni a, tin, RAH center 37 lai dispensary-ah hlankai an ni a, district parukah district hospital dispensary-te hlankai a ni leh bawk a, nasa takin AH & Vety Deppt-ah pawh hian nasa takin sorkarin hmalakna a kalpui a, a lawmawm takzet a ni.

Tin, Food, Civil Supply & Consumer Affairs Deptt-ah pawh covid hri len lai pawha harsatna awm lovin, ei leh bar (essential commodities) ah hnianghnar takin sorkarin hma a la chhunzawm thei a, monsoon stock tha takin a dah thei a, hmun kilkhawr berah ration card-te pawh a nihna angin mipuite hnenah an chan tur zat ang zelin buhfai an dawng thei zel te hi a lawmawmin ka hria a.

Tin, High School-a zirtirtu indaihlohnaah te zirtirtu 157 lai mai SEDP hnuai atangin lak a ni a, a lawmawm takzet a. Covid len lain class-te kal theih a ni lova, online class mumal taka kalpui a ni a, zirlaite pawh bahlah lutuk lovin n zirna kawngah an kal thei nite pawhina lang bawk a. (DY. SPEAKER: I hun a tawp a..) Pu Dy. Speaker, ka sawi zo tep e.

Tin, Sports & Youth Services Deptt-ah hian kan thalaite hmasawna turin football field artificial turf te, volleyball court te, basketball court leh thil hrang hrang nasa takin PMJVK hnuaiah hma lak leh thawh mek a ni a.

Tin, ICT Deptt-ah pawh *Smart Classroom* buaipui a ni a, tin computer-te helaiah hian sawitur tam tak a awm a, nasa taka hma lak chhoh a ni te hi a lawmawm a.

District Council & Minorities Affair Deptt. kal tlanga Govt. of India-in IT, Skilled Development & Training Centre atan sum alo pek chhuah pawh ADC te hnenah a nihna tur ang taka semchhuah leh pek a ni hi a lawmawm hlein ka hre bawk a. Covid hripui len laia hetiang taka sorkarin ram hmasawna tur leh khawvel ramdang hmun

dangte pawh, Sorkar chak zawkte pawh an tlawm duai duai laia kan Mizoram Sorkarah hmalakna an awm theite hi a lawmawm takzetin ka hria a. Pu Deputy Speaker, hemi chungchanga kan Governor zahawm tak thu sawi Pu K. Laldawngliana, MLA zahawm takin *Motion of Thanks* a rawn putluh hi a tha hlein ka hria a, kei pawhin ka thlawp a ni. Ka lawm e.

DEPUTY SPEAKER : A lawmawm e. Tunah chuan member zahawm tak Pu Lawmawma Tochwawng i lo sawm ang u.

PU LAWMAWMA TOCHHAWNG: Pu Dy. Speaker, ka lawm e. Thupuia ka luh hmain tawngkam hnih khat lek wawiina kan thil tawn chungchangah han sawi ve hlek kan duh a.

Pu Dy. Speaker, I veilama mite an chhuak ta mai a, engchen nge an chhuah ang aw tih ngaihtuahnaah a lo awm vang vang a, an tel lova ro han rel chu engnge tangkaipuina ramin a neih ang, engnge sangsawhlawt puina kan neih ang tih ngaihtuahna thui tak a kal a. Kan neih hmasak ber tur chu hun kan neih tam phah deuh hlek dawn chu a ni phawt mai a.

Ka ngaihtuahna kal leh zelah chuan, ‘an ti, an ti’ tih vang ringawt maia he House rorelna zahawm tak In kan lut a, kan chhuak a, kan lut a, kan chhuak mai mai anih dawn chuan, he rorelna In zahawm tak hi kan vawngghim zo zel dawn em ni, a zahawmnate hi tih ngaihtuah naah a awm a.

A pahnih naah chuan, hetiang chhuak a, “ka hai, ka tel velo mai ang” ti mai mai tur hian an biala mipuite hian an thlang dawn em maw ni aw ka ti a. An bial mipui an mahni thlangtute pawh an zahawm ka va tihsak em aw ka ti a. Chuvang chuan, hetiang hi he House a thleng foa tan chuan thil duhawm tak a nilo khawp mai; naupangchhe inkhualtelemna ang mai maia hman chi a nilo e tih hi Pu Deputy Speaker, ka sawi hmasa duh lawk a ni e.

Awle, kan *Motion of Thanks*-ah a zawng a za in kan sawi hman dawn lova, kan sawi hman loh department hrang hrangte hmalaknaah pawh khan lawmthu kan sawi nghal a. Sawitu zawng zawng tena min lawmpuina Lunglei Municipal kan nei tur leh chumi atana ke pen mek, hmalak mek a ni tih hi a lawmawm ka ti. Thu neihna insemzai (decentralization of power) thil harsa tak he sorkarin a Lunglei-ah min han thlen tur hi Lunglei tan chuan rahbi pawimawh leh tangkai, he sorkar hnuaiah kan rap mek a ni a, ‘a va lawmawm em’ tih loh rual a ni lova, min lawmpuitute zawng zawng chungah pawh khan lawmthu kan han sawi a ni.

Tin, hei Union Budget hnuaiah Governor zahawm tak thusawi point 4-naah khan Union Budget hnuai Aizawl by-pass road leh Bamboo link road atana cheng vaibelchhe 600 zet mai hmasawna tur dah a ni hi thil vanduaithlak a ni hauhlo, thil lawmawm a ni. Hetiang zat sum hailut thei tur Chief Minister zahawm tak kan nei hi chu a lawmawm a ni. Ram vannei kan ni ngawt mai a. Ka hriatsual loh chuan hei hi Mizoram History, Union Budget-a kan hming a han chuan ve vah vawikhatna ani nghe nghein ka hria a. Kan MNF sorkar hun chhungah hetiang thil kan tawng hi chu, kan hotute thawhrim leh inpekna rah kan seng a ni; a lawmawm tak zet zetin ka hria.

Point No. 6-na State ralmuang berte zing ami ni zel tura ram mipuite, kohhrante, NGO leh media-te ram leh hnam tana kal zel tarlan a ni hi a lawmawm tak zet zetin ka hria a, a finthak pawh ka ti. Mipui Sorkar, mipui tana mipui siam, mipui nen a thawk mek hi chutiang sorkar a nih zia tarlangtute zinga mi niin ka hria a. SEDP hnuai ram pum himna tura Assam ram nena kan inrina bawr venghim tute tan a barrack, chenna turte, kawngpuite siam a ni mek hian he sorkarina mipuite leh ram leilung a hauhnat zia tarlangtu a ni a. Tun hma te khan hetiang tak hian tan lo la ila chuan tun hnaia kan ramri buainate kha kan pumpelh theih ang a tih zawng te pawhin a ngaihtuah theih rum rumin ka hria a, tu kan demna va nilo sela.

Pu Dy. Speaker, kan Governor thusawi No. 9-naah hian hrileng karah pawh tha thlah chuang hauh lova mawhphurhna hlen mektu Mizoram PWD hnathawh tarlan a ni hi thil pawilo tak a ni. Building hrang hrang leh Leipui dawhte, a te nau deuh phei chu sawisen pawh a ni lo a, chung zinga ramhnuk kuai bik border trade nena inkungkaihna nei, Tlabung Kawrpuichhuah leh Champhai - Zokhawthar siam zawh a ni ta te hi a lawmawm tak meuh meuh a, hei hi ramin a tangkaipui a, a tangkaipuina tur ang taka hman thuai thuai pawh a chakawmin ka hria.

Tin, Pu Dy. Speaker, Point 10-naah hian a tel lova kan awm theihloh thil siam, nunna nei zawng zawng tena kan mamawh em em, kan siam theih bawk siloh, kan tihpun theih bawk siloh a thar pawh kan tharchhuah theih loh a awm a, chu chu 'tui' a ni. Tui lam department hnathawh leh hmalakna hi sawihmaih phal chi niin ka hre lova, mamawhtu leh mamawhna sang zel karah an phur a rit ang, beih avanga siam teuh theih phei chu nisela chuan an bei nasa ngawtin a rinawm a.

Governor thusawiah hian langtham lo mahsela kan sawi tel hram duh chu, Lunglei East bial chhung Ralvawng Solar Water Pump Scheme hnuai hmanni lawka kan hawn tak pawh kha, a khaw neitute lawm zia chu hmutlang ila ka ti khawp mai; ha hipin tun thlengin lawmthu an la sawi a ni. Special Assistance Fund hnuai hian Lunglei-in lawmthu a sawi mai theih tur kan hmabak mekin kan hre bawk a.

Department-te hnathawhna zawng zawngah lawmthu ka sawi a ni. Pu Deputy Speaker, sawi tur dang tam tak karah ka han kai tawi deuh nawk nawk ang a.

Food, Civil Supply & Consumer Affairs Department hnuai hripui rapthlak tak kan tuar lai pawha nghei lova kan awm thei hi thil lawmawm tawpkhawk a ni a, “engtingge an tih theih zawk chu le” tih mai turin kan department leh a changtu Minister thawhrimna a ni a, “hetiang dinhmun min thlen thei hi a mak mang e” tih loh theih pawh a nilo. Chuvangin, lawmthu sawi mawlh mawlh tur a ni. Lunglei-in tun tumah hian lawmthu sawina tur kan ngah hle mai a, zirna lama kan thalaite, kan zir mite an lo changkan theihna tur atan MZU Southern Campus hmalak mek a ni leh hmasawna kal mek zel hi thil hmuh nawm tak a ni a, chak zawk a hma lak a, a tak taka kan hman theihna tura min cho chhuaktu nise ka ti khawp mai.

Pu Dy. Speaker, point 27-na thusawi, Sport & Youth Services Department hnuai kan thalaite nakin lawka kohhran, khawtlang leh ram hruaina hnaa mawhphurhna la mai turte rilru leh taksa lama an than that theihna turin sport lama he sorkar hmalakna hi a fakawm thlawtin ka hria. Hmun hrang hrangah infiamna infrastructure pui tak tak a hung thluah a, thawh zawh tawh, thawh mek leh thawh tur a chhawp thluah mai bawk a ni. Ram leh thalaite tan a chhenfakawm mek a, a chhenfakawm zel dawn bawk tih a lang Chiang Teh Meuh a ni.

Ministry of Minority Affairs, Govt. of India atang hian tun hmate Khan Sport Fund, thalaite infiamna tur chite hi haichhuah a lo la ni ngailo em ni aw, tun hnaiah 2018 hnuah hian hetiang thlalaite tana kan han chhawpchuak zung zung mai hi chu, kan sorkar hnuaihetiang hmasawna a surin a sur sung sung a ni ringawt mai a, thil lawmawm tak a ni ringawt mai a ni.

Tin, Transport Department hnuai kan hmalaknaa langsar silo tangkai em em mai si, tunhma kha chuan a hloh zawngin kan kal thin niin ka hria a. Tunah chuan hei, cheng nuai 200 chuang zet mai kan han hmulet hi chu thil lawmawm tak niin ka hria a, thil inthlakhleng ropui tak kan hmu niin ka hria a. Chubakah chuan, Inland-water Transport tih changtlunna tura Khawthlangtuipui lo lang hi ram pum tan chanchin lawmawm a tlingin ka hria. Hei hian rah tha tak kan ramah, chhim bial mipuite tan pawh arawn thlen ngei dawn niin kan hria a, kan nghakhlel a ni.

Point No. 34-naa lo lang Hripui leh raltlan te enkawl leh tanpuina kawnga kungpuite zinga mi YMA-te tlawmngaihna leh inpekna phochhuah a ni hi an phu em em a, hetiang an hmalakna tarlanna chang kan hria hi a lawmawm; hetiang chawimawi leh lawman chang hria sorkar kan nei hi a mizo a, a kristian rilru hlein ka hria; *Chawimawina Nopui* dawng tlak an ni, YMA hi.

Pu Dy. Speaker, thildang tam tak karah khang kha a zualpui ka han sawi theih a ni a. Lawmna tur tam tak a awm a, a bua an siam phei hi chu ‘Lawmna Bu’ ti ila kan tisual awm lovin ka hria. Chuvang chuan, “he *Motion of thanks* hi lawm takin ka thlawp a ni” tih ka han sawi a ni e. Ka lawm e.

DEPUTY SPEAKER : A lawmawm e. Tunah chuan Er. H. Lalzirliana ilo sawm ang u.

ER. H. LALZIRLIANA : Pu Speaker, ka lawm e. Hei, hun rei tak natna tuarin ka awm a, tun session pawh hi ka hmang thei awm lo mang e aw tih rilru ka neih mek lain, hei, in zingah ka lo tel ve thei hi ka lawm khawp mai a. Thenkhat phur fal deuh phei chuan “Mamit bialah bye-election a awm dawn e” tih rilru lo pu hmante pawh kan awm ni tein ka han hria a. Amaherawhchu, in tawngtaina azarah leh Pathian hnathawh avangin vawiinniah in zinga ka tel ve thei hi lawmthu ka sawi ni sela.

Kan Governor thusawi leh Tuirial bialtu MLA-in hemi chungchanga *Motion of Thanks* a putluh chungchangah han sawi ve duh tlem ka nei a. Governor hian a open remarks-ah hian, “I am confident that the House will conduct its session with a deep sense of responsibility and purpose and that the reputation and dignity of the House as also the high standard of debate will be maintained” tih a rawn dah kalh mai a.

Hei, vanduaithlak takin i vei lama mite vawiinniah he *Motion of thanks* sawihonaa an tel ve lo hi pawl ka ti khawp mai a. Social media-ah tu pawhin thil an post a, Mizo phei chu kan uar fal hle mai a. Ka chhut ka chhut ve dan te leh hnamdang, a bik takin helai rorelna khawl bikah phei hi chuan kan tribal puiteah pawh hian keini anga social media-a inngat thuk hi an awm awm lo mang e aw ka ti a. Vawiin nia kan thiante rawn tel theih lohna chhan hi a vanduaithlak ka ti a, social media-a thu leng vel, engmah proof-na awm silo vawiina an chhuah tauh pui ta mai hi pawl ka ti a, kan Govenor ina open remarks-a a thu rawn sawi a hlawhtling lo hi a pawl ka ti khawp mai.

Governor thusawi zingah hian tlem tlem han sawi duh ka neih chu, a point 3-naa lo lang Lunglei LMC han ding tura hi kan chhim lam unaute tan chuan a vanneihthlak hlein ka hria a, sorkar achievement ropui tak niin ka hria a, Governor thusawiah hian a lawmawm ka ti a. Sorkar hi han thlir han thlir hian kum eng emaw chen kha chu a sa him lai atangin kan lo thlir ve a, sorkar hmasa function dan te, mipui rawng an bawl dan te leh harsatna hrang hrang awmte pawh. Tun sorkar hian a dik tak chuan a perform hi chu kan perform hle a ni lawm maw ni le tih hi Zoram mipuite hian an hriat ka ring a ni. A phekk tir atangin hlawhtlinna lian pui pui a rawn lang nghal hi a lawmawm ka ti a, LMC ding tur te, Union Finance Minister-in union budget 2022 - 2023 a pharhah khan kan hria a, “the brand-new Prime Minister’s divine scheme” a ti kher a nih kha. Khatah

khan Mizoram a lo lang a, 500 crores for construction of Aizawl by-pass on the western side Sihmui to Muallungthu tith, 100 crores of pilot project for construction of bamboo link road tih te, hei, bamboo link road kher kher phei hi chu khawvela la awm ngai lo a nih ka ring a, a *brand new* khawp mai. Kan House Leader zahawm takin “a hma pawh khan ka phuahchawp” a tih kha ‘peace bonus’ tih ang deuh kha a ni a. Khawvela la awm ngai lo anih ka ring a, bamboo link road kher kher a rawn tichhuak hi a ropui hle a ni.

He tia Governor speech kan han hmuhah hian keini hovin kan lo thlir ve ran ran, MLa anga kan lo thlir chu, kan bial thilte a awm em tih te kha a ni a, kawng hrang hrang, point hrang hrangah hian kan bial chungte pawh he sorkar hmalakna ina hlawhtlinna a rawn ken telah hian a hming hmera han sawian tur kan han nei hi hi a ropui kan ti khawp mai a, a bial ang pawhin lawmthu kan sawi a.

Tichuan hei, point 10-naah hian PHE hnuaiah JJM, keini bial phei khu chu a benefit hmasaah kan tang a, khaw eng emaw zah chu cover tawh a ni a. Tui harsatna leh kan beisei ngamloh khaw tam tak tan chuan a ni a. Hei, Bru khuate bialah chuan a tam a, tin, thingtlang kil tak takte kumtluana tui harsatna kan tawh thinnaah tunah mahni inah tui herhhaw theihin kan nei ve ta a. Tuna hnathawh turah pawh hian eng emaw zah chu kan la tel bawk a, a lawmawm kan ti hle a ni.

Tichuan hei, tunah pawh kan hria a, eng chen nge harsatna kan tawh dawn chu kan hre lova, sorkarin a tifel leh thuai turah kan ngai a. Kan essential comodities petroleum product tanker strike te a han awm deuh a, amaherawhchu Minister zahawm tak leh IOC te, Hindustan Petroleum te nen meeting naktuk lamah an nei ho leh mai dawn a.

Kan hria a, hmundang atanga kan lo thlir veah chuan, khang hunlai khan harsatna kha a lian khawp mai a, keini bial phei chu a tuartu kha kan ni nasa thin khawp mai a kawng chhiat nen, gas te phei chu Tripura lam distributor kan zuk ring ve tawp mai a ni; to deuh deuh, black-in kumkhatah a normal kha chuan vawihnih te, vawithum te kan dawng thin kha a nia. Tunah chuan harsatna nei miah lovin kan han dawng chho a, buhfai te, gas te, petroleum chi hrang hrangte hnianghnar tak maia kan Minister chak tak mai hnuaiah tun thlenga Zoram mipuiten enjoy tur kan nei hi a lawmawm kan ti a, sorkar achievement ropui tak niin kan hria a ni.

Tichuan, hei School Education hi keini bial hi ‘aspirational district’ tih bik te kan han ni a, keini tan phei chuan a lawmawmna hi a sang em em lo thei lova. Zirtirtu la indaih chiah lo mah ila, eng emaw chen puhruk a han nite; tin, Science leh Commerce subject kan han neihte, hei a rawn tarlan zingah Adult Education, “Patna Ligna Abhyan”

Mizo tawng chuan “Ziak leh chhiar inzirtirna” a ni mai a, district 4-te zingah cover kan han ni ve a, Siaha, Lawngtlai, Lunglei leh Mamit-ah chuan mi 22,800 illiterate adult kha target niin, ziak leh chhiar thiam a siam vek tur an ni.

Tin, Sorkar achievement-a ropui ber, Governor pawh ina a sawi chhuah “Land for establishment of Mizoram University, Southern Campus in Lunglei has been acquired at Bukpui”, a ti a ni. Southern Campus ram neih fel tawh a nih hi a lawmawm a, kan Land Revenue Deptt. thawh that leh a achievement pawh niin kan hria a. Tin, kan sawi ang khan kan bial chhungte a lo lang em tih te kan ngaihven ve a, hei, astro turf phah zingah synthetic football, Lengpui football turf te kan han nei ve ta te hi mumang ram a ni a, Lengpui ho khu an beidawng tawh a ni, sorkar hmasaah khan. Khulai khu inkhelh thiam veng an ni si a, mi inkhel thiam khu an chhuak fo a ni, ISL-ah pawh. Khang Mumbai team-ah pawh khan Lengpui tlangvalte an tel zak zak tawh a, an beiseina kha a sang ve a ni, sorkar hmasaah khan. Amaherawhchu, tihhlawhtlin loh zingah khan an han tang ta zel a, kan sorkar thar tirhah kan Sport Minister chak tak duhsaknate kan han dawng kan ti lo thei lova, sorkar hmalakna a ni a, tunah chuan hawn theih reingin kan peih fel tawh a ni. Kan lawm khawp mai, Governor speech-a a han tel hi a kan lawm hle a ni.

Tin, district angah te, Mamit Residential Sports School, District Sports Complex tih te tunah a kal mup mup a, mipui kan lawm hle a. Khawthlang fate tan kawl a eng ve tawh dawn e, tih te kan han ngaihtuah a kan lawm hle a ni.

Tin, la awm ngailo, IWT (Inland Water Transport) heng sorkar achievement zinga rawn pholan a ni hi a ropui a, sorkar hi a function-in a perform a ni tih hi mit nei leh beng nei chuan hre rawh se tih ang a ni. Amaherawhchu, hre duhlo tlat hi kan awm avang hian kan hrelo a ni mai a. Engpawh nisela, wawiina Governor lawmthu sawina member zahawmtak Pu Dawngtea’n a rawn put luh hi keipawhin lawm takin ka thlawp a ni e. Ka lawm e.

DEPUTY SPEAKER : A lawmawm e. Dam takin a rawn ding leh thei a, a ropui hle a ni. Tunah chuan Member zahawmtak PuLalmuanpuia i lo sawm ang.

PU C. LALMUANPUIA : Pu Deputy Speaker, ka lawm e. Hei, wawiinah member zahawmtak Pu K. Laldawngliana’n kan Governor thusawia lawmthu sawina Motion of Thanks a rawn pulut hi Pu Dy. Speaker, ka rawn thlawp duh a.

Kan Governor thusawi ka en hian lawmna tur tamtak ka hmu a. A hmasa berah chuan kan Governor hian tuna *Motion of Thanks* rawn pulut tu Pu K. Laldawngliana,

tun hnai lawk bye-election Tuirial biala neiha thlan tlin anih lawmpuina thu a rawn tarlang hi a lawmawm hlein ka hria a, keipawhin thinlung takin ka lawmpui a ni.

A pahnihnaah chuan Pu Dy. Speaker, ropui ka tih deuh chu, Lunglei Municipal Council lo ding tur, Council of Minister meeting-a an lo pass ni 16th November 2021-a approve ni ta hi a ropui ka ti a, a lawmawm ka ti khawp mai. A hma lawk pawh khan member zahawm tak tak te khan an sawi tawh a, power kan sem zaina a ni tih chiang takin a langin ka hria a, a lawmawm ka ti a ni.

Tin, Lunglei hi khawpui pawimawh tak a ni a, khawpui enkawltu mumal tak mai an han nei tur hi thinlung takin ka lawmpui a, kan Governor-in a rawn sawi chhuak pawh hi a lawmawm ka ti hle mai. Khawpui hi enkawl a ngai khawp mai a, kan insak tur chungchangah ringawt pawh hian ruahmanna lo siam thui a ngaih zia chu, hei tunah Aizawl Municipal Corporation kan nei a a lang chiang hlein ka hria a. Tin, Lunglei pawh hi a takin a han function ang a, “Engtin nge a hma khan kan lo awm le”, tih mai tur a ni dawn a. Chuvangchuan, Lunglei mipui te thinlung takin ka lawmpui takzet a ni.

Tin, a 3-naah chuan, Pu Deputy Speaker, Union Budget Session an nei zo chauh a, khatah khan chiang taka rawn tarlan a awm a. Aizawl by-pass road siamna tur 500 crore leh Bamboo link road siamna tur 100 crore te a rawn lang ta nawlh mai hi a ropui ka ti a, kan House leader zahawm tak kan CM hian a ti mai mai lo ani tih hi he budget-a atang hian chiang takin a lang a ni. Heng hi thil thleng khat tak a niin ka hria a, a taka a hlawhtlinna rawn lang hi a ropui a, kan khawpui, kan ram tan hei hi a tangkai dawn em em a, kan Governor-in a rawn sawichhuak hi a lawmawm ka ti a, kan House leader chungah pawh lawmthu ka sawi duh a ni.

Tin, kan House leader chan PWD hnuaiah hmasawanna rahbi chi hrang hrangin a kal a, project lian tak tak Champhai, - Zokhawthar road te, Tlabung - Kawrpuichhuah te, Chhumkhum - Chawngte road te a tam mai Pu Dy. Speaker, heng zawng zawngte hi lawmawm ka ti a, a tak takin hmasawanna kan kawngpui en pawh hian a lang a ni. Nikum, kum tawp lam pawh khan Champhai lam Hnahlan thleng kan hotute hnung zuiin ka han kal a, chutah pawh chuan hmasawanna thar a hmuh theih a ni. Kawngpui kan lai a, kawngpui kan ti lian a, lian tha zawkin a lo chhuak dawn a, heng zawng zawng hi Pu Dy. Speaker, hmasawanna rahbi tun ministry reilote chhunga lo lang a ni a, a lawmawm ka ti khawp mai.

Tin, kan sawi hmaih hauh loh tur PHE Deptt. hnuaiah hian JJM (Jal Jhivan Mission) hnuaiah hian hei Zokhaw lam khaw 209-a in 61,850 lai maia tui pek annih te, khawpui-ah mi nuai chuang hnena water connection pek a nite hi a lawmawm khawp mai a, tui thianghlim kan mamawh a, hemi kawnga hmalatu, a deptt. changtu kan CM

zahawm tak chungah pawh hian lawmthu kan sawi duh a, an hmalakna hi a chhuanawm tak zet a ni.

Tin, Covid leng karah ZMC pawimawh zia chu kan hria a, oxygen mamawhna a sang em em a, oxygen plant lian zawk bun a ni te hi a lawmawm ka ti khawp mai a, khum pawh 150 atangin 268-a han tih belha a awm te hi a lawmawm khawp mai. ICU mamawhna a sang em em a, 13 chauh awm thin kha khum 13 atanga khum 48 awmna tura ruahmante hi Pu Dy. Speaker, a lawmawm ka ti khawp mai. Lawmthu sawina tur hlir a niin ka hria a, kan Governor thusawi hi a lawmawm tak zet zet a ni.

Tin, Rural Development Deptt. hnuaiah hian chi hrang hranga hmasawna lo lang zinga ka lawm deuh chu, Covid pandemic hnuaiah Zokhaw lama kan unaute harsatna tamtak an tawh a, inkharkhipna nasa tak hnuaiah pawh heng ‘*Ni 100 Inhlawhna*’ kan tih ang chi te hian a chhan em em a ni tih kan Governor thusawiah hian a lo lang a. A changtu Minister-in hneh takin a khai khawm a, RD Department hnuaia *Ni 100 Inhlawhna* tha takin an hmu thei tih a lo lang hian min ti lawm em em a, a changtu Minister chungah pawh lawmthu ka sawi duh a ni. Kan Governor thusawi hi a pawimawhin a lawmawm ka ti em em a ni.

Tin, Horticulture Department hnuaiah pawh hian hmasawna rahbi a rawn lang kulh mai a, chung zingah chuan tomato te pawh quintal tam tak mai tharchhuah a ni te hi a ropui ka ti a. Tin, zikhlum pawh quintal za chuang thar chhuah a ni te hi a lawmawm em em a, kuthnathawktute hmasawna ropui tak a ni. Kan tharchhuah ngei kan han ei thei te hi a lawmawm hlein ka hria. Tin, Dragon fruit-ah pawh hmasawna tam tak kan hmu a lawmawm tak zet zet a ni.

Tin, Vety lamah pawh hmasawna a rawn lang a, district hospital sak zawh a ni te hi a lawmawm khawp mai. Vety lamah hian hmasawna thar lian tak tak a rawn lang a, chung zingah chuan Rural Animal Health Center 37 lai Veterinary Dispensary-a hlankai a ni te hi a lawmawm em em in ka hria. Tin, Veterinary Dispensary paruk kha District Hospital-a hlankai a ni te hi hmasawna a ni a, a lawmawm em em a ni.

Tin, Lunglei lamah Ar note mamawhna a sang em em mai a, Ar note vawikhatah sangnga awpkeu thei tura ruahmanna siam a niin, tunah hian Ar note kan han tharchhuak theite hi lawmawm ka ti khawp mai.

A tawp lam kan hnaih dawn ang a. Transport Department hian revenue a lo la teuh maite hi lawmawm ka ti a. Tin, sawi hmaih miah loh tur chu, upa lam (senior citizen) te, mittel te, cancer vei te, HIV positive te tan bus service-a concession an pe

te hi, mirethei thleng phak rawngbawlna ropui tak mai a ni a, a lawmawm ka ti hle a, miharsa zawk te tana an inpekna hi a ropui ka ti hle a ni.

Tin, ka bial chhung Chanmari-a Mizo High School-ah sawn multi-level parking siam a ni a, tunah hian kan sa mup mup a, hengah hian lawmthu kan sawi tak zet zet a ni.

Tin, Inland Water Transport a rawn lang hi a ropui ka ti a, thil thar, bung thar kan kai a ni. Tin, tui kawng kan han hmang tangkai turte leh cheng tam tak mai approved a ni te hi a lawmawm hle a ni.

A tawp berah chuan, Pu Deputy Speaker, kan Governor thusawi a lawmthu sawina Motion hi ka rawn thlawp a ni tih ka rawn sawi a ni e. Ka lawm e.

DEPUTY SPEAKER : Awle, tunah chuan member zahawm tak Dr. Z.R. Thiamsanga i lo sawm ang u.

DR. ZR. THIAMSANGA : Pu Deputy Speaker, ka lawm e. Vawiinah hian kan Governor zahawmtak thusawi *Motion of Thanks* Pu K. Laldawngliana'n a rawn putluh hi lawmawm ka ti a, sawi pawh a chakawm hle a ni. Member tinte hian sawiho ila, ngaithla ho ila kan tih rualin, senior zawka kan ngaih ten vawiina min han chhuahsan hi keini a lo lut thar tan chuan a hrilhhaithlak hle a ni. Tin, he House zahawmna hi kan ti khawlo deuh em aw tih mai te pawh a awl a, pawl ka ti khawp mai. A bik takin kan member zahawm tak takte chatuan ram min pan san ta kan sunna hun pawimawh tak mai te min han telpui thei lo hi a hreawm ka ti a, a lungchiatthlak hlein ka hria a ni. Engpawh nise kan Governor thusawiah hian kan ngaithla tam tawh a, a vai chuan kan sawi thei lo ang a.

Kan Governor zahawm takin Pu K. Laldawngliana, *Motion of Thanks* rawn puluttu ngei mai Tuirial Bial Bye-election a rawn tling a lawmpui thu a rawn sawi hi kei pawh ka lawmpui em em a ni.

Governor thusawi no. 3-na, hripui leng karah AMC-in community quarantine facilities leh Covid Care Center bawlhhlawhte uluk tak leh fimkhur taka an paih thin thute an han sawi a. Kan AMC tena Councilor ward tina tan cheng 2.5 lakhs theuh Covid dona a tan an han pechhuak thei te hi a lawmawm khawpin ka hria a ni. Kan AMC te hi tun hun khirh tak karah an thawkrimin an fakawm hle a ni.

Tin, Lunglei Municipal Council din remtih tawh sorkarin ni 22.12.2001 a a chhuah theih te hi Lunglei bial tan mai nilovin, Mizoram pum tan lawmawm tak a ni. A

lehpekah chuan Champhai District-ah pawh kan la din lovang tih a sawi theih lova, beisei takin district dangte pawh hian kan thlir reng a ni.

Governor thusawi No.4-na Union Budget pharh takah khan Aizawl by-pass road Sihhmui to Muallungthu laihna tur crore 500/- lai mai te leh thildang a crore 100/- lai mai Mizoram tana dah a ni hi a lawmawm hlein ka hria a, sawi mawlh mawlh tlak niin ka hria. Hrileng karah sum leh pai harsat em em karah pawh hetiang khawpa kan sorkarin a haichhuak thei hi a lawmawm khawpin ka hria a ni.

Tin, Governor thusawi No.7-naah Mizoram Police ten tun ang boruak karah pawh damdawi cheng 51.83 crore hu an han man theite, dan leh thupek kenkawh chungchangah pawh kan rinpui ber an ni a, dan zawm lo atangte pawhin crore 2 deuh thaw an lo hmu chhuak hi a lawmawm hle a, a sum lam ngawr ngawr kan sawina ni lovin, kan Police-te hi an fakawmzia a rawn tarlang niin ka hria a, a lawmawm hle a ni.

Tin, no.8-naah hian mi tam tak hian Mizoram State Legal Service Authority leh State Legal hnathawh hi kan lo ngaihven em em lo thin a, chutih rual chuan thubuai 1,389 zet mai an han chingfel te hi a lawmawm hle a ni. Hei hian Mizoram State Legal Service Authority-te pawh hi a tilang hlein ka hria.

Tin, PHE Department lamah kum 2021 - 2022-ah JJM hnuaiah chhungkaw 61,850 leh khaw 209 zet tui thianghlim intur an pe fel thei hi a ropui hle a. Chutih lai chuan PHE Department hnuaiah hian keini Champhai ngeiah pawh project ropui tak mai, Keilungliah Champhai-ah khian ruahmanna NLCRP hnuaiah Construction of Dam, Reservoir and Development of Recreation Centre, Keilungliah tihte tunah khian peih thothinga a han awmte khi keini Champhai District tan phei chuan a lawmawm leh zual a. Khi khi nakinah kan economy thleng pawhin min khawih thei thil a ni a, thil dang tam tak hmundangah pawh ni se, mahni bial chhungah thil ropui tak a awm hi a changtu Minister-te leh a department-te chungah pawh lawmthu kan sawi duh a.

Kan ngaithla tam tawh a, Education Department-ah heng Covid inkhuahkhirhna karah pawh zirtirtu indaihlohna SEDP hnuaiah tam tak kan han chhawr a, tun hmaa zirtirtu indaihlo tak takte pawh kha tunah chuan zirtirtu indaih tak tak, zaa za chu ni theilo mahse, nasa takin kan indaih chho a, a lawmawm khawp mai a. Hetiang karah zirna pawh tluang takin kan kal chho thei a, Covid karah pawh zirlai graduate 3000 chuang zet mai Arts leh Science stream-ah te, Commerce stream-ah te kan han chher chhuak hi chu a ropui hlein ka hria a. Chuvang chuan, hetiang boruak rit tak karah pawh kan Education Department, a changtu Minister-te leh a department hnathawhna Governor-in a rawn fak te hi a lawmawm a.

Infrastructure leh thildang tam tak te pawh a rawn sawi a. Kan ngaithla tam tawh a, miretheite Covid-19 in kum hnih deuhthaw min han chenchilh a, chutiang karah chuan thingtlangah kan mirethei tete te tan inhlawhna te pawh a harsa a, Rural Development changtu Minister-te leh department-tena miretheite tan *Ni 100 Inhlawhna* pawh kumdang aia nasa zawk a, ni 100-a ni 100 kan thawk theite hi a ropui hle mai.

Agriculture te, Horticulture te kan ngaithla tawh a, hetiang boruak karah pawh *Vegetable supply chain*-te an kalpui a, buh leh bal pawh kan thar tam a, a chang chuan kum dang ai mahin kan thar tam a ni. Chuvang chuan, hripui karah pawh kan Agriculture leh Horticulture changtu Minister-te, department hnathawh ropui zia a rawn tarlang te pawh hi a lawmawm hlein ka hria a. Vety-te pawh kan hria a, artui tih keunate, ar note tih keunate leh thildang, ran hripui lenna karah pawh an hnathawh tam tak, Rural Animal Health Centre upgrade te a lo awm chhova, an hnathawh hi hetiang karah pawh hian sawi sen loh a awm a ni.

Sport chungchangah te pawh kan hria a, hetiang boruakah pawh hian infrastructure-ah nasa takin kan ram hian thalaite tan hmasawna turin (**Deputy Speaker:** I hun a tawp a...) Pu Deputy Speaker, kan tlem bawk a, dar 4:00 PM thleng kha chu min ngaithiam ang chu maw, ka sawi tui ve laklawh bawk si a, min lo hrethiam la, zawngtahte chu chu ka inpe tel ve ta lo a niang, a rawn sawi si lova, a ei lo ani ang. Chutiang chu a ni a, kan Sport Minister-te an fakawm khawpin ka hria a, he department hmasawna Governor-in a rawn sawilang hi a lawmawm ka ti a.

Forest-ah pawh hian India ram pumah 2.8 deuhthaw hi forest kan neih a ni a, a changtu Minister leh a hote an thawkrim hle tih a chiang a, kan ram 84.52% forest-ina min han cover hi a ropui a ni. Chuvang chuan kan veng tha tih a chiang a, a lawmawm khawpin ka hria; an hnathawhna te, an fakawm a ni.

Department dang, Power & Electricity leh Home Department-ah te sawi tur tam tak a awm a. A bik takin Power lamah pawh hian kan bial chhung a ni bawk a, 132 kV line East Lungdar - Khawzawl te pawh kha an rawn tipuitling a, hmun dang dang te pawh. A bik takin kan bial lam thil anih avang khan kan sawi ve hrim hrim a, a changtu Minister-te leh hnathawktute chungah lawmthu ka sawi a.

Revenue pawh kha sawi leh ka duh a. Hetiang boruak karah House Pass 584 nos leh LSC 885 nos lai mai an han ti chhuak te rawn tarlan a ni a. Hetiang boruak karah pawh revenue tam tak kan hmuh theih phah a, a lawmawm hlein ka hria.

A tawp berah chuan, Health Department kha kan ngaithla tawh a, Covid-19 karah kan ram kum 2 deuh thaw kan han buai a, sorkar, NGO hrang hrangte, kohhrante kan

vaia thawhrim rah hi kan tel kan ti mai ang chu, case chu a tam, amaherawhchu, mi tam takin nunna chan mah sela, kan case tam ang huin India ramah death rate-ah kan State hi a hniam ber pawl kan niin a lang a, hengte hi kan zavai thawhrimna rah a ni. Tin, health infrastructure-ah pawh sorkar hmasa kum 10 chhung khan ICU khum 5 chauh kan nei a, tunah chuan Civil Hospital-ah ringawt pawh khum 10 kan tihbelh thei a, tunah khian khum 20, khum 30 deuhthaw awm theihna hawn mai tura awmte pawh tarlan ni lo mahse, a lawmawm khawp mai a. ZMC-ah ICU khum 13 chiah kan nei a, tunah chuan khum 48 kan nei te, khum 150 thin 300-a upgrade an ni te, oxygen plant Civil Hospital-ah tunhmain 200 litre/min kan neih kha tunah chuan 2,000 litre/min chuang kan han nei tawh a. District hmun hrang hrangah pawh entirnan, Champhai, Lunglei leh hmundang dang pawh oxygen plant kan neih mumal lohna, 80 litre/minute chauh tichhuak thei kan neihnaah te khan, tunah chuan 500, 1000 litre/minute tihchhuah theihna kan hung ta fur mai a, a ropui khawp a ni. Chuvang chuan infrastructure Health-ah pawh hian hma kan sawn a.

Pu Deputy Speaker, tlemte minute khat chauh, miretheite tana kan chhawr em em Mumbai, Gwuahati-ah pawh kal ngai tawh lo tura cancer hemna khawl tha ber chi leh tunlai ber chi ‘Linear Accelerator’ kan han nei te, Pu Deputy Speaker, va en ve teh u, kan House Leader CM zahawm tak hian minrawn hawn sak a, a khawl pawh kha pawh hi a la hmu bik lo ani ang, “sai tiat a ni” a ti a, a lian a ni saw saw, a ropui khawp mai a. Sawtiang saw ka hriat sual loh chuan India rama sorkar Hospital-ah chuan a nei hmasa ber pahnihna kan niin ka hria. Cancer hemna khawl tha chi a dang pawh kan neih mek zel hi a lawmawm takzet a. Tin, Cancer Hospital khum 30 awmna tur tunah ruahman mek a ni a, hawn tawh a ni bawk am, hmasawna hi a chak hle a ni Health-ah hian. Tunah hian Cancer Hospital tur Japan (JICA) hote nena tangkawpin ruahmanna siam mek a ni a, khum 500 chuang awm theihna, India ram State-ah pawh, North East-ah phei chuan a pakhatna tur ang hiala ruahman a lo ni te hi a changtu Minister thawhrimna te leh kan CM, kan House Leader leh a department thawhrimnaterawn tarlang chiah lo mahsela, Covid hrileng karah pawh hmasawna tam tak kil tina a langte hi a lawmawm hle a, Pathian malsawmna kan dawng a ni.

A tawp ber atan chuan, he *Motion of Thanks*, kan MLA zahawm takin arawn putlul hi ka thlawp a ni. Ka lawm e.

DEPUTY SPEAKER : A lawmawm e. Kan lawm hle mai. Tunah chuan Member zahawm tak Dr. K. Pachhunga i lo sawm ang.

DR. K. PACHHUNGA : Pu Dy. Speaker, ka lawm e. Vawiinah kan Governor’s Address sawi theiin Pathianin min hruai a, a lawmawm ka ti a. Hun khirh karah pawh Sorkar leh kan Leader-te hmalakna leh hlawhtlinna phekk eng emaw zat kan

Governor-in a rawn pho chhuak a, lawmawm ka ti a. Kan boruak tawn kan hre vek a, duh angin nunphung a mumal thei lova, chuti chung chuan kan hotu ten theihtawp an chhuah a, kan mamawh em em kan Aizawl khawpui chep tak mai traffic kan buaina solve turin Union Budget-ah Aizawl bypass ₹500 crore ngawt mai a lo lang a, a lawmawm ka ti a. A chhan chu traffic problem solve tur chuan bypass hi tih makmawh a nih a, Chhim leh Hmar atangin Aizawl lut lovin motor liante a kal ang a, nasa takin mipuiin kan chhawr ka ring a.

Tin, kan rama resource kan neih chhun kan mau neihte a awmna a thuk em em a, duh angin mau tha a sah theih tawh lova. Chuti lain sum tam tak hmuhna tur bamboo link road kan Chief Minister zahawm takin central-ah thlenin Union Budget ah a lo lang a, a lawmawm ka ti tak zet a. Mau phurhna tur chauh a ni lova, lui ruama balu leh thil dangte pawh a phurh chhuah theih dawn a. Chutiang chuan leilet leh nulte siam nan kan hmang thei dawn a, a kalkawng zawng zawngte kha huan thlai siamna a lo ni dawn a ni. He bamboo link road hi zofate leh Mizoram economy chawi chhuahna tur a ni tih a lang chiang em em a, a lawmawm tak zet a ni.

Tin, Lunglei khawpui leh a mipuite hmasawn nan mi thahnemngai, mi tlawmngai leh puitling zawk ten Municipal Council kan lo beisei thin a. Hun khirh tak karah vawiinah Lunglei Municipal Council min han pe tur hi a lawmawm tak zet zet a ni.

Tin, Mizoram chhim lam chauh nilo, North-East student-te tana University, Southern Campus hmun tur kan sorkarin a tifel a, a hlawhtlinna chu central thu ni a. He Southern Campus hi a lo hlawhtling a nih chuan, Aizawl leh North-East hmun hrang hrang atangte a subject neihte azirin an rawn pan dawn a. Chutiang chuan kan thenawm Bangladesh leh Myanmar atangte pawhin international student te pawh kan nei thei a ni.

Tin, kan hriat angin Covid-in min nuai a, kan damdawi in te a tlabalin khawl lamah kan pachhe em em a. Chu chu hriain kan hotute leh sorkarin theihtawp a chhuah a, ZMC-ah khawl changkang tak dahin sap ram tih angte kan ti ve thei ta a. Chutiangin District hrang hrang Hospital-ah te test-na khawl thate kan nei a, Lunglei-ah pawh RTPCR khawl kan bun theite hi a lawmawm tak zet a. Tin, kan damloh kan mangan tak zeta mihring nunna chhanhim nan oxygen kan mamawh a, tunhmain oxygen lamah kan tla bal em em a, district tin hospital leh kohhran hospital-ah kan mamawh taw a awmlo deuh vek a. Tunah chuan sorkarin theihtawpin hma a la a, Prime Minister Care Fund atang leh DRDO atangin Oxygen Plant lian Aizawl, Lunglei, ZMC leh District dang dangah te dah a lo ni hi medical lamah hian Mizoram hi bung thar kan kai a, a lawmawm tak zet zet a ni.

Tin, kan hriat angin Mizoram hi tlang rama awm kan ni a, tui kan harsa em em a, global warming avangin tui kan harsa tial tial a, tuihna a lo tlem a. Chu chu sorkarin theihtawp chhuahin central scheme-te nen thingtlang hmun hrang hrangah ni zung chakna hmangin tui pump a ni ta te hi a ropuiin a lawmawm tak zet a, mipuite harsatna nasa takin a chhawk a.

Tin, mipuite ei leh barah harsatna nei lovin, gas leh buhfai, electric supply-ah te kan ramah buaina em em awm lovin security lamah pawh mipui kan zalen a, kan him a, kan hlim bawk a ni.

Health leh Education-ahte mipui mamawh ngaihtuahin hun khirh karah pawh kan sorkarin theihtawp a chhuah a. Chuvangin, mi pangngai chuan ‘Sorkar tha’ an ti a ni. ‘Sorkar tha’ han tih hian mipui mamawh pe thei, ei leh bar, communication, health, education leh security concern te an ni a, chutah chuan kan sorkar hian theihtawp a chhuah a ni. Tin, thalaite hmakhua thlirin sports infrastructure leh incentive te pein hlawhtlinna tam tak pawh a awm bawk a ni.

Kan hriat angin Agriculture leh Horticulture lamah kan pachhiat zia a lo lang a. Covid avangin lockdown te a ni a, tin, ramri a buai avangin harsatna kan tawk a. Highway te min dan pin sak chungin sorkar leh mipuiin theihtawp kan chhuah a, kan production hi nasa takin a pung a. Horticulture lamah kan hriat angin tomato-ah pawh kan intodelh tan a, Veterinary lamah ar leh sangha-ahte theihtawp mipui te nena tangin sorkarin hma a la a, hlawhtlinna tam tak a rawn lang hi “Pathian kaihhruaina leh a malsawmna dawng Sorkar, mipui Sorkar tha a ni” a tih loh theih loh a ni.

Tin, kan hriat angin ei leh bara intodelha mi harsa zawkte an lo dinchhuah nan, hun khirh karah ACDP pawh kan sorkarin kalpui a tum a, tin, kalpui tawhte pawh a nei a. Chutiang chuan hun khirh eng ang mahse he sorkar hian Pathian malsawmna a dawng a, Governor’s Address-a lang lo ka bialah pawh thil tam tak a awm a, kan lawm tak zet a ni. He hlawhtlinna hi vawiinah i veilama thute hian min lawmpui ve se kan duh em em a ni. Kan ramrin harsatna ruahthimpui a tuar a, ramri harsatna te, hnam anga harsatna kan neih lai tea hlawhtlinna tam tak kan hmu hi an hre chak lo nge maw ni tih tur a ni a. Speaker kaihhruaina an duh lova, Pu Dy. Speaker, i kaihhruainaah pawh an awm lo leh zel hi chu a dik chiah lo a ni. Ram leh hnam hi an hmangaih lo tak zetin ka hria. Chuvang chuan, a thlangtute leh vawiina he Assembly Session boruak thlirtute pawh hian tute nge ram hmangaih tihte pawh kan hriat a thain ka hria a. Hun khirh leh harsa, ramri buai leh hri leng kan tawk chung pawhin theihtawpin Pa chan changin leh thlan tui farin mipuite tan he sorkar hi a thawk a. Kan Governor Address hi a ropuiin lawmawm ka ti a, a zavai hian ka thlawp e. Ka lawm e.

DEPUTY SPEAKER : Tunah chuan member zahawm tak Dr. Vanlaltanpuia ilo sawm ang.

DR. VANLALTANPUIA : Pu Deputy Speaker, ka lawm e. Nimin, Ni 22.2.2022 khan His Excellency Dr. Hari Babu Kambhampati, Governor zahawm takin he House zahawmtak hi a address a. Tichuan, chumia kan lawmzia entirnan kan member zahawmtak Tuirial bialtu Pu K. Laldawngliana, MLA-in he a lawmna motion a rawn putluh hi support ve a thain ka hria a.

Kan Chief Minister zahawmtak Pu Zoramthanga kaihhruai sorkar hi kum 3 lai a lo ding ta a, hei vang hian achievement tam tak sawi tur a awm a, kan Governor hian a rawn sawichhuak nasa em em a. Chungte chu vawiinah hian kan sawi vek seng lo ang a, a pawimawh zual ka tih te ka hsn sawi ang a.

Chona pakhat hian a bul tan ka duh a. Hunkhirh, pandemic-in min nuai lai hian ram hruiute chungah mipuiin rinna an nghat nasa em em a ni. Hei vang hian keini ramhruiute pawh hi incho nawn leh ta ila, mipui leh ram tana tha kan rel em tihte hi inngaihtuah fo a thain ka hria a.

Pu Deputy Speaker, vawiinah hian thahnemngai taka ram rorel tur nia ka inngaih laiin, i veilama thu hoten min chhuahsan diak mai hi a paw ka ti a. Tunlai hian social media-ah thil tih hluai kan ching a, dan hmanga inbeihnate a changin a awm a, a changin social media inbeihnate, politics inbeihna te a awm a, han tuipui hluai mai te hi kan ching em em a. Tun tuma min chhuahsanna chhan te hi han enchiang ila, a tehfung (parameter) pawimawh tak, social media khawilai emawa tuten emaw an sawi hi house han chhuahsanna chhan tlak a ni dawn emaw ni le a tih theih a ni. Ram kan hmangaih dan hi kan inenchian a ngai viau a ni tih kha ka sawi hmasa duh a ni.

Pu Dy. Speaker, kan Governor thusawiah hian, Mizoram-ah Election Department-in a enfiah hnu Ni 15.1.2022 khan final electoral roll a tichhuak a ni tihte a rawn tarlang a. Mizoram-a vote nei thei zawng zawng hi mi 8,33,426 lai mai kan lo awm ta hi a lawmawm hlein ka hria a ni.

Tin, PAD-in sum harsa karah Ex-MDC, thahnemngai taka hna lo thawk tawh tute tan ₹71.38 lakhs lai kan hruiute hnena a pe chhuak thei hi a lawmawm hlein ka hria a ni. Tin, Lunglei lamina kan lo nghahfak, Municipal Council din a nih tur thu a rawn sawi hi a lawmawm ka ti em em bawka a ni.

Kan hriat angin, Union Minister-in tun hnai Ni 2.2.2022-a Union Budget a pharh, passed ni ta-ah khan Mizoram tana thil hlu tak mai budget bu ah a lang a. Ni 1.1.2015

khan NITI Aayog din tan ni a ni a, a hma chuan Planning Commission kha a ni thin a. NITI Aayog din anih hnu hian budget bu a Mizoram pual capital expenditure tur atana kan lan vawikhatna a ni hial em aw ka ti a, hei hi thil lawmawm tak a niin ka hria.

Kan Chief Minister zahawm tak Pu Zoramthanga a fakawm hlein ka hria a, ‘timely intervention’ ti mai ila, a hun taka inrawlh a thiamin ka hria a, Mizoram tana thil hlu tak mai a sawi chhuak hi lawmawm ka ti em em a ni. Hmanni lawka a zuk kal pawha hlawhtlinna hmuin Union Budget reflect alo ni ta hi a lawmawm em em a ni. Tin, kan Governor address-ah hian sorkar flagship programe mipui tena kan nghahfak, chhungtin tena kan beisei, socio-economic development programme kalpui a nih tur thu tarlan a ni hi lawmawm ka ti a, Mizoram mipuite hunkhirh tak karah he SEDP hi hma kan sawnpui ngei ka ring a ni. Hei hi thil lawmawm tak, chhinchhiah tlak a niin ka hria a ni.

Mizoram hmasawwna tur atan ram danglam tak kan ni te, NGO, religious institutions, kohhran pawl hrang hrang, media leh mipuite thawhhona ropui thu a rawn tarlang te hi a ropui ka ti a, chhinchhiah tlak em emin ka hre bawk a ni.

Tin, Pu Deputy Speaker, kan border buai hi kan vei em em thin a, hemi chungchang a rawn sawichhuak pawh hi lawmawm ka ti a. Kan border buaina, abik takin hun rei tawh tak atangin Assam nena kan ramri a buai a, hetah hian Pu Zoramthanga kaihhruai, MNF sorkar aia border buaia kal na hi an awm tawh em aw ka ti a, he thil Governor-in a rawn sawichhuak hi a lawmawm ka ti em em a ni. Mizo mipui an thla a muang a, ram leh hnam chhan nan Pathian leh kan ram tan i party ten kan ram chhanna tur atan theihtawp an chhuah a ni tih hi alangin ka hria a. Kan Home Minister leh kan Chief Minister chungah lawmthu he House kaltlangin ka sawi a ni. Kan Governor zahawm takin a rawn sawi hi a chhinchhiah tlak em em ka ti a ni.

Tin, Law & Order enforcement atan Home Department-in Police outpost leh Police office hrang hrang an tichak thar te hi a lawmawm em em mai a. Kan hriat angin Mizoram hi border state kan nih avangin, hel leh smuggling chungchangah te enforcement han tih dawn hian law & order enforcement kalpuitu tur police-te kan thuam that a ngai em em a, he sorkar hian chungte chu a rawn en chat chat a ni tih te hi ka sawi lang duh a ni.

Tin, PWD work tam tak a rawn sawilang hi lawmawm ka ti a, kan Chief Minister zahawm tak Pu Zoramthanga enkawl department-in Mizoram tana hma a laknate a rawn tarlang a, chung zingah chuan Champhai - Zokhawthar road, Tlabung -Kawrpuchhuah, Chhumkhum - Chawngte road World Bank leh Asian Development kaltlanga hnathawh hrang hrang a rawn tarlang hi lawmawm ka ti a ni. A dik taka sawi chuan MNF sorkar

hi chuan kawngpui hi chu kan ti tha thlawt niin ka hria a, sorkar liam taah te kan hriat angin kawng a chhe em em a, ka bialah phei chuan Tlawng - Pukpui kawng chu truck tanna hmunpui hi a ni ringawt mai a, naupangho leh tlema awm awl deuh ho chuan motor tang en hnate an thawk a ni. Chutiang tak chuan kawngte a chhe thin a ni. Vawiinah chuan kan Chief Minister zahawm tak hian min siamthat sak vek tawh a ni tihte ka han sawilang duh a.

Tin, sorkar liam taah khan (sawi tul em em a ni lo mai thei naa ...) Lei chim a tam em em mai a, a hlui deuh tawh pawh a ni ang a, 6 emaw lai kha a chim a. Tun kum 2021 - 2022 hian kan Chief Minister zahawm tak enkawl na hnuai ah Lei thar 7 siam alo ni ta a ni. A inthlau hlein ka hria; kum khat chungin lei 7 vel a siam hman a ni. Ministry liam taah khan lei tam tak a chim thung a. Hei hian he sorkar tha chak zia a lantir niin ka hria a, lawmthu ka sawi a ni.

Tin, PHE hnuai ha hian kan hriat angin Jal Jeevan Mission a awm a, Sorkar laipui hmalakna hrang hrangte chak taka umzui a ni a. Kan Deputy Chief Minister enkawl department hian Mizoram tana thil tha tak tak a rawn chhawpchuak a, a lawmawm em em a ni. Kan bialah hian khaw 21 a awm a, chung zinga khaw 4 chuan Lunglei Greater Water Supply tui pump hi an ring a, Haulawng khua hian tui pump a nei a, a bak dang nei an awm lova. Chuvangin tui min han pump sak tur te hi a lawmawm ka ti a. Bial dang zawng zawngah pawh chu thil chu a kal mek niin ka hria a, thil lawmawm tak niin ka hria a ni.

Health & Family Welfare Department Minister, Dr. Thangtea enkawl na hnuai ah hian, hripui rapthlak tak kan la tawn ngailoh, khawvel pawhin a la hmelhriatloh kan han tawng ho a ni a. Mizote leh covid hi a inmil lo em em mai a, keini community, a huhoa awm chak reng reng mai kan ni a, Covid lah chuan a huho a duh lo em em mai a, vawiin thlengin chu chu kan la tuar niin ka hria a. Chutaing karah Health lamin hma a sawn ziate en hian a lawmawm ka ti em em a ni.

Vawiinah hian Pu Dy. Speaker, sawi tur tam tak Agriculture, Horticulture, RD leh Environment & Forest-ah te hmasawna tam tak a la awm a, kan sawi zo seng lova. Member zahawm tak Pu K. Laldawnglianawm lawmna motion a rawn put luh hi ka thlawp a, "he House hian i pawmpui ngei ang u" tiin kan sawichhuak a ni e. Ka lawm e.

DEPUTY SPEAKER : Aw le, kan inkoh leh hmam hei, tuna kan thil sawihoa hi tih dan phung thinah chuan dar 4 kan pel ngai meuh lova. A lehlamah member te kan zahawm si a, kan inbuatsaihna a nasa a. Chulai karah motion neitu sawm a la ngai ang a, kan House Leader-in House neitu a nihna angin a wind-up a ngai dawn baw a. Engpawh nise, Pu Zothantluanga kan sawm leh ang a, a bak chu kan insawm

hrei tawh lo turah ngai mai ila, inhrethiam ila a tha mai awm mang e tih kha ka ngaihndan deuh a ni a. Ani pawhin a hun takah a hun hmang zo se la a tha a nge. Member zahawm tak Pu Zothantluanga i lo sawm ang u.

PU ZOTHANTLUANGA : Pu Dy. Speaker, ka lawm e. Nimin ni 22.2.2022-a Governor zahawm tak thusawi *Motion of Thanks* sawi thei a ka awm hi lawmawm ka ti a. Kan Governor thusawiah khan lawmthu sawina tur tam tak awmin ka hria a.

A hmasa berah chuan, covid pandemic avanga khawvel ram hrang hrangin harsatna a tawh a, India ram pawh a ni a. Mizoram pawh hmun kilkhawr bera awm ni chungin nasa takin kan tuar a ni tih chu kan hre vek a. Henga sawrkarin a do letna tura hma a lakna kawng hrang hrang NGO te, kohhran te, local task force te leh sorkar-a kan mithiam hrang hrang ten hma an lakna te, Kohhran hruaitute thawhhona avangin khatiang karah pawh Pu Zoramthanga sawrkarin chak takin hma a lo la reng a ni tih chu kan Governor thusawi point hrang hrang atangin kan hmu a, tun hun tawi teah hian sawi sen a ni lovang a.

ZMC-ah tunhmaa kan neih ngai loh hmasawna ruhrel tam tak oxygen chungchangah te, ICU kan neih dante, kan neih belh nasat ziate leh khumte pawh tih belhin a awm a, damlo tam zawk enkawl theihna tur atan. Khum 150 awm atanga khum 248 lai mai kan lo neih belh thei tate sawi tur tam tak a awm a.

Tin, a pawimawh ka tih em em a chu, Union Budget, Union Finance Minister-in a pharhah khan special taka kan ram tan bika sawilan a ni te kha a ropui a. Aizawl by-pass road, western side-ah Sihhmui - Muallungthu a tan cheng 500 crore lai mai dah a ni te, tin, bamboo link road atana cheng 100 crore, tunhmaa project la awm ngai lo, State hausa leh ropui tak takte, hnam fng deuh deuh pawhina an la neih ngailoh kan han nei te hi a ropui a.

Kan hria a, kan Chief Minister-in ngaih pawimawh deuh deuh a nei a. Khawpui a tawh a, traffic-ah harsatna kan nei a, chuang chuan by-pass road hi a lo nawr ngar ngar thin a ni a. Kan *spine*, kan kawngpui pawimawh laia kan motor zawng zawng a kal hian traffic-ah harsatna kan nei thin a ni tih hriain, Aizawl helna kawng a awm a ngai a ni tih hriain a nawr ngar ngar a ni a. Chutiang chuan mi tam takin nuhza siam nan te an hmang a, mahsela, a takin a lo thleng dawn niin kan hria a, keini bial atangin a intan dawn a, a lawmawm khawp mai a. Tin, kha by-pass road kha a lo hlawhtlin hunah chuan veng tin deuh tho tlak lampang veng atanga kha kawng kha kan pan chuan Aizawl khawpui chhung traffic jam hi a tih rehna tur kawng tha tak mai kha kan hmu dawn niin a hriat a. Chuang chuan, Mizoram mipui zawng zawng tana thil hlu, thil tha tak mai central-in a fund pawh a rawn ruahman lawk diam mai kan han nei hi thil ropui tak,

State vannei bik tak kan nihna a niin ka hria a. Kan hotute central sawrkarin an rin ziate, an ngaih pawimawh zawng tih hlawhtlin a tul a ni an ti tih hriatna a tan a pawimawhin ka hria a ni.

Tin, bamboo link road hi la awm ngailo a ni a, State dang pawhin an nei ngai lova, vawiinah chutiang chu kan han neih belh dawn bawk a ni tihte han hriat hian a ropui a. Ni e, mau hi kan hotupa ngaih pawimawh a ni a, chutih rual rual chuan kha bamboo link road kan neih hunah khan kan luipui kama fertile land, lei tha hmun kha nasa takin kan hmang tangkai thei dawn tih a chiang a. Chuvang chuan, hei hi a tawpna mai tur a ni lo, a pilot project chauh a ni a. Chuvang chuan, kan ram tana rohlu tak lo ni tur, a vision nuihza siam nana whatsapp group leh social media-ah te an tih thin angin, kan pu hian a tih tak tak hi chuan a lo theih a ni. Mite ngaihtuahnaa theih loh tura an ngaih kha a lo theih a ni tih a lantirin ka hria a. Chutiang bawkin nakinah chuan ‘lei verh’ kan tih te pawh hi a lo la thleng ngei ngei ang tih kei ka ring a. Khu Sairang-ah ka kal a, Bairabi leh Sairang inkar ringawtah pawh leiverh tam tak a awm a, a tul a nih chuan kan hotute, kan Chief Minister ten an ngaih pawimawh em ema hi chu tihhlawhtlinin a la awm ngei ang tih te pawh hi a rin theihin ka hria a ni.

Pu Dy. Speaker, Vety-ah pawh, hei, Mizote hian intodelh kan duh khawp mai a, a bikin pandemic hnuah hian eizawna kan zawng nasa a, engin nge ei ka zawn ang, eng nge ka tih ang tiin thalai tam tak ten rilru an seng a. Chuvang chuan, ar vulhte pawh kan in tihhmuh a. Tichuan Vety-ah te hian hatchery, artui tihkeuna tur khawlte kan han dah a. Tin, ZPDS-ah te pawh tunhmaa no 20,000 tihkeu theihnaah khan no 60,000 ti keu turin ruahmanna a kal mek a ni a. Chutiang chuan ar notea kan indaihlohna pawh hi nasa takin tih changkanin a lo awm ang a, kan lo indaih sawt ang a, ar vulh pawh kan lo tam phah sawt ang a, arsaah te, artuiah te kan la intodelh ang tih a rinawmin ka hria a.

Tin, Covid avanga ei leh bara kan harsat em em lain, Horticulture, MIZOFED leh Agriculture tangho in *Vegetables & Fruits Supply Chain* kalpuin, vairam chawhmeh lalut lova kan rama intodelhna a lo thlengte kha a tha. Tin, chu chawhmeh leh thei inthlak thleng kualna hmang chuan beneficiary, kan farmers ten hlawhtlinna tam tak kan hmu a, pawisa tam tak tak an lo hmuchhuakin an lo lalut a ni tih han hriat hian a ropui ka ti a. Chuvangchuan, kan sawrkar hi a awm mai mai lo; Covid avanga kan buai em em lai pawhin nasa takin hmasawna hna alo thawk a ni tih kan hmu a, a lawmawm ka ti a. Sports-ah nise phullem phah tam tak kan hria a, infrastructure tam tak a lo ding chho zel a. Sports-a kan sawrkar hmalaknaah hian vawiinah hian thalai ten lawmthu sawi tur tam tak kan neiin ka hria a ni.

Tin, PHE, JJM chungchanga hmalaknate hi a ropui a, thingtlang mi rethei, harsa tak tak ten an inchhungah tui herh haw theiha an han nei ta te hi kan ramin hmasawwna a chan ropui tak niin ka hria a. Chutiang chuan PWD pawhin kawng tam tak a siam a, leihlawn an tam tak a siam a, kan sawrkar hian tun hma kawngchhiaa harsatna tam tak kan tawh lak atang khan min chhanhim zel a, hmasawwna min siam sak zel a ni tih han hriat hian a ropui ka ti a. Chuvangchuan, member duhawm tak Pu K. Laldawngliana motion hi ka rawn support-in ka rawn thlawp a ni e. Ka lawm e.

DEPUTY SPEAKER : Awle, tunah chuan House Leader, kan Chief Minister zahawmtak hun hmang turin ilo sawm ang u.

PU ZORAMTHANGA CHIEF MINISTER: Pu Deputy Speaker, ka lawm e. Hei, tun tuma kan Governor thusawi, lawmthu sawina motion member zahawmtak Pu Dawngtea'n a rawn putluh kan han sawi khawm hi a lawmawm ka ti a. Hetah hian kan vain awm thei ila, kan ngaihdante thawh khawm den den ila tha pawh ka ti a. Amaherawhchu opposition lama kan unaute, member zahawm tak te tel thei lovin an chhuak a. A chhan an sawi chu, nimin tlaiah ka office-ah an lo leng a mi pariat lai, lehkha an rawn dah a. An lehkha rawn dah piah lamah an sawi ber chu, “kan Speaker zahawm tak hian Ngawizawl kawng laih hna chungchanga mawilo takin a inhnawmna a ni tihna record kan nei a, (audio record), chuvangin hemi hi chuan min kaihruai tawh lo se la, a ni kaihruaina hnuaiah chuan kal lo ila” an ti a, chu chu an rawn sawi ber a ni a. Amaherawhchu an hnenah pawh chiang takin ka lo sawi a, hetiang hi chu khawi laia tu audio record, tu thusawi emaw, tu aw record emaw atanga House kan kal chuan tawp in tai a awm lo ang.

Vawiinah kan Speaker laka record eng emaw awm avanga a tuartu (victim) a kan dah a, khatia a awm dawn chuan, naktukah, “Pu Zorama chet dan a dik lo tih record a lo awm ang a, kei kha min tawrh tir zel ang a, a tukah chuan kan opposition group leaderte, minister hluite pawh in ni a, hman thil a rawn chhuak zel ang a, tawpin tai awm lovin a kal dawn” ka lo ti a. An tih tak tak ka ring lova, amaherawhchu hei vawiina an rawn kal khan an chhuak leh a, an han puang a, an chhuak ta vek mai a. “kan Speaker kaihruaina kan ring lo e, kan kal dawn lo e,” tia an chhuak ta kha pawh ka ti a, puitling takin thil kan ngaihtuah a tha a. He House-ah hian kan Speaker emaw, kan Deputy Speaker emaw ina *Chair*-a thua an conduct-naah, mimal emaw, a group emaw ina, “ka thusawi i ti tawi bik, min nek chepin ka hria” tia lungawi lo deuh a han titau deuh ngat ngatte chu awmin han in boycott deuh pawh awm ni ta ila, House chhunga kan conduct thil kan protest-na a ni. Parliament-ah pawh an ti a, a awm vek. Amaherawhchu, chutiang ni hauh lo, sawrkar hmasa hun laia thil thleng, vawiina tute emaw aw record atanga “zui tlak niin kan hrela” han tih thar leh kha chu an sawi tlai mah mahin ka hria a. Kha kha kan pawm dawn a nih chuan awmzia a nei dawn lo a ni. Entirnan, thubuai

rit tak ka nei a, Chief Minister ka nih hnu pawhin, kha thubuai kha nikum kum tawp lamah, kumin kum tir lamah a fel chauh a ni. Thubuai rit tak ka neih kha chu tu audio record emaw a ni lova, prosecution, charge sheet leh court involve, judgement order nghak, chuti khawpa chiang chu a ni. Khami hnuaiah khan, “Pu Zoramthanga hian court-ah thubuai rit tak a nei a, chuvangin House Leader a nih zel leh, a khaihruaina hnuaiah hian awm hi a tha kan tilo” ti duh sela chuan la awm tak a ni. Takna nei, chiangsaa awm, case ka nei, court-ah ka kal mek, ka inlan zak zak, chumi play chuan complain rawn thlenin chhuak tau emaw, ka House Leader nihna hnua emawa awm duh lo ni sela chuan ala ang deuh zawk a. Pu Hawla pawhin a nei tho a, mahsela thubuai khatiangah reng reng chuan judgement chhuah a thiang lo a nih chuan, House-a tuten emaw complain a ngai lo. Complain lovin keipawh kha ka in resign a ngai ang, thiam lo ila. Pu Hawla pawh kha thiam lo sela a in resign a ngai ang, tumahin sawi buai a ngai lo, a chiang rang mai a ni.

Chuti khawpa kalah pawh, Pu Hawla hunah pawh, ka hunah pawh judgement a chhuah hma court-in a dik leh diklo thutlukna a siam hma chuan kan member zawng zawng hi an ngawi thap a nih kha. Kha aia nasa taka nep, “miin thubuai an siam sak dawn a ni awm e,” tih pawh nilo, a video a sawi lai thla tak a awm tih pawh nilo, tute emaw an audio record kha a awm a, chutah chuan “a ti dik lo an ti a nia” tihah khan, tunah hei kan han buai ta a ni a. Colonel Lalkhawngginga’n mi ang lo thusawi a sawi kha min ti hrechhuak a, “khutah khuan pa pakhatin sakhi a awk a, a rawn paw zar zar mai; amah tak chu ka hmu lo a,” a ti a. I hmuh loh chuan engtin nge a awk a, a paw zar zar tih i hriat an ti a, “miin an sawi a lawm” a ti a; a nih tu ten nge sawi an ti a, “a sawi tu tak pawh chu ka hre lova” a ti a. A sawitu tak hre silo engatinge “a awk a, a paw zar zar mai” i tih si, an ti a, “an sawi an tia ni lawm ni,” a ti e, a tia, a kal kual thui tawh. Keini court thleng khawpa Pu Hawla nena kan awm pawha heta, “pip e, pup e,” ti hauh silo, “an sawi a ni lawm ni” tia House kan buai ta em em mai hi chu State dang legislature in hria sela, “Mizo ho chu in duh tui hrim hrim ni maw, in tihdan a mak hrim a ni maw, hriat thiam in va har ve maw le,” min ti sela a awm ngawt ang.

Chuvang chuan, hemi hi a tehkhawng (unit of measurement) ah he House-ah hian kan hmang dawn a nih chuan, naktukah hian, “kan Minister Pu Thangtea tihdan a dik lo reng reng, khatah pawh khan pawisa ka pe e” tiin kan Speaker hi House-ah nawrthlak nan leh tih mualphoa, tih tawp nan hmang ta ila, a dawt lehah chuan kei emaw, Pu Tawna emaw, Pu Thangtea emaw, kan Minister zawng zawng pawh hi a audio record siam hi a va awl tehlu dawn em! Duh leh tawng pai deuh pawhin tihtir mai ang khatiang tur khan. Anih loh chuan, “pawisa pe turin min phone a, ka han kal a, zan dar 6-ah lokal rawh a ti a, ka han kal a, a guard in min lo dang a. Pui lokal rawh a ti alawm ka ti a, kan hre lo a ti a. Pu ka phone leh dawn, in care-of kual leh a ngai si a, an han hrilh a. “Naktukah lokal mai rawh se” a ti a, a tuk zanah ka han kal leh a,

racksack-in ka ak a, ka pawisa ah zawng zawng nen, “lokal tir rawh u” a ti a. Tichuan, an room ah min hrui lut a, kan chhiar dun a, kan chhiar dun laiin an awmpui nula a lo lut lehngal a, a lo vin tuar tuar a” te han ti sela. Dawt hlir pawh kha aia ang pawh khan miin an audio record hi an siam thei vek a ni.

Chutiang aia ang chuan kan Minister te, opposition ah pawh entirman, kan tawng an huatthu suh ah, Pu Zodintluanga te pawh Minister hlui a ni a, “a minister lai khan kawnglah nan a bialah pawisa a dil tlat mai si a, ka pek dawn chuan chuti khati” tih kha a audio-a sawitu tak pawh lang mang silo khan, a tul te chuan ka sawi tawh ang khan aw pai deuh anga lang tur khan hire tur kha an tam dawn si a. Khang pawh khan siamtheih vek a ni. “A chiang e, Pu Zodintluanga hi, Pu Thangtea hi, Pu Zira hi hetia a nih chuan Minister a awm chi a ni lo” tiin inban ta zel mai ila, kan inban zo thei mai ang chu maw le. Audio record a pung zel ang a, MLA tlin te a har tehlu nen, a inpaih a awl lutuk ang a. Vawikhat he House-ah a tehkhawnga kan hmang a nih chuan a dangah khan a in tehkhawngna tur a piangthar zel ang a, mi nuh he House hian kan ti za ang a, a puitling lo a ni. Miin a duh a nih chuan Court-ah kal rawh se. Tichuan Court-ah duhtaw in an ti ang a, Court-in thiamloh a chantir tawh chuan kan hum thei reng reng lo a ni. Court-a thiam ka chan tlat chuan kei pawh thiam ka chang tlat a, in mi hum pawh ka ngai lova, heti hian ka awm mai a ni. Chuvangin puitling takin heng hi chu kal tur a ni. House-a a tehkhawng (unit of measurement) a tu sakhi awk hria emaw sawi chhawn leha lo buai tur hi a ni lo reng reng. A puitling lo em em a ni.

Chuvangin, hei hi a dik lovin a tha lova. Heng hi chu kan opposition unaute hian an chung a thlengah pawh an duh ka ring lova. Chutilo chu kan Opposition Group Leader, Pu Duhoma chungchang thuah pawh dawt hlang ngatin a audio record kha an siam thei ang. Pu Zodintluanga chungchangah pawh “a minister nih laia mi” tiin an siam thei ang. An chung a thlengah pawh a tha lo, kan minister te chung a thlengah pawh a tha lo. A thleng a nih pawhin a sawifelna chu he House-a innawrna a ni lo, court-ah a kal tur a ni.

Chuvangin puitling takin heng hi ti ila. Tunah pawh kan Opposition member zawng zawngte hi tha tak a he Session hi rawn attend leha, sawi buai tur emaw, sawifel tur emaw a awm a nih chuan, hei hi rorelna a ni lo, Court-ah a ni zawk tih hi hriaa, lo tel a, tun kan Budget Session pawh hi a tawp thlenga min tawiawm turin ka sawm bawk a ni.

Awle, kan Governor khan thil tam tak a sawi a, amaherawhchu, chung zinga tawi fel deuha han lakkhawm ka duh chu –

Pakhatnaah chuan, he sawrkar hi harsatna tinreng karah kal ve hrim hrim rawh se Pathianin a ti a ni ang thenkhat in an ti a. Han ngaihbel tur tingtang hian a ni bawklah tak a. Kan sawrkar hmasakin mau tam tampui kan tuar a, kan mangang em em a. Amaherawhchu, kan su tlang a. Tunah sawrkarna kan han nei leh a, 2019, normal period kumkhat kan han kal a, khatah zet kha chuan funding system, budget hman dan tur a lo hahdam tawh khawp a, term hmasaa kan sawrkar lai aiin. Hetiang hi a nih chuan avanuam dawn em kan ti a. Kum khat chauh kan han sawrkar a, 2019 chho pawh kha a kal chho zut zut mai a nih kha.

Amaherawhchu, 2020 a lokal chho a, covid a lo thleng tak tak a, keini Mizoram State te tak te chu sawiloh, India ram pawh sawiloh, khawvel pumpui a han nghawng tak tak a. Kha period-ah khan kan han lut a, covid period sawi ngai lovin kan hre theuh mai. (**Speaker:** Ngawi rawh u aw. Kan hun hmasa a tawp a, kan ti tlang mai dawn mi ni ang? Awle, chhunzawm rawh le.) Pu Speaker, ka lawm e. Kha covid hun harsa tawp kha kan hmuh angin development kan sawi thei tawh lo, dam khawchhuah kan tum a ni ringawt mai a ni. Kha period-ah khan kan han lut ta a; a dang sawibelh lo ila kan hriat sa a ni.

A pahnihaah chuan, African Swine Fever, kan vawk neih a han thi zawih zawih mai a, sing thum bawr vel lai a han thi a, a vei tawh chu tihdam ngaihna a awm lo, kah hlum mai a tha zawk an ti a. Khati khawpa ram economy tibuaitu khan min su leh a. Chutah, thil tenau mah ni se kan la, tawn ngaih loh khawchhak area-ah lir an nghing char char mai a, a bialtu MLA tan, sawrkar tan, kan vai tan buaithlak a ni.

Chu mai chu ni lovin border-ah Assam nen kan han buai a. Khang kha chu mipuiin kan hre tho a. Amaherawhchu, mipuiin min hritapuiloh, keima mimalin ka tawrh pawh kha nasa tak a ni. Union Home Minister te, Home Secretary ten “in awmna, in camp Vairengte thlanga mi ah khan lut leh tawh suh u, in inhnuk kir tur a ni” an ti a, kan luah leh hman tawh si a. Ka zuk chhannaah chuan, “inhnuhkirna order ka pe dawn a nih chuan, a hma in ka resignation ka pek hmasak a ngai ang” ka zu ti a. Tih chi niin min hre lo a ni ang, an rawn nawr ta lova. Khu, kan thu hlen ta a ni. Luhulul tawp chhuah a ngai a ni. A hnu kha chuan thil lian thamah min nawr ta vak bik lova. Colonel Rahima, IAS in Pu Denga hnenah, “He pa, i Secretary Pu Zoramthanga hi ka hmuh tawhah ala luhlul ber, vawi khat mah ka be dawn tawh lo’ min ti a, min biak tak loh khan *Peace Talk* kan kalpui theih phah ta a. A tel lo leh a hriat lovin foreign-ah kan kal theih phah a, a tha ta phian a. Chuvangin, kan ramri buai thu ringawt pawh hi amah hian chhiatpui tham a tling a ni.

Chubakah chuan Burma refugee an rawn awm thla leh a, tunah pawh a sing tel in an awm a. India-in tha takin a pui ngama zeng a ni si lo, “pui rawh,” kan ti a, nawr

puiin kan zuk nawr a, a tawpah chuan ‘Burma refuge chu ka pui theilo, nangmahni chu ka pui thei che u’, an ti a. “Awle, min pui ula, keinin kan pui mai ang,” kan tia, kan in *care-of* kual ta a, a tha ta phian zawk a. Chuvangin, heng han kala pawh hi, tupa natna emaw anga, “a zunthlum a, a zunthlumin a kal a khawih a, a kal khawih mai ni lovin a thin a khawih a, hetah a chuap a khawih bawk si a amah ringawt pawhin thihpui tham vek pali vel a hring a ni” an tih ang deuh khan tun kan sorkarina harsatna a tawha hi chu amah pawhin chhiatpui tham vek hi a tla khawm tak tak mai a.

Engtin nge maw ni kan damkhaw chhuahpui theih le, kan financial problem ka sawi tawh a, kha ringawt pawh kha kum khat leh thla sawm chhung khan kan hmuh tura tih budget-a min dah tir tawh, kan hmuh leh tak siloh kha vaibelchhe 2,700 atanga 2,800 inkar a tling a. A dang nepnawi kan la chhut lo, chu chu a hlawm lian a ni. Chutah Mizoram atanga kan tax hmuh loh avanga harsatna kha kan la chhut tel miah lo a ni. A total ngat chuan vaibelchhe 3,000 a hnai a ni. Keini tan vaibelchhe 5 hlauh pawh a nasat nen, Vaibelchhe 2,000 atanag 3,000 inkar kan hmuh tur hmulo zel bawk si. “Engtin nge hlauh in pek a, engtin nge damdawi man in hmuh a, engtin nge buhfai man in hmuh” minti sela, keipawhin a mak ka ti reng a ni. Pathian tanpuina kan hmu a, heti hian kan dam khawchhuak a ni. Chuvangin ‘hun harsa atana sorkar siam tura Pathianin a ruat a ni’ min ti pawh hi a ruat chu min ruat ngei mai, amaherawhchu eng nge min ruat chhan chu ka hre bik lo, min ruatlo tih theih a ni lova. Min sorkar tir a, harsatna zawng zawng kha a tling khawm a, tet laiin kan invawma, “a burin khum le le rawh, pawkawng” tih ang deuh kha a ni a. A burin kan khum tak tak a ni.

Chutiang kara kan lo dam khawchhuak a, kan sum dinhmun, central-in, “hlauh hi chu i ti tlem deuh ang” an rawn ti si lova, DA an rawn tipung tulh tulh bawk si a, kan tihpun lohin kan ti thei bawk si lova, kan han tipung leh rih bawk thin a, chutiang chuan kan kal a. Chuvangin, Pathian-ina heng kara min hruai chhuak hi kan Governor thusawiin point hrang hrang a rawn la chhuak a, “lawmthu sawi tur kan ni e,” tia member zahawm tak, Pu Dawngtea’n a rawn move hi lawmthu sawi mawlh mawlhna tlak hi a ni reng a ni.

Tin, pakhat ka han sawi leh duh chu, kan bamboo project hi Delhi lam khuan kan bombard nasa khawp a, amaherawhchu India ramah keini anga bamboo project nei an awm si lova, a sukaw tantu nih a ngai a. Chuvangin theih tawpin kan han sawi a, bamboo changtu Horticulture Minister, Pu Tomara henah “Bamboo link road a tel loh chuan ramhnuai kan bamboo metric tonn maktaduaih tel a awm a, hetah a siamna kan nei a, a phurhna kan nei lo, kova put ringawt chuan engmah a thleng dawn lo, road min siam sak rawh,” kan ti a, ‘road maker ka nilo, road maker, Ministry of Road Transport-ah kal rawh u,’ ati si a, an niin “bamboo road kan siam ngailo, national highway-te chu chu kan siam” an lo ti bawk si a, ‘*Nobody’s Child*’ a ni, he project hi; nu neilo, pa neilo,

fahrah project- a chawm len kan tum a ni a. A buaithlak zia chu, Prime Minister hnenah te, Home Minister hnenah te, Finance Minister hnenah te ka sawi pawhin. Mau kan ngah si, rua kan ngah si, a industry pawh theih ang tawkin kan ti a, kan tih chin, tlem tlem a chi kan kuia, “hei, heti hian kan ti a, kan phun a; hei, a thlalak pawh; amaherawhchu kan tilian thei lo, a te lutuk, min puih a ngai a ni. Thla kaw mi niin he bamboo project hi chuan pian a tum tawh, mahse nu a nei lo” kan ti a. Chuvangin, Nirmala Sitaram hnenah pawh, “A nu tur i hmuhchhuah a ngai a ni, chu chu hetah hian eng head of account-ah nge i dah dawn kan ti a. “Union of India budget head-ah hian he head of account hi a awm lo, ka ngaihtuah pui che u a, a har em mai, dollar-ah rawn ti mai rawh u,” a ti a. “Han ti chhin rawh u,” ka ti a, beihpuiin ka bei a, Finance Secretary hovin kan ngaihtuah a, a tawpah, “Ngawi rawh u, pilot project-in tan ila,” an ti a.

Finance Minister-in Budget Speech-a a hmingah pawh, “Pilot Project on Bamboo Link-road” a rawn ti ta a, a bul tanna pilot project-ah ₹100 crore a rawn ti a.

Eng le khaw le, ka lawmna em em em chu, a amount tam leh tam loh lam a ni lo, naute a piang ta hi a ni. Heihi a hmawr hawna a ni a, a dang, a lian zawk pawh a lo kal zel ang tih an rawn sawi tel leh nghal a. Chuvangin naute a piang a, hemi hmang hian nasa takin kan nawr ang a. An fiamthunaah emaw, kan tawgkam thiam zawng zawng nen, kan tehkhin thu hriat zawng zawng nen hian kan nawr tak meuh meuh a, eng emaw ti pian pian chuan hei, a lo piang chho ta a. Nakinah chuan tha taka he project pawh hi a kal chhoh theih ka ring a.

Tin, chuchang nilovin, a budget tih hma khan ka zuk nawr leh a, telephone-in, “Pi Nirmala, hei Finance Commission-in min pek cheng 500 crore chuang hi min pe phal si lova, an recommend-nain hei tal hi chu min rawn pe teh” ka ti a. “Ngawi rawh, kawng dang ka rawn dap ang, khami kha chu a tihtheih tawh loh, a liam tawh” a ti a. ₹500 crore Aizawl by-pass ami hi hei hian a rawn hrin chhuah a ni ve mai awm tak e ka ti a. “He pa hi a ninawm em mai, hetia eng emaw ti tala kan pek mai loh chuan” a ti a. Hemi kawng by-pass hi chu chu ti lutuk pawhin ka beisei lova, amaherawhchu kan nawr chet ve hrim hrima, “he hmeithai hi ka pek mai loh chuan, a lokal zing si a” tih Bible ami ang deuh khan; min ning si a, he cheng 500 crore hi a rawn tichhuak ve ta mai a ni awm mang e aw, te ka ti a. Amaherawhchu cheng 500 crore an tihna kha a by-pass an ngaih pawimawh vang ni maw, ka zuk nawr ning ni maw, ka hre tawh bik lova.

Eng le, khaw le, cheng 500 crore plus 100 crore min han pe ta a, a Budget speech-a Mizoram hming lang meuha min han pe hi chu a ropui ka ti a, lawmawm ka ti a. Kan bamboo project naute chu a te emaw, a lian emaw a lo piang ta a. Heta tang hi chuan a kalpui zel dan tur pawh tha takin a awm ang tih kan ring a ni.

Tichuan, Pu Speaker, a tawp ber atana ka sawi duh chu, SEDP tih tumin theihtawpin hma kan chhawp a, mahsela covid avangin tihngaihna reng reng a awm lova. Hei, kuminah erawh chuan tlemin a ziaawm deuh a. Kan finance te pawh theih tawpin tan kan han la a, budget-ah nakin budget kan present hunah SEDP pawisa-ipa kan dah turte pawh a lo la chhuak ang a. Hetah hian a tlem berah chhungkaw singruk In khat ina cheng singnga hmu turin project phawt mai ang kan ti a, chung chu tihhlawhtlin kan han tum phawt mai a ni.

Amaherawhchu department thenkhat pek belh ngaite an awm ang. Khawi lai emawa kan kuhva chi man daih lovah chuan cheng singnga bak pek te pawh a ngai ang. Anih loh leh vawk vulhna tur atan chuan pek belhna tur pawh a ngai ang. Engpawh ni se, chung chu kan la ngaihtuah ang a. A chawh rualna kha tia kan han tihah cheng singnga tal thla tina an dawn theih tur, an trade thiam zawng thlanga SEDP-a kal turin, chutah chuan chhungkaw singruk aia tlem lo, vawikhatna, a bul tan nan han cover phawt kan tum a. Chumi hmang chuan Pathian zarah nakumah kan chhunzawm ang a, Pathianin rem a tiha a dawt leh sorkarna min pek chuan, chutah pawh chuan Covid pawh a lo ziaawmin nasa zawkin kan kal thei ang tih kan ring a.

Chuvangin, hun harsa atan ringawta Pathianin sorkar siam turin min dah kan ring lova, hun harsa tawn chhuak tur leh, a hnua Varparh Arsi ti-eng zual zel turin min siam ve chek ang a, tih a ni. Chuvangin theih tawkin hma han lak chhoh hi chu kan tum a. Engpawhnise, Pu Speaker, sorkarna te pawh hi, “keini a dawtah kan sorkar dawn” kan ti a, kan insawi siak a, kan inrinsiak a, amaherawhchu, a tak tak hian ti ta ila, anih loh leh, “inthap ang aw, in leh lo chan thakah aw, a dawtah tunge sorkar-a i rin” ti ila, party thenkhat kan opposition lama mi hotute pawh hian, “In leh lo channa tak tak a nih dawn te chuan, MNF ka ring” an tih tho hi ka ring khawp mai a. Anmahni lamah hian In leh lo channa tur hi an dah kham ngam lovang tih chu thil awmthei tak a ni a. Chuvangin, a dawt kal leh zel turah pawh Pathian tanpuinain kan sorkar leh kan ring a.

Engpawh nise, kan Governor ina heng a’n sawi zawng zawng, mipui kan tan hona, sorkarin theihtawp a beihna, NGO ina theihtawp a chhuahna, kan thawktuten theihtawp an chhuahna, Kohhranina theihtawp an chhuahna, kan ram development, covid kan fight-na. Chuvangin, kawng tinrenga theihtawp kan chhuahna a rawn fak a, a rawn sawi hi a ropui ka ti a. Hemi anga kan Governor thusawi hi vawinah kan member duhawm tak Pu Dawngtea’n “Lawmthu i hrilh ang u” ti a Motion a rawn put luh hi kan vaia pass tlang turin member zawng zawngte ka sawm a ni e. Ka lawm e.

SPEAKER : Awle, tunah chuan Motion neitu Pu K. Laldawngliana sawi tur a neihte sawi turin ka sawm ang a, tin, adopt rawn dil nghal se.

PU K. LALDAWNGLIANA: Pu Speaker, ka lawm e. He House zahawm taka kan motion rawn put luh kan Governor zahawm tak thusawia lawmthusawina ka rawn put luh chu House-in kan sawi a, member zahawm tak tak, mi 14 kan leader hovin kan sawi a, a lawmawm hle mai. Vawiina ding hote zingah pawh experience nei tha tak takte an awm a, chungte chuan rawtna tha tak an rawn sawi chhuakte pawh a lawmawm e. Sorkar pawhin a ngaih pawimawh tur thil tam takte pawh an rawn sawi chhuak a, ka lawm hle a ni. A sawitu zawng zawng thahnemngaih takin Zoram tana tha tur nia an hriatte sawichhuah a ni kha a lawmawm ka ti a ni.

Pu Speaker, kan sawi zinga ngaih pawimawh point 5 lek han sawi lan tel ka duh a.

A hmasaberah chuan, Mizoram sorkarin thu lawmawm tak thuneihna insemzai, Lunglei Municipal Council din a remtihna Mizoram Gazette ni 22.11.2021-a a chhuah hi Lunglei khawpui leh Chhimtuipui tana hmasawna lawmawm tak leh chhinchhiah tlak tak kan hmuh hi House chuan kan lawmpui tak zet zet a ni.

A pahnihaah chuan, central sorkar pawhin Mizoram sorkar min duhsak hle mai a, an sawi tawh ang khan cheng 600 crore ngawt project min pass sak hi House chuan central sorkar chungah kan lawm hle a ni.

A pathumnaa ka sawi leh duh chu, SEDP kaltlanga kan ram in hmasawna duhawm tak kan han hmuh khan lawmthu ka sawi duh bawk a. A bak pawh kha kan House Leader-in a rawn sawi a, a aia nasain malsawmna pawh kan hmuh zel ka beisei a ni.

Point 4 na atan ka sawi leh duh chu, hripui kan dona karah sorkar, kohhran leh NGO-te thawhhona avangin hmasawna ropui tak tak kan hmuhte avangin lawmthu ka sawi duh bawk a ni.

Point 5 naah chuan, Governor thusawi atanga lang chiang em em chu, Mizoram sorkar hnuasia department hrang hrangte leh sorkar thawhho thatna a lang chiang a, hlawhtlinna tam tak, hei, kan hun dar 4 a pelh hnuah pawh sawi tur tam tak a awm a, kan insum zawk a. Malsawmna, hlawhtlinna kan hmuh zawng zawng kha ropui ka ti a, kan ram leh hnam tan thawk ho zel turin kan insawm bawk a ni.

Sawi tur tam tak a awm naa, Pu Speaker, kan hun te a lo tlai lam ta bawk a. Vawiina kan Governor zahawm takin a thusawi *Motion of Thanks* hi lungrual takin he House zahawm taka member zahawm takten min pawmpui turin ka sawm a, min adopt sak turin ka ngen bawk e. Pu Speaker, ka lawm e.

SPEAKER : Governor thusawi chungchanga lawmthusawina motion, “that the Member of Mizoram Legislative Assembly assembled in the Session deeply grateful for the address which he has been pleased to deliver on the 22nd February, 2022” tih chu kan sawiho ta a. Tunah adopt remti apiangin, ‘remti’ ti rawh u le. Remti lo kan awm em, kan awm chuan ‘remti lo’ ti ula. (*Member-te remti lo an awm lova*)

Awle, tunah chuan Governor thusawina Motion chu House-in lungrual takin a pass a, a adopt ta a ni. (**Pu K. Laldawngliana:** Pu Speaker, ka lawm e.)

Awle, vawiina tana kan tihtur chu kan lo zo leh ta a, Naktuk Ni 24.2.2022 (Ningani) chawhma dar 10:30-ah kan thukhawm leh dawn nia.

Sitting is adjourned (4:22 PM)